


2025

ENERO - MARSO

Vol. 101, No. 1

Pang Sabado nga mga Pagtulon-an sa Biblia

Dibisyon sa mga Hamtong



UNANG BAHIN

Ang Ebanghelyo Sumala kang Juan

Ang hinigugma nga tinon-an nagpaila kang Jesu Cristo, ang walay katapusang Anak sa Dios ug langitnong tambal alang sa sala sa tibook nga kalibutan.

| | |
|---|----|
| 1. Ang Ebanghelyo Sumala kang Juan | 5 |
| 2. Ang Cordero sa Dios | 10 |
| 3. Ang Kasal sa Cana | 15 |
| 4. Si Jesus Didto sa Templo | 20 |
| 5. Si Jesus ug si Nicodemo | 26 |
| 6. Ang Paglihok sa Balaang Espiritu | 31 |
| 7. Si Jesus ug si Juan Bautista | 36 |
| 8. Si Jesus ug Ang Babaye nga Samariahanon | 41 |
| 9. Ang Pagkatawo sa Usa ka Misyonero | 47 |
| 10. Si Jesus ug Ang Anak nga Lalake sa Tawo nga Halangdon | 52 |
| 11. Si Jesus ug Ang Paralitiko sa Betsaida | 57 |
| 12. Ang Pagbulot-an sa Anak | 62 |
| 13. Si Jesus Nagpakaon sa Panon sa Katawhan | 67 |

Mga Leksyon sa Eskwela Sabatika, usa ka inadlaw nga programa sa pagtuon, nga nakabasi lamang diha sa Biblia ug Espiritu sa Tagna nga walay dugang nga mga komentaryo. Ang mga gikutlo ingon ka mugbo kutob sa mahimo sa paghatag mubo, deretso nga mga panghunahuna. Ang mga bracket [] gihatag sa pipila ka mga punto sa pagsiguro nga masabtan, tukma nga konteksto, ug hapsay nga mabasa. Dugang nga pagtuon diha sa mga tinubdan nga mga kagamitan kusganon nga girekomendar.

Mga Ilustrasyon: Maayong Asin diha sa atubangan nga panid; mga gikuhaan sa Mapa diha sa mga pahina 4, 46, 72.

Copyright © 2025 by the Seventh Day Adventist Reform Movement General Conference, Sabbath School Department, 5240 Hollins Road, Roanoke, Virginia 24019, USA.
Telephone: 1-540-362-1800 • Web: www.sdarm.org • E-mail: info@sdarm.org

Sabbath Bible Lessons (USPS 005-118), Vol. 101, No. 1, January–March 2025. Published quarterly by the Seventh Day Adventist Reform Movement General Conference, Sabbath School Department. Printed, and distributed by Reformation Herald Publishing Association, 5240 Hollins Road, Roanoke, Virginia 24019-5048, U.S.A. Periodical postage paid at Roanoke, Virginia 24022-9993.

U.S.A. and Canada
Contact: Telephone 1-540-366-9400 • Website: www.reformationherald.com • E-mail: info@reformationherald.org

Annual subscriptions in U.S.A.: U.S. \$22.00. Large print \$33.00. International \$21.00 plus shipping. Large print international \$31.00 plus shipping. Single copies \$6.00. Large print \$9.00. Please send subscription requests and payments (in U.S. currency only) to the address below. Prices subject to change without notice.

POSTMASTER, please send address changes to: Sabbath Bible Lessons, P. O. Box 7240, Roanoke, VA 24019-0240.

Australia
Contact: Telephone 61-2-9627-7553 • Fax 61-2-9627-7554 • Website: www.sdarm.org.au • E-mail: info@sdarm.org.au

Annual subscriptions in Australia: AU \$34.00 (individual copies \$8.50). Other countries, AU \$34.00 plus shipping. Please send subscription requests and payments (in Australian currency) to the address below. Sabbath Bible Lessons, P.O. Box 132, Riverstone NSW 2765, Australia.

South Africa
Contact: Telephone & Fax 27-011-336-7064 • Website: www.sdarm.sa.org.za • E-mail: admin@sdarm.sa.org.za

Annual subscriptions in South Africa: R120-00 (single copies R35-00). Please send subscription requests and payments to the address below.

POSTMASTER, please send address changes to: Sabbath Bible Lessons, P. O. Box 7950, Johannesburg 2000, South Africa.

Pasiuna

Karong tuiga, tun-an nato ang upat ka mga leksyon *Ang Ebanghelyo Sumala kang Juan*. Tungod sa kaligdong, ang tagsulat sa ikaupat nga ebanghelyo wala magpaila sa iyang kaugalingon, ni maghisgot sa iyang kaugalingon nga usa sa duha ka tinon-an nga una nga misunod kang Jesus (Juan 1:37). Hinonoo, siya nagtumong ngadto sa “laing tinon-an,” “kanang tinon-an,” “ang tinon-an . . . nga iyang gihigugma,” “ang tinon-an nga gihigugma ni Jesus,” ug “ang tinon-an nga nagpamatuod niining mga butanga” (Juan 18:15; 19:26; 21:20, 23, 24). Ang kamatuoran nga ang ubang inila mga tinon-an gihisgotan sa ngalan samtang ang ngalan ni Juan wala iapil, daw nagpaila nga siya mao gayud ang nagsulat niana nga ebanghelyo.

Sumala sa Espiritu sa Tagna, ang tagsulat sa ikaupat nga ebanghelyo mao si Juan, “ang tinon-an nga gihigugma ni Jesus.” Usa siya sa tulo ka tinon-an nga nakasaksi sa himaya ni Cristo didto sa bukid sa pagkausab sa dagway ug sa Iyang pag-antus sa tanaman diha-diha dayon sa wala pa Siya dakpa. Ang iyang kinabuhi maoy talagsaong ehemplo nga nagpakita kon sa unsang paagi ang gahum sa Dios bug-os nga makapausab sa usa ka “anak sa dalugdog” ngadto sa usa ka tawo nga mahigugmaong disposisyon ug lawom nga espirituhanong pagsabot.

“Si Juan midutdot kang Cristo sama sa paras nga mikapot sa halangdong haligi. Tungod sa iyang Agalon iyang gisagubang ang mga katalagman sa hukmanan ug nagpabilin duol sa krus, ug sa mga balita nga si Cristo nabanhaw, siya midali ngadto sa lubnganan, diha sa iyang kadasig iyang giunahan bisan ang madasigon nga si Pedro.

“Ang masaligon nga gugma ug dili hakog nga debosyon nga gipakita sa kinabuhi ug kinaiya ni Juan nagpresentar ug mga leksyon nga dili matukib nga bili ngadto sa Cristohanong iglesia. Si Juan wala sa natural makabaton sa mahigugmaon nga kinaiya nga napadayag diha sa iyang ulahi nga kasinatian. Sa kinaiya aduna siyay seryoso nga mga depekto. Siya dili lamang mapahitas-on, presentado sa kaugalingon, ug ambisyoso alang sa kadunggan, kon dili mainiton, ug masuk-anon ubos sa kadaut. Siya ug ang iyang igsoong lalaki gitawag ug ‘mga anak sa dalugdog.’ Dautan ug taras, ang tinguha alang sa pagpanimalos, ang espiritu sa pagpanaway, ang tanan anaa sa hinigugma nga tinon-an. Apan ilalum niining tanan ang diosnong Magtutudlo nakamatikod sa mainiton, sinsero, mahigugmaong kasing-kasing. Gibadlong ni Jesus kining pagpangita sa kaugalingon, nagpakyas sa iyang mga ambisyon, nagsulay sa iyang pagtoo. Apan Siya nagpadayag ngadto kaniya nianang gipangandoy sa iyang kalag—ang katahum sa pagkabalaan, ang makapabag-o nga gahum sa gugma.” — *The Acts of the Apostles*, pp. 539, 540.

Ang tanang karaang pagbulot-an nag-ingon nga ang ebanghelyo ni Juan gisulat sa Efeso sa A. D. 90 o mas sayo pa. Ang tinon-an gisulod sa usa ka kawa nga nagbukal nga lana ug nakalingkawas sa kamatayon sa usa ka milagrosong paagi, ug pagkahuman gilabug ngadto sa isla sa Patmos (Bugna 1:9). Didto iyang gisulat ang Pinadayag. Ang pagsaka ni Nerva ngadto sa trono (A. D. 96) naghimo nga posible alang kaniya sa pagbalik ngadto sa Efeso, diin gituohan nga siya nagpadayon sa pagpuyo hangtud sa iyang kamatayon sa panahon sa paghari ni Trajan (A. D. 98–117).

Hinaut nga ang Espiritu ni Cristo magagiya sa atong mga pagtuon niini nga tremestre, ug magtandog sa atong mga kasingkasing sa pagtubag sa Iyang gugma!

Ang Departamento sa Skwela Sabatika sa Konperencia Heneral

Unang Sabado nga Halad

Sabado, Enero 4, 2025



Multipurpose Center alang sa Panglawas ug Edukasyon sa Paraguay

Ang Republika sa Paraguay usa ka nasirado sa yuta nga nasud sa South America, diin kini giutlanan sa Argentina, Bolivia, ug Brazil. Ang populasyon sa palibot 6.1 milyon nga mga lumulupyo, 96.1% kanila nag-angkon sa Kristiyanismo (88.3% Katolisismo ug 7.8% nga ubang Kristiyanong tinuohan); 2.6% nag-angkon nga walay relihiyon, ug ang nahibilin sa ubang mga relihiyon o wala gitino. Ang nasudnong ekonomiya gibase sa panguna sa agrikultura—ilabi na sa soybeans—ug sa miaging 50 ka tuig, ang Paraguay nakaugmad usab ug dakung industriya sa hydroelectric power.

Ang unang mga membro sa SDA Reform Movement miabot dinhi gikan sa Hungary sa katuigang 1940 ug ang buluhaton miuswag pa sa katuigan sa 1950 pinaagi sa colporteur nga ministeryo ug sa ulahi sa katuigang 1970 pinaagi sa medikal nga misyonaryo nga buhat. Karon kita adunay usa ka talagsaon nga grupo sa matitud-anon nga mga membro sa nag-unang mga ciudad.

Sulod sa daghang mga tuig kami adunay usa ka natural nga sentro sa kahimsog nga naglihok sa kapital nga ciudad sa Asunción, nga nakapahimo kanamo sa pagpahat sa ebanghelyo sa daghang kalag ug sa pagtudlo sa estilo sa kinabuhi sa nahibilin nga katawhan sa Dios. Uban sa tabang sa Dios ug sa among daghan ug nahibaloan nga grupo sa mga propesyonal, kami naglaum nga buhion ang klinika—apan karon aron kini molihok isip pagkab-ot sa ciudad, nga adunay pagpalapad sa kabanikanhan aron sa pagtuman sa sugo sa Dios: “Pahawa sa mga ciudad. Tukora ang inyong mga sanitarium, inyong mga eskwelahan, ug mga opisina nga layo sa mga sentro sa populasyon.”—*Selected Messages*, bk. 2, p. 357.

Uban niini nga panglantaw diha sa hunahuna, kita nakaangkon ug usa ka luna sa yuta sa usa ka angayan kabanikanhan nga dapit sa departamento sa Paraguari, mga 66 ka kilometro (41 ka milya) gikan sa kaulohan. Naa na kami simbahan ug balay alang sa magbubuhat diha sa maong propedad, apan kini mao lamang ang sinugdanan. Ang tumong mao ang pagtukod ug daghang kagamitan nga buhatan (multifunctional center) nga adunay panguna nga sentro sa maayong panglawas, eskwelahan sa simbahan, kapilya, ug pasilidad alang sa pagpalambo sa pagsuporta sa kaugalingong patigayon sa mahimsog nga pagkaon.

Among gihangyo ang pagkamanggihatagon sa among tibook kalibutang mga igsoon sa pagtabang kanamo dad-on kini nga tumong sa katumanan. Ang imong paglambigit makahimo niini nga posible sa paghatag ug bag-ong kusog sa katapusang hugna nga gikinahanglan aron makompleto ang proyekto. Kita nagasalig sa gahum ug kahibulongang gracia sa Dios ug nakasigurado nga panalanginan sa Ginoo ang mga paningkamot sa atong komunidad sa tibook nga kalibutan sa paghatag gahum ug pagpalapad sa pagpangwali niining bahina sa Iyang ubasan.

Ang inyong mga kaigsoonan gikan sa Paraguayan Field

Ang Ebanghelyo Sumala kang Juan

SAG-ULOHON NGA BERSEKULO: “Ug ang Pulong nahimong unod, ug nagpuyo ipon kanato ug atong nakita ang iyang himaya, himaya ingon nga sa bugtong Anak gikan sa Amahan, puno sa gracia ug sa kamatuoran” (Juan 1:14).

Gisugyot nga Basahon: *Patriarchs and Prophets*, pp. 44–51, 111–116.

“Gikan sa tibook eternidad si Cristo nahiusa uban sa Amahan, ug sa dihang Iyang gisagup sa Iyang kaugalingon ang tawhanong kinaiya, Siya sa gihapon usa uban sa Dios.”—*Selected Messages*, bk. 1, p. 228.

1. SI JESUS, USA UBAN SA AMAHAN

Domingo, Decembre 29

- a. Unsa may gipahayag sa Pulong sa Dios mahitungod kang Jesus sa wala pa ang Iyang pagpakatawo? Juan 1:1, 2.

“Gikan sa mga adlaw sa eternidad ang Ginoo nga si Jesu Cristo usa uban sa Amahan; Siya ‘ang larawan sa Dios,’ ang larawan sa Iyang pagka-gamhanan ug pagka-halangdon, ‘ang nagsidlak sa Iyang himaya.’ Aron sa pagpakita niini nga himaya Siya mianhi sa atong kalibutan. Nganhi niining nangitngitan sa sala nga yuta Siya mianhi aron sa pagpadayag sa kahayag sa gugma sa Dios—aron nga mahimong ‘ang Dios uban kanato.’ ”—*The Desire of Ages*, p. 19.

“Si Cristo, ang Pulong, ang bugtong anak sa Dios, maoy usa sa walay katapusang Amahan—usa sa kinaiyahan, sa kinaiya, sa katuyoan—ang bugtong persona nga makahimo sa pagsulod ngadto sa tanang mga tambag ug mga katuyoan sa Dios.”—*Patriarchs and Prophets*, p. 34.

- b. Giunsa pagtagad sa Amahan ug sa mga manolonda si Jesus? Salmo 45:6; Isaias 9:6; Hebreohanon 1:3, 6–8.

“Ang mga manolonda maoy mga ministro sa Dios, nagdan-ag sa kahayag nga nagdagayday kanunay gikan sa Iyang presensya ug nagadali sa paspas nga pako sa pagtuman sa Iyang kabubut-on. Apan ang Anak, ang dinihogan sa Dios, ang ‘dayag nga larawan sa Iyang persona,’ ‘ang kahayag sa Iyang himaya,’ ‘nagakupot sa tanang mga butang pinaagi sa pulong sa Iyang gahum,’ maoy labaw kanilang tanan.”—*Ibid.*

- a. Kinsa man ang naglalang sa tanang mga butang? Juan 1:3, 10; Colosas 1:15- 17; Hebreohanon 1:2.

“Si Cristo mao ang nagbuklad sa mga langit, ug nagbutang sa mga patukoranan sa yuta. Ang Iyang kamot mao ang nagbitay sa mga kalibutan diha sa kawangan, ug naghan-ay sa mga bulak sa uma. ‘Ang iyang kusog nagpalig-on sa kabukiran.’ ‘Ang dagat Iya, ug Siya ang nagbuhat niini.’ Salmo 65:6; 95:5. Siya mao ang nagpuno sa yuta sa katahum, ug ang hangin uban sa awit. Ug sa ibabaw sa tanan nga mga butang sa yuta, ug sa hangin, ug langit, Iyang gisulat ang mensahe sa gugma sa Amahan.”—*The Desire of Ages*, p. 20.

- b. Ihulagway ang paagi diin gilalang ang kalibutan ug ang uniberso. Salmo 33:6, 9; 104:1–6.

“Ang Dios misulti, ug ang Iyang mga pulong milalang sa Iyang mga buhat diha sa natural nga kalibutan. Ang linalang sa Dios maoy usa lamang ka pundohan sa mga kagamitan nga giandam alang Kaniya aron magamit dayon sa pagbuhat sa Iyang kahimut-an.”— *The SDA Bible Commentary* [E. G. White Comments], vol. 1, p. 1081.

“Samtang ang yuta migula gikan sa kamot sa iyang Magbubuhay, kini hilabihan gayud ka matahum. Ang nawong niini nagkadaiya uban sa mga bukid, mga bungtod, ug mga patag, gitaliwad-an sa halangdon nga mga suba ug matahum nga mga lanaw; apan ang mga bungtod ug kabukiran dili titip ug gansangon, nga daghan kaayo sa mga bakilid ug makahahadlok nga mga bung-aw, ingon sa anaa karon; ang hait, gansang-gansangon nga mga ngilit sa yuta ang batoon nga gambalay nga gilubong ilalum sa mabungahong yuta, nga bisan asa nagpatungag labong nga pagtubo sa mga lunhaw. Walay mangil-ad nga kalamakan o umaw nga mga desyerto. Matahum nga mga kahoy ug nindot nga mga kabulakan motagbo sa mata sa bisan diin. Ang mga kahitas-an gikoronahan ug mga kahoy mas halangdon kay sa bisan unsa nga anaa karon. Ang hangin, nga wala mahugawi sa mabaho nga inalisngaw, tin-aw ug makapahimsog. Ang tibook talan-awon milabaw sa katahum sa giadornohan nga mga nataran sa labing garboso nga palasyo. Ang panon sa mga manolonda mitan-aw sa talan-awon uban sa kalipay, ug nagmaya sa kahibulongang mga buhat sa Dios.”—*Patriarchs and Prophets*, p. 44.

“Ang Biblia wala mag-ila ug taas nga mga katuigan diin ang yuta hinayhinay nga milambo gikan sa kagubot. Sa matag sunodsunod nga adlaw sa paglalang, ang sagradong talaan nagpahayag nga kini naglangkob sa gabii ug sa buntag, sama sa uban nga mga adlaw nga misunod. Sa pagtapos sa matag adlaw gihtag ang resulta sa buhat sa Maglalalang.”—*Ibid.*, p. 112.

- a. Kinsa man ang Tigpasiugda sa tanang kinabuhi ug kahayag—ug sa unsa nga kini makahatag kaayohan kanato? Juan 1:4-9; Buhat 17:28.

“Si [Cristo] mao ang nagsulti pinaagi sa matag-usa nga sa tanang katuigan nagpahayag sa pulong sa Dios nganhi sa tawo. Kaniya ang tanang pagkahanas nga napakita diha sa dagko ug halangdon nga mga kalag sa yuta mga nagpahayag lamang.”—*Education*, p. 73.

“Si Cristo mao ang ‘Kahayag, nga nagadan-ag sa matag tawo nga motungha nganhi sa kalibutan.’ Juan 1:9. Ingon nga pinaagi kang Cristo ang matag tawhanong binuhat adunay kinabuhi, mao usab pinaagi Kaniya ang matag kalag nagadawat ug sidlak sa diosnong kahayag.”—*Ibid.*, p. 29.

“Ang gahum sa Dios gigamit gihapon diha sa pagtuboy sa mga butang nga Iyang linalang. Dili tungod kay ang mekanismo gipahalona diha sa paglihok magpadayon sa paglihok pinaagi sa iyang kaugalingong nadawat nga kusog nga ang pulso nagapitik, ug ang gininhawa nagasunod sa ginhawa. Ang matag gininhawa, ang matag pitik sa kasingkasing, maoy ebidensya sa pag-atiman Niya nga kang kinsa kita nagpuyo ug naglihok ug adunay atong pagkatawo. Gikan sa pinakagamay nga insekto nganhi sa tawo, ang matag buhing linalang adlaw-adlaw nagsalig diha sa Iyang probidensya. . . .

“Ang dakong gahum nga naglihok diha sa tibook kinaiyahan ug nagpaluyo sa tanang mga butang dili, ingon sa giangkong sa pipila ka mga tawo sa siyensya, usa lamang ka nagapabilin nga prinsipyo, usa ka nagapalihok nga enerhiya. Ang Dios espiritu; apan Siya usa ka persona, tungod kay ang tawo gibuhat sa Iyang dagway. Ingon nga usa ka persona, ang Dios nagpadayag sa Iyang kaugalingon diha sa Iyang Anak.”—*Ibid.*, p. 131.

- b. Unsa ang gisulti ni Jesus mahitungod sa Iyang kaugalingon? Juan 9:5; 8:12; 3:19; 12:46.

“Diha sa mga pulong, ‘Ako mao ang kahayag sa kalibutan,’ si Jesus mipahayag sa Iyang kaugalingon ang Mesias. Ang tigulang nga si Simeon . . . namulong mahitungod Kaniya ingon ‘nga kahayag aron sa pagdan-ag sa mga Gentil, ug ang himaya sa Imong katawhan nga Israel.’ Lucas 2:32. Niini nga mga pulong iyang gipadapat ngadto Kaniya ang usa ka tagna nga hinasa sa tibook Israel. Pinaagi ni propeta Isaias, ang Balaang Espiritu mipahayag, ‘Magaan ra kaayo nga butanga nga ikaw mahimong akong alagad aron sa pagbangon sa mga banay ni Jacob, ug sa pagpabalik sa salin sa Israel: ako usab ikaw nga ihatag nga usa ka suga alang sa mga Gentil, aron ikaw mamahimo nga akong kaluwasan hangtud sa kinatumyan sa yuta.’ Isaias 49:6, R.V. Kini nga tagna kasagarang gisabot ingon nga gisulti bahin sa Mesias, ug sa dihang si Jesus miingon, ‘Ako mao ang kahayag sa kalibutan,’ ang mga tawo dili gayud mapakyas sa pag-ila sa Iyang pag-angkon nga mao ang Usa nga Gisaad.”—*The Desire of Ages*, p. 465.

- a. Unsa may gitagna ni Isaias mahitungod sa ngalan ni Cristo? Isaias 7:14. Kanus-a man kini nga tagna natuman? Mateo 1:22, 23.

“Sanglit si Jesus mianhi aron sa pagpuyo uban kanato, kita nahibalo nga ang Dios nasayud sa atong mga pagsulay, ug nalooy sa atong mga kagulan. Ang matag anak nga lalake ug babaye ni Adan mahimong makasabut nga ang atong Maglalalang higala sa mga makasasala. Tungod kay sa matag doktrina sa gracia, matag saad sa kalipay, matag buhat sa gugma, matag balaanong pagdani nga gipresentar diha sa kinabuhi sa Manluluwas dinhi sa yuta, atong makita ang ‘Dios uban kanato.’”—*The Desire of Ages*, p. 24.

- b. Unsa ang gibuhay ni Jesus aron sa pagkab-ut kanato diha sa atong nahulog nga kahimtang? Juan 1:14; Filipos 2:5–8; Hebreohanon 2:14–18.

“Aron kita makasinati sa Iyang balaang kinaiya ug kinabuhi, gikuha ni Cristo ang atong kinaiyahan ug mipuyo uban kanato. Ang pagkadiosnon gipadayag diha sa tawo; ang dili makita nga himaya diha sa makita nga dagway sa tawo. Ang mga tawo makakat-on nianang wala mailhi pinaagi nianang nailhan; ang langitnong mga butang gipadayag pinaagi sa yutan-on; ang Dios napadayag diha sa dagway sa mga tawo.”—*Christ’s Object Lessons*, p. 17.

“Ang Anak sa Dios giatake sa matag lakang pinaagi sa mga gahum sa kangitngit. Human sa Iyang bautismo giabug Siya sa Espiritu ngadto sa kamingawan, ug miantus sa tentasyon sulod sa kap-atan ka mga adlaw. . . . Kon Siya dili usa ka umalambit sa atong kinaiyahan, dili unta Siya tentalon sama sa tawo. Kon dili pa posible nga Siya motugyan sa tentasyon, dili Siya mahimong atong katabang. Maoy usa ka solemne nga kamatuoran nga si Cristo mianhi aron makig-away sa mga gubat ingon nga tawo, alang sa tawo. Ang iyang tentasyon ug kadaugan nagsulti kanato nga ang tawo kinahanglan mokopya sa Sumbanan; ang tawo kinahanglang mahimong umalambit sa diosnong kinaiya.”—*The SDA Bible Commentary* [E. G. White Comments], vol. 5, p. 1082.

“Aron matabonan ang Iyang himaya ingon nga anak sa usa ka nahulog nga kaliwat, kini mao ang labing bug-at nga disiplina diin ang Prinsipe sa kinabuhi makapasakup sa Iyang kaugalingon. Sa ingon Iyang gisukod ang Iyang kusog uban nianang kang Satanas. Siya nga gipapahawa gikan sa langit nakig-away nga minghoy alang sa pagdaug sa Usa nga iyang gikasinahan didto sa mga korte sa itaas. Pagkadakong gubat kini! Walay pinulongan nga paigo sa paghulagway niini. Apan sa duol nga umaabot kini masabtan pinaagi sa mga makadaug pinaagi sa dugo sa Cordero ug sa pulong sa ilang pagpamatuod.”—*Ibid.*, pp. 1081, 1082.

- a. Unsa may gianhi ni Jesus nga buhaton alang sa tawo? Juan 3:16, 17; 1:12; Lucas 19:10.

“Si Cristo gitratar ingon nga angay kanato, aron kita pagatrataron ingon sa angay Kaniya. Siya gihukman tungod sa atong mga sala, diin Siya walay bahin, aron nga kita pagamatarungon pinaagi sa iyang pagkamatarung, diin kita walay bahin. Iyang giantus ang kamatayon nga ato, aron kita makadawat sa kinabuhi nga Iya. ‘Pinaagi sa Iyang mga labod kita nangaayo.’”—*The Desire of Ages*, p. 25.

- b. Sa unsang paagi kita gipasig-uli pinaagi sa sakripisyo ni Cristo? Galacia 4:5–7; Hebreohanon 2:10.

“Si Cristo mihimo ug usa ka bug-os ug hingpit nga sakripisyo, usa ka sakripisyo nga igo sa pagluwas sa matag anak nga lalake ug babaye ni Adan kinsa kinahanglan magpakita ug paghinulsol ngadto sa Dios tungod sa paglapas sa Iyang balaod, ug nagpakita sa pagtoo diha sa atong Ginoong Jesu Cristo. . . . Si Cristo mao ang Kapitan sa atong kaluwasan, ug pinaagi sa Iyang mga pag-antus ug sakripisyo Iyang gihatag ang panig-ingnan sa tanan sa iyang mga sumusunod nga ang pagtukaw ug pag-ampo, ug ang malahutayon nga paningkamot, gikinahanglan diha sa ilang bahin kon sila magrepresentar sa husto sa gugma nga mipuyo diha sa Iyang sabakan alang sa nahulog nga kaliwat.”—*Testimonies for the Church*, vol. 2, p. 664.

“Gihigugma sa Dios ang Iyang masinulondon nga mga anak. Siya adunay gingharian nga giandam, dili alang sa dili maunongon nga mga sakop, kon dili alang sa Iyang mga anak nga Iyang gisulayan ug gitestingan sa kalibutan nga nadaut ug nadunot sa sala. Isip masinulondon nga mga anak, kita adunay pribilehiyo sa pakipag-relasyon sa Dios. ‘Kon mga anak,’ Siya miingon, ‘nan mga manununod’ ngadto sa usa ka dili mawala nga kabilin. . . . Si Cristo ug ang Iyang katawhan usa ra.”—*The SDA Bible Commentary* [E. G. White Comments], vol. 6, p. 1077.

PERSONAL SUBLI NGA MGA PANGUTANA

1. Unsang kinaiyahan ang nabatonan ni Jesus sukad sa eternidad?
2. Kinsa ang nagbuklad sa mga langit ug nagbutang sa mga patukoranan sa yuta?
3. Kang kinsa nagagikan ang tanang tinuod nga kahayag?
4. Unsay tawag kang Jesus diha sa Isaias 7:14?
5. Unsa man ang nahitabo kang Jesus sa dihang nagbaton sa atong tawhanong kinaiya?

Ang Cordero sa Dios

SAG-ULOHON NGA BERSEKULO: “Siya gidaugdaug, apan sa diha nga siya gisakit, wala niya bukha ang iyang baba; ingon sa usa ka nating carnero nga ginadala ngadto sa ihawan, ug ingon sa usa ka carnero nga naamang sa atubangan sa iyang mga maggugunting, mao usab wala niya bukha ang iyang baba” (Isaias 53:7).

Gisugyot nga Basahon: *The Desire of Ages*, pp. 132–143.

“Ipatumong ang mga mata sa mahinulsulon nga makasasala diha sa Cordero sa Dios, nga nagkuha sa sala sa kalibutan.” —*The Faith I Live By*, p. 107.

1. ANG PAMATUOD NI JUAN BAUTISTA

Domingo, Enero 5

a. Unsay gipahayag ni Juan Bautista mahitungod kang Jesus? Juan 1:15-18.

b. Giunsa ni Juan pagpaila ang iyang kaugalingon ngadto sa relihiyoso nga mga lider? Juan 1:19-23. Unsang tagna ang iyang gituman —ug unsaon nato ang pagdugtong ngadto niini? Isaias 40:3-5.

“Sa matag yugto sa kasaysayan sa yuta ang Dios adunay Iyang mga ahensya aron sa pagduso sa Iyang buhat, nga kinahanglan buhaton diha sa Iyang natudlo nga paagi. Si Juan Bautista adunay usa ka pinasahi nga bulohaton, nga alang niini siya natawo ug nga niini siya gitudlo—ang buhat sa pag-andam sa dalan sa Ginoo. . . .

“[Ang iyang ministryo sa kamingawan] maoy usa ka labing tukma, literal nga katumanan sa tagna.” —*The Southern Watchman*, March 21, 1905.

“Ang Ginoo mihatag [kang Juan Bautista] sa iyang mensahe. Miadto ba siya sa mga sacerdote ug mga pangulo ug nangutana kon mahimo ba niyang imantala kini nga mensahe? — Wala, ang Dios nagbutang kaniya bulag gikan kanila aron dili siya mainpluwensyahan sa ilang espiritu ug pagtudlo. Siya mao ang tingog sa usa nga nagsinggit didto sa kamingawan, [Isaias 40:3–5 gikutlo]. Mao kini ang mensahe nga kinahanglan ihatag ngadto sa atong katawhan; kita haduol na sa katapusan sa panahon, ug ang mensahe mao, Hawani ang dalan sa Hari; kuhaa ang mga bato; ipataas ang usa ka sumbanan alang sa katawhan. Ang katawhan kinahanglan nga pukawon. Dili na karon ang panahon sa pagsinggit ug pakigdait ug kasigurohan.” —*Selected Messages*, bk. 1, p. 410.

- a. Sa dihang si Jesus miduol ngadto kang Juan aron magpabautismo, giunsa ni Juan pag-ila Siya ug pagpamatuod sa Iyang misyon ngadto sa publiko? Juan 1:29, 34. Unsang tagna ang natuman niini? Isaias 53:4-7.

“Si Cristo mao ang Manunubos sa tawo sa sinugdanan sa kalibutan ingon sa karon. Sa wala pa Niya gibistihan ang Iyang pagka-Dios uban sa pagkatawhanon ug mianhi sa atong kalibutan, ang mensahe sa ebanghelyo gihatag ni Adan, ni Seth, ni Enoch, ni Methuselah, ug ni Noe. Si Abraham sa Canaan ug si Lot didto sa Sodoma nagdala sa mensahe, ug gikan sa kaliwatan ngadto sa kaliwatan ang matinumang mga mensahero nagmantala sa Usa nga moabutay. Ang mga seremonyas sa ekonomiya sa mga Judeo gimugna ni Cristo mismo sa Iyang kaugalingon. Siya ang pundasyon sa ilang sistema sa mga halad nga sakripisyo, ang dakung anti-tepo sa tanan nilang relihiyosong serbisyo. Ang dugo nga giula samtang ang mga halad nga gihalad nagtudlo ngadto sa sakripisyo sa Cordero sa Dios. Ang tanan nga tipikal nga mga halad natuman diha Kaniya.”—*Christ’s Object Lessons*, p. 126.

- b. Giunsa ni Juan pagpaila si Jesus ngadto sa iyang mga tinon-an? Juan 1:35, 36. Unsay epekto sa iyang mga pulong diha kanila—ug unsay sunod nga nahitabo sa iyang kaugalingong kinabuhi? Juan 1:37.

“Sa misunod nga adlaw [human sa bautismo ni Cristo], samtang duha ka mga tinon-an nagtindog sa duol, si Juan nakakita na usab kang Jesus taliwala sa mga tawo. Ang nawong sa propeta nadan-agan pag-usab sa himaya gikan sa Dili Makita, samtang siya misinggit, ‘Tan-awa ang Cordero sa Dios!’ Ang mga pulong nakapaukyab sa mga kasingkasing sa mga tinon-an. Wala nila sa hingpit masabti sila. Unsay kahulogan sa ngalan nga gihatag ni Juan ngadto Kaniya— ‘ang Cordero sa Dios’? Si Juan mismo wala magsaysay niini. Gibiyaan nila si Juan, miadto sila sa pagpangita kang Jesus.”—*The Desire of Ages*, p. 138.

“Gipahibalo ni Juan ang iyang mga tinon-an nga si Jesus mao ang gisaad nga Mesias, ang Manluluwas sa kalibutan. Samtang naghinapos ang iyang buluhaton, iyang gitudloan ang iyang mga tinon-an sa pagtan-aw kang Jesus, ug magsunod Kaniya ingon nga Dakong Magtutudlo. Ang kinabuhi ni Juan masulub-on ug madumilion sa kaugalingon. Iyang gipahibalo ang unang pag-anhi ni Cristo, apan wala tugoti nga makasaksi sa Iyang mga milagro, ug pagpahimulos sa gahum nga gipakita Niya. Sa diha nga si Jesus kinahanglan nga magtukod sa Iyang kaugalingon ingon nga usa ka magtutudlo, si Juan nahibalo nga siya sa iyang kaugalingon kinahanglang mamatay. Ang iyang tingog panagsa ra madungog, gawas didto sa kamingawan. Ang iyang kinabuhi nag-inusara. Wala siya moipon sa pamilya sa iyang amahan, sa pagpahimulos sa ilang katilingban, apan gibiyaan sila aron matuman ang iyang misyon.”—*Early Writings*, p. 154.

- a. Kinsa ang pipila sa unang mga tinon-an ni Jesus? Mateo 4:18, 21. Unsang interes diha kang Cristo ang ilang gipakita ug unsa ka dugay ang ilang unang pakigtambo uban Kaniya? Juan 1:38, 39.

“Usa sa duha [nga misunod kang Jesus] mao si Andres, ang igsoon ni Simon; ang usa mao si Juan nga ebanghelista. Kini ang unang mga tinon-an ni Cristo. Gitandog sa dili-mapugngang kadasig, sila misunod kang Jesus—matinguhaon sa pagsulti uban Kaniya, apan nahingangha ug mahilom, nawala sa hilabihan nga kamahinungdanon sa hunahuna, ‘Kini ba ang Mesias?’

“Si Jesus nahibalo nga ang mga tinon-an nagsunod Kaniya. Sila ang una nga mga bunga sa Iyang ministryo, ug dihay kalipay sa kasingkasing sa diosnong Magtutudlo samtang kini nga mga kalag misanong sa Iyang gracia. Apan milingi, Siya nangutana lamang, ‘Unsa may inyong gipangita?’ Iya silang gipasagdan nga gawasnon sa pagbalik o sa pagsulti sa ilang tinguha.

“Usa ra ka katuyoan ang ilang naamgohan. Usa ka presensya mipuno sa ilang panghunahuna. Sila mipahayag, ‘Rabbi, . . . asa Ka nagpuyo?’ Diha sa mubo nga pakighinabi sa daplin sa dalan dili nila madawat kanang ilang gitinguha. Nangandoy nga makig-uban kang Jesus nga sila ra, nga molingkod diha sa Iyang tiilan, ug maminaw sa Iyang mga pulong. . . .

“Kon si Juan ug Andres nakabaton pa sa dili matinuohon nga espiritu sa mga sacerdote ug mga magmamando, dili unta sila makaplagan nga mga magtututon sa tiilan ni Jesus. Moduol unta sila Kaniya ingon nga mga kritiko, aron sa paghukom sa Iyang mga pulong. Daghan ang sa ingon nagsira sa pultahan sa labing bililhon nga mga kahigayonan. Apan dili ingon niana kining unang mga tinon-an. Sila mitubag sa tawag sa Balaang Espiritu diha sa pagwali ni Juan Bautista. Karon ilang naila ang tingog sa langitnong Magtutudlo. Alang kanila ang mga pulong ni Jesus puno sa ka fresko ug kamatuoran ug katahum. Ang usa ka balaan nga kahayag gipadan-ag diha sa pagtudlo sa mga Kasulatan sa Daang Tugon. Ang daghang bahin sa mga tema sa kamatuoran mibarug diha sa bag-o nga kahayag.”—*The Desire of Ages*, pp. 138, 139.

- b. Unsa ang gibuhat sa unang mga tinon-an sa wala madugay human mahimamat si Jesus? Juan 1:41, 42.

“Si Andres nagtinguha sa paghatag sa kalipay nga mipuno sa iyang kasingkasing. Milakaw aron sa pagpangita sa iyang igsoon nga si Simon, siya misinggit, ‘Among nakaplagan ang Mesias.’ Si Simon wala na magpaabut ug ikaduha nga tawag. Siya usab nakadungog sa pagwali ni Juan Bautista, ug siya midali ngadto sa Manluluwas.”—*Ibid.*, p. 139.

- a. Ihubit unsay nahitabo sa dihang si Jesus nag-inbita sa sunod nga tinon-an aron mosunod Kaniya. Juan 1:43-45.

“Si Felipe misunod sa mando, ug dihadhiha dayon siya usab nahimong usa ka magbubuhat alang kang Cristo. Si Felipe mitawag kang Natanael.”—*The Desire of Ages*, p. 139.

- b. Unsay atong makat-onan gikan sa paagi nga nakahimo kang Cristo sa pagdaug sa pag-ukon-ukon ni Natanael? Juan 1:46-49.

“Samtang si Natanael mitan-aw kang Jesus, siya nabalo. Kini bang tawhana, nga nagdala sa mga timaan sa kahago ug kakabus, mao ang Mesias? Apan si Natanael dili makadesisyon sa pagsalikway kang Jesus, tungod kay ang mensahe ni Juan nagdala ug konbiksyon sa iyang kasingkasing.

“Sa panahon nga si Felipe nagtawag kaniya, si Natanael miadto sa usa ka hilom nga kakahoyan aron sa pagpamalandong sa pagpahibalo ni Juan ug sa mga tagna mahitungod sa Mesias. Siya nag-ampo nga kon ang gipahibalo ni Juan mao ang manluluwas, kini mahimo nga ipahibalo kaniya, ug ang Espiritu Santo mokonsad diha kaniya uban sa kasigurohan nga ang Dios miduaw sa Iyang katawhan ug nagpatindog ug usa ka sungay sa kaluwasan alang kanila. . . .

“ ‘Si Jesus mitubag ug miingon ngadto kaniya, Sa wala pa si Felipe magtawag kanimo, sa dihang didto ka sa ilalum sa kahoyng higera, nakita ko na ikaw.’

“Paigo na. Ang balaang Espiritu nga nagpamatuod ngadto kang Natanael diha sa iyang nag-inusarang pag-ampo ilalum sa kahoyng higera karon misulti kaniya diha sa mga pulong ni Jesus. Bisag nagduhaduha, ug mitugyan sa pag-ayad, si Natanael miduol kang Cristo uban sa usa ka matinuoran nga tinguha alang sa kamatuoran, ug karon ang iyang tinguha gitagbo. Ang iyang pagtoo milabaw pa nianang sa usa nga midala kaniya ngadto kang Jesus. Siya mitubag ug miingon, ‘Rabbi, Ikaw mao ang Anak sa Dios; Ikaw mao ang Hari sa Israel.’

“Kon si Natanael misalig pa sa mga rabbi alang sa paggiya, dili gayud niya makaplagnan si Jesus. Pinaagi sa pagkakita ug paghukom sa iyang kaugalingon nga siya nahimong tinon-an. Busa sa kahimtang sa daghan karon diin ang pag-ayad nagpugong gikan sa maayo. Daw unsa ka lahi gayud ang resulta kon sila ‘moanhi ug makakita’!

“Samtang sila misalig sa giya sa tawhanong katungod, walay makadangat ngadto sa usa ka makaluwas nga kahibalo sa kamatuoran. Sama kang Natanael, kinahanglan natong tun-an ang pulong sa Dios alang sa atong kaugalingon, ug mag-ampo alang sa paglamdag sa Balaang Espiritu. Siya nga nakakita kang Natanael ilalum sa kahoyng higera makakita kanato diha sa sekreto nga dapit sa pag-ampo. Ang mga manolonda gikan sa kalibutan sa kahayag haduol niadtong kinsa diha sa pagpaubos nangita sa diosnong paggiya.”—*Ibid.*, pp. 139–141.

- a. Unsay gisaad ni Cristo kang Natanael - ug ngano? Juan 1:50, 51.

“[Juan 1:50, 51 gikutlo.] Dinhi si Cristo sa tinud-anay nag-ingon, Sa tampi sa Jordan ang kalangitan naablihan, ug ang Espiritu mikunsad sa ibabaw kanako sama sa usa ka salampati. Kadto nga talan-awon usa ka timaan nga Ako mao ang Anak sa Dios. Kon ikaw motoo Kanako ingon nga mao, ang imong pagtoo mapabuhi. Imong makita nga ang mga langit naablihan, ug dili na gayud pagasirhan. Akong giablihan sila nganha kanimo. Ang mga manolonda sa Dios nagakayab, nga nagadala sa mga pag-ampo sa mga nanginahanglan ug naguol ngadto sa Amahan sa itaas, ug nagakanaug, nga nagadala ug panalangin ug paglaum, kadasig, tabang, ug kinabuhi, ngadto sa mga anak sa mga tawo.”—*The Desire of Ages*, pp. 142, 143.

- b. Unsay mahitabo kon atong dawaton si Cristo? Juan 4:14; Bugna 22:17.

“Sa dihang ang usa magadawat sa kamatuoran diha sa gugma niini, iyang maipakita kini diha sa pagka-madanihon sa iyang paggawi ug sa tono sa iyang tingog. Siya magapahibalo nianang iyang nadungog, nakita, ug magkupert sa pulong sa kinabuhi, aron ang uban makabaton ug pakig-ambitay uban kaniya pinaagi sa kahibalo ni Cristo. Ang iyang pagpamatuod, gikan sa mga ngabil nga natandog uban sa usa ka buhi nga baga gikan sa halaran, maoy kamatuoran alang ngadto sa madawaton nga kasingkasing, ug magabuhat sa pagbalaan diha sa kinaiya. . . .

“Ang Dios makahimo sa pagkab-ut sa Iyang tumong sa pagluwas sa mga makasasala nga wala ang atong tabang; apan aron kita makaugmad ug kinaiya nga sama kang Cristo, kita kinahanglang makig-ambit sa Iyang buhat. Aron makasulod ngadto sa Iyang kalipay—ang kalipay sa pagkakita sa mga kalag nga natubos pinaagi sa Iyang sakripisyo—kinahanglang nga kita moapil sa Iyang mga bulohaton alang sa ilang katubsanan.”—*Ibid.*, p. 142.

PERSONAL SUBLI NGA MGA PANGUTANA

Biernes, Enero 10

1. Ngano nga si Juan Bautista gitawag ngadto sa kamingawan?
2. Unsaon nato sa pag-aplikar ang pagkinabuhi ni Juan dinhi sa atong kaugalingon?
3. Unsay atong makat-onan gikan kang Juan ug Andres sa dihang ilang nahimamat si Jesus?
4. Sa unsang paagi nga kita mapadasig pinaagi sa unang pagpahayag ni Natanael?
5. Unsay magpadayag kon tinuod ba o dili ang akong pagtoo diha kang Cristo?

Ang Kasal sa Cana

SAG-ULOHON NGA BERSEKULO: “Bisan unsa ang iyang igaingon kaninyo, buhaton ninyo” (Juan 2:5, katapusang bahin).

Gisugyot nga mga Basahon: *The Desire of Ages*, pp. 144–153;
Messages to Young People, pp. 403–418.

“Si Jesus misugod sa buhat sa repormasyon pinaagi sa pagduol ngadto sa suod nga pagsimpatiya uban sa tawo.”—*The Desire of Ages*, p. 150.

1. ANG PAGSUGOD SA MINISTERYO NI CRISTO

Domingo, Enero 12

a. Diin man si Jesus magsugod sa Iyang ministeryo dinhi sa yuta? Juan 2:1, 2.

“Si Jesus wala magsugod sa Iyang ministeryo pinaagi sa pipila ka dagkong buhat atubangan sa Sanhedrin sa Jerusalem. Diha sa usa ka panagkatigom sa panimalay sa usa ka gamayng balangay sa Galilea ang iyang gahum gigamit aron sa pagdugang sa kalipay sa kombira sa kasal. Sa ingon Iyang gipakita ang Iyang simpatiya sa mga tawo, ug ang Iyang tinguha sa pag-alagad sa ilang kalipay. Diha sa kamingawan sa tentasyon Siya sa Iyang kaugalingon nakainom sa kopa sa kaalaut. Siya mianhi aron sa paghatag ngadto sa mga tawo sa kopa sa panalangin, pinaagi sa Iyang panalangin sa pagbalaan sa mga relasyon sa tawhanong kinabuhi.”—*The Desire of Ages*, p. 144.

b. Unsay nahitabo sa hapit na matapos ang kombira sa kasal? Juan 2:3.

“Si [Maria] nangandoy nga [si Jesus] magpamatuod ngadto sa pundok nga Siya mao gayud ang Pinasidunggan sa Dios. Naglaum siya nga adunay kahigayonan alang Kaniya sa pagbuhat ug milagro sa ilang atubangan.

“Maoy nabatasan sa mga panahon nga ang mga selebrasyon sa kaminyoon magpadayon sa pipila ka mga adlaw. Niini nga okasyon, sa wala pa matapos ang kombira nakaplagan nga ang suplay sa bino nakulangan na. Kini nga pagkadiskobre nakahatag ug dako nga kahasol ug pagmahay. Kini diili naandan nga wala bino diha sa mga okasyon sa kombiora, ug ang pagkawala niini daw nagpaila sa usa ka kakulang sa pagkamaabiabihon.”—*Ibid.*, pp. 145, 146.

- a. Unsay gisulti sa inahan ni Cristo, ug unsa may Iyang tubag? Juan 2:3, 4.

“[Gikutlo ang Juan 2:4.] Kini nga tubag, nga alang kanato daw kalit, wala magpahayag ug kabugnaw o pagka-walay pagtahud. Ang porma sa Manluluwas sa pagtawag ngadto sa Iyang inahan nahiuyon sa kostumbre sa Sidlakan. Kini gigamit ngadto sa mga tawo kang kinsa kini gitinguha sa pagpakita ug pagtahud. Ang matag buhat ni Cristo sa yutan-ong kinabuhi nahiuyon sa sugo nga Iyang gihatag, ‘Tahuron mo ang imong amahan ug imong inahan.’ Exodo 20:12. Didto sa krus, sa Iyang katapusang buhat sa kalooy ngadto sa Iyang inahan, si Jesus misulti pag-usab kaniya sa samang paagi, samtang Iyang gitugyan siya ngadto sa pag-atiman sa Iyang labing hinigugma nga tinon-an. Pareho didto sa kombira sa kasal ug diha sa krus, ang gugma nga gipahayag diha sa tono ug tinan-awan ug gawi naghubad sa Iyang mga pulong.”— *The Desire of Ages*, p. 146”

- b. Unsa ang gisulti sa inahan ni Cristo ngadto sa mga sulugoon—ug sa unsa nga paagi nga kini nga mga pulong aplikado usab kanato karon? Juan 2:5.

“Ang mga sumosunod [ni Cristo] kinahanglan nga mahimong mas labi pa nga usa ka dakong gahum sa pagmantala sa kamatuoran samtang sila nagkaduol ngadto sa kahingpitan sa pagtoo ug sa gugma alang sa ilang mga igsoon. Ang Dios naghatag ug balaang tabang alang sa tanang mga emerhensya diin ang atong tawhanon nga tinubdan dili paigo. Siya magahatag sa Balaang Espiritu aron sa pagtabang sa matag kalisdanan, sa paglig-on sa atong paglaum ug kasigurohan, aron sa pagdan-ag sa atong mga hunahuna ug pagputli sa atong mga kasingkasing. Siya nagpasabot nga ang paigo nga mga pasilidad itagana alang sa pagbuhat sa iyang mga plano. Giawhag ko kamo pangayo ug tambag gikan sa Dios. Pangitaa Siya uban sa tibook kasingkasing, ug ‘bisan unsa ang Iyang ginasulti nganha kaninyo, buhata.’ Juan 2:5.”— *Testimonies for the Church*, vol. 6, pp. 414, 415.

- c. Unsay gisulti ni Jesus nga buhaton sa sulugoon didto sa kasal? Juan 2:6–8.

“Sa kilid sa pultahan nagbarog ang unom ka dagkong bato nga tadyaw sa tubig, ug si Jesus misugo sa mga sulugoon nga punoon kini sa tubig. Ug nahimo kadto. Unya sa diha nga ang bino gikinahanglan alang sa dihadiha nga paggamit, Siya miingon, ‘Pagkuha na karon, ug dad-a ngadto sa gobernador sa kombira.’ Imbes tubig ang gisulod sa mga sudlanan, didto miagas ang bino.”— *The Desire of Ages*, p. 148.

- a. Sa dihang ang bino gisilbi na, giunsa sa gobernador sa kombira pagtubag? Juan 2:9, 10.
-

“Ang nangulo sa kombira ni ang mga dinapit sa kinatibuk-an wala makamatikod nga nahutdan ug bino. Sa dihang nakatilaw niadtong gidala sa mga sulogoon, ang nangulo nakakaplag niini nga mas labaw kay sa tanan nga iyang nainom kanhi, ug lahi ra kaayo niadtong gisilbi diha sa pagsugod sa kombira.”—*The Desire of Ages*, p. 148.

- b. Unsang matang sa bino ang gitagana ni Cristo? Isaias 65:8.
-

“Ang bino nga gitagana ni Cristo alang sa kombira, ug kadtong Iyang gihatag ngadto sa mga tinon-an ingon nga simbolo sa Iyang kaugalingong dugo, mao ang lunsay nga duga sa ubas. Niini ang manalagna nga si Isaias nagtumong sa dihang siya naghigot bahin sa bag-ong bino ‘diha sa pungpong,’ ug nagaingon, ‘Ayaw kini paglaglaga; kay ang usa ka panalangin anaa niini.’ Isaias 65:8 . . .

“Ang bino nga dili makahubog nga Iyang gitagana alang sa mga dinapit sa kasal maoy usa ka maayo ug makapalagsik nga ilimnon. Ang epekto niini mao ang pagdala sa lami ngadto sa kaharmoniya sa usa ka makapahimsog nga gana.”—*Ibid.*, p. 149.

- c. Unsa ang giingon sa Kasulatan bahin sa bino nga gipaaslom? Proverbio 20:1; 23:29–35.
-

“Si Cristo mao ang diha sa Daang Tugon naghatag ug pasidaan ngadto sa Israel, ‘Ang bino usa ka tigtamay, ang maisug nga ilimnon mao ang sabaan: ug bisan kinsa nga masayop tungod niini dili maalamon.’ Proverbio 20:1. Ug Siya sa Iyang kaugalingon wala maghatag ug ingon niana nga ilimnon. Si Satanas nagtintal sa mga tawo sa pagpatuyang nga mahimong magpagabon sa kaisipan ug magpabinhud sa espirituhanong mga pagpanabut, apan si Cristo nagtudlo kanato sa pagdala sa ubos nga kinaiyahan ngadto sa pagpasakop. Ang iyang tibook kinabuhi maoy usa ka ehemplo sa pagdumili sa kaugalingon. Aron sa pagbungkag sa gahum sa gana, Siya miantus alang kanato sa labing grabe nga pagsulay nga antuson sa tawo. Si Cristo mao ang nagmando nga si Juan Bautista kinahanglan nga dili moinom ug bino o maisog nga ilimnon. Siya mao ang nagmando sa sulosama nga pagpugong diha sa asawa ni Manoa. Ug Siya nagpahayag nga usa ka tunglo sa tawo nga magbutang sa botelya sa mga ngabil sa iyang silingan. Si Cristo wala mosupak sa Iyang kaugalingong pagtulon-an.”—*Ibid.*

- a. Unsang mga tumong ang nakab-ut pinaagi sa presensya ni Cristo ug sa Iyang milagro diha sa kombira sa kasal, bisan alang kanato karon? Juan 2:11.

“Si Cristo nahibalo sa tanang butang; Siya nagatan-aw paubos sa mga katuigan nganhi sa atong panahon, ug nakita kon unsa ang kahimtang sa sosyedad dinhi sa pagtapos sa kasaysayan sa kalibutan. Iyang nakita ang libo ka mga linibo ang nangamatay diha sa paggamit sa bino ug isog nga ilimnon. Ang kalibutan anam-anam nga midangat ngadto sa sama nga kahimtang ingon sa nahitabo sa mga adlaw sa wala pa ang lunop. Apan ang langit nag-isa sa usa ka makatalagmanon nga ilhanan, aron nga ang mga tawo makabaton ug pasidaan, nga ang mga tawo makadawat sa pasidaan, ug mokooperar sa Dios alang sa ilang kaugalingon nga pagpreserbar. Naghatag siya kanato ug mga ehemplo sa hingpit nga paglikay, ug naghatag pahimangno nga, kon sundon, moresulta sa paghimo ug pagpreserbar sa kusog, kahanas, ug kahalangdon sa atong mga anak.”—*The Signs of the Times*, April 16, 1896.

- b. Ihubit ang makapalagsik nga matang sa kinaiya nga gipakita ni Cristo sa tibook Niyang pag-ministeryo. Mateo 11:29.

“Gisugdan ni Jesus ang buhat sa repormasyon pinaagi sa pagduol sa suod nga simpatiya uban sa katawhan. Samtang Siya nagpakita sa labing dako nga pagtahud sa balaod sa Dios, Iyang gibadlong ang nagpakaaron-ingnon nga pagkadiosnon sa mga Fariseo, ug misulay sa pagpalingkawas sa mga tawo gikan sa walay hinungdan nga mga lagda nga naggapus kanila. Iyang gitinguha ang pagguba sa mga babag nga nagbulag sa lainlaing klase sa katilingban, aron nga Iyang matigom ang mga tawo ingon nga mga anak sa usa ka pamilya. Ang iyang pagtambong sa kombira sa kasal gidesinyo aron mahimong usa ka lakang ngadto sa paghimo niini.”—*The Desire of Ages*, p. 150.

“Gibadlong ni Jesus ang pagpatuyang sa kaugalingon sa tanang matang niini, apan Siya makigsandurot sa Iyang kinaiya. Gidawat niya ang pagkamaabiabihon sa tanan nga klase, nagabisita sa mga balay sa adunahan ug kabus, ang makinaadmanon ug ang walay alamag, ug nagtinguha sa pagpataas sa ilang mga hunahuna gikan sa mga pangutana sa ordinaryo nga kinabuhi ngadto niadtong mga butanga nga espirituhanon ug walay katapusan. Wala siya naghatag ug katugotan sa pagpatuyang sa kalingawan, ug walay landong sa kalibutanong kabuangan ang nakadaut sa Iyang paggawi; bisan pa niana Siya nakakaplag ug kalipay diha sa mga talan-awon sa inosente nga kalipayan, ug pinaagi sa Iyang presensya mitugot sa katilingbanon panagtapok. Ang kaminyoon sa mga Judeo maoy usa ka mabulokon nga okasyon, ug ang kalipay niini dili makapasilo sa Anak sa tawo. Pinaagi sa pagtambong niini nga kombira, gipasidunggan ni Jesus ang kaminyoon ingon nga usa ka balaanon nga tinukod.”— *Ibid.*, pp. 150, 151.

- a. Unsay atong makat-onan gikan sa panig-ingnan ni Cristo nga nagpaila Kaniya nga lahi sa relihiyoso nga mga pangulo sa Iyang kaadlawan? Proverbio 18:24.

“Ang ministeryo ni Cristo maoy usa ka klaro nga katugbang nianang sa mga pangulo sa Judeo. Ang ilang pagtagad sa tradisyon ug pormalismo nagdaut sa tanang matuod nga kagawasan sa hunahuna ug buhat. Sila nabuhi diha sa makanunayon nga kahadlok nga mahugawan. Aron sa paglikay nga makatandog sa ‘mahugaw,’ sila kanunay magpalain, dili lamang gikan sa mga Gentil, kon dili gikan sa kadaghanan sa ilang kaugalingon nga katawhan, sa dili pagtinguha sa pagtabang kanila ni sa pagpakighigala kanila. Pinaagi sa kanunay nga pagpabilin dinhi niining mga butanga, ilang napa-inano ang ilang mga hunahuna ug nagpa-piut sa agianan sa ilang mga kinabuhi. Ang ilang panig-ingnan nagdasig sa pagpasigarbo sa kaugalingon ug pagkadili maki-sanduroton sa tanang matang sa mga tawo.”—*The Desire of Ages*, p. 150.

- b. Unsa gyud ang atong tumong diha sa tanang sosyal nga interaksyon? Proverbio 11:30.

“Mapakita nato ang usa ka libo gamay nga pagtagad diha sa mahigalaon nga mga pulong ug makapahimuot nga tinan-awan, nga maipakita pag-usab dinhi kanato. Ang dili mahunahunaon nga mga Cristohanon maipakita pinaagi sa ilang pagpasibaya sa uban nga sila wala mahiusa uban kang Cristo. Imposible nga mahiusa kang Cristo apan dili mabination ngadto sa uban ug malimot sa ilang mga katungod.

“Kinahanglan kitang tanan mahimong mga saksi alang kang Jesus. Sosyal nga gahum, nga nabalaan pinaagi sa gracia ni Cristo, kinahanglan pauswagon diha sa pagdani sa mga kalag ngadto sa Manluluwas. Himoa nga ang kalibutan makakita nga kita wala natugob sa atong kaugalingong mga interes, kon dili nga kita nagtinguha sa uban sa pagpakig-ambit sa atong mga panalangin ug mga pribilehiyo. Ipakita kanila nga ang atong relihiyon wala maghimo kanato nga dili mabination o mapig-uton. Kinahanglan nga ang tanan nga nag-angkon nga nakakaplag kang Cristo magapangalagad sama sa Iyang gibuhad alang sa kaayohan sa mga tawo. Dili gayud nato ihatag sa kalibutan ang sayop nga impresyon nga ang mga Cristohanon usa ka masulub-on, dili malipayon nga mga tawo.”—*The Adventist Home*, p. 428.

PERSONAL SUBLI NGA MGA PANGUTANA

1. Ihulagway ang espirituhanong mga bunga nga nadala pinaagi sa milagro ni Cristo didto sa Cana.
2. Ihulagway ang relasyon tali ni Cristo ug sa Iyang inahan.
3. Nganong nagpakitag kahibulong ang nagdumala sa kombira?
4. Unsang matanga sa bino ang haom nga nagsimbolo sa dugo ni Cristo?
5. Diha sa sosyal nga mga pagtipon, unsay angay natong mahinumdoman gikan sa panig-ingnan ni Jesus?

Si Jesus didto sa Templo

SAG-ULOHON NGA BERSEKULO: “Apan si Jehova ania sa iyang balaan nga templo: pahiluma sa atubangan niya ang tibook nga kalibutan” (Habakkuk 2:20).

Gisugyot nga Basahon: *Testimonies for the Church*, vol. 5, pp. 491–500.

“Ang mga dapit sa simbahan kinahanglan nga hatagan ug usa ka sagrado nga pag-tahud.”—*Testimonies for the Church*, vol. 5, p. 494.

1. ANG TEMPLO NAHUGAWAN

Domingo, Enero 19

- a. Ihubit ang kahimtang nga nangibabaw didto sa templo sa Jerusalem diha sa sinugdanan sa publiko nga pag ministryo ni Cristo. Juan 2:13, 14.

“Ang matag Judeo kinahanglang mobayad kada tuig ug tunga sa siklo ingon nga ‘usa ka lukat alang sa iyang kalag.’ . . . Gawas pa niini, daku nga kantidad ang gida-la isip mga halad nga kinabubut-on, nga ideposito diha sa panudlanan sa templo. Ug gikinahanglan nga ang tanan nga langyaw nga sensilyo kinahanglan nga ilisan alang sa usa ka sensilyo nga gitawag nga siklo sa templo, nga maoy gidawat alang sa pag-alagad sa santuaryo. Ang pag-ilis sa kuwarta naghatag ug kahigayonan sa pagpanglimbong ug pagpangilkil, ug kini nahimong makauulaw nga pamatigay-on, nga maoy tinubdan sa kita sa mga sacerdote.

“Ang mga nagbaligya nagpangayo ug subra kaayo nga presyo sa mga hayop nga gibaligya, ug sila nakigbahin sa ilang ganansya sa mga sacerdote ug mga punoan, nga sa ingon nagpadato sa ilang kaugalingon sa gasto sa mga tawo.”—*The Desire of Ages*, p. 155.

- b. Sa unsang paagi nga kini nakaapekto sa mga serbisyo sa templo? Ezekiel 22:26 (katapusang bahin).

“Daghang mga halad ang gihalad sa panahon sa pasko, ug ang mga halin sa templo daku kaayo. Ang misangpot nga kaguliyang nagpaila sa usa ka saba nga merkado sa baka kay sa sagrado nga templo sa Dios. Adunay madungog nga grabe nga paghinangyoay, ang pag-inga sa mga baka, ang pag-ungol sa mga carnero, ang huni sa mga salampati, nga sinagolan sa kinagilkil sa sensilyo ug masuk-anon nga panaglalis. Hilabihan ka daku kaayo ang kaguliyang nga ang mga magsisimba nasamok, ug ang mga pulong nga gitumong ngadto sa Labing Hataas natabonan sa kaguliyang nga misulong sa templo.”—*Ibid.*

- a. Giunsa pagtagad sa Dios ang dapit diin Iyang igapakita ang Iyang presensya — ug unsa ang Iyang una nga mando didto sa Bukid Sinai? Exodus 3:1-5; 19:12, 13.
-

“Sa dihang ang Ginoo mikanaug diha sa Bukid sa Sinai, ang dapit nakonsekrar pinaagi sa Iyang presensya. . . Sa ingon gitudlo ang leksyon nga kon asa gani ang Dios magapakita sa Iyang presensya, ang maong dapit balaan.”—*The Desire of Ages*, pp. 155, 156.

- b. Giunsa ni Cristo pagtagad ngadto sa pagpasipala sa templo? Juan 2:15, 16.
-

“Samtang si Jesus misulod sa templo, Iyang nakita ang tibook talan-awon. Nakita Niya ang dili patas nga mga transaksyon. Iyang nakita ang kagulangan sa mga kabus, kinsa naghunahuna nga kon walay pagpaagas sa dugo walay kapasayloan sa ilang mga sala. Nakita niya ang gawas nga sawang sa Iyang templo nahimo nga usa ka dapit sa dili balaan nga patigayon. Ang sagradong lawak nahimong usa ka daku nga pagbinayloay.”—*Ibid.*, p. 157.

“Sa hinayhinay mikanaog sa mga ang-ang, ug miisa sa panglatos nga mga pisi nga natipon sa pagsulod sa kural, Siya mimando sa negosyante nga pundok sa paghawa gikan sa presinto sa templo. Uban sa kadasig ug kabangis nga wala pa sukad Niya mapakita, Iyang gipanglintuwad ang mga lamesa sa mga tigbaylo ug salapi. Ang mga sensilyo nangahulog, kusog nga nagtagingting sa marmol nga salog. Walay usa nga nangahas sa pagkwestyon sa Iyang katungod. Walay nangahas sa pagpahunong aron sa paghipos sa ilang ginansya nga nakuha sa dili maayo nga paagi. Si Jesus wala maghampak kanila sa latigo nga pisi, apan diha sa Iyang kamot kanang yano nga latos daw makalilisang ingon sa usa ka nagdilaab nga espada. Ang mga opisyal sa templo, ang mga nagtan-aw nga mga sacerdote, mga tigbaligya ug mga baka, uban sa ilang mga carnero ug mga baka, midalagan gikan sa dapit, uban sa usa ka hunahuna sa pag-ikyay gikan sa pagkondenar sa Iyang presensya.”—*Ibid.*, p. 158.

- c. Unsa may kahulogan sa buhat ni Cristo sa pagputli sa templo? Malaquias 3:1-3.
-

“Ang mga sawang sa templo sa Jerusalem, napuno sa kasamok sa dili balaang patigayon, nagrepresentar sa tanan usab sa tinuod nga templo sa kasingkasing, nga nahugawan sa maulagon nga pagbati ug dili balaan nga mga hunahuna. Sa paglimpyo sa templo gikan sa mga pumapalit ug mga tigbaligya sa kalibutan, gipahibalo ni Jesus ang Iyang misyon sa paglimpyo sa kasingkasing gikan sa kahugawan sa sala—gikan sa yutan-ong mga tinguha, sa hakog nga mga pangibog, ang dautang mga pagginawi, nga nagadunot sa kalag.”—*Ibid.*, p. 161.

- a. Unsa man ang orihinal nga katuyoan sa Dios diha sa pagtukod sa Iyang santuaryo taliwala sa Iyang katawhan? Exodus 25:8.

“Kana nga templo, nga gitukod alang sa puloy-anan sa diosnong Presensya, gi-disenyo nga mahimong usa ka tumong nga leksyon alang sa Israel ug alang sa ka-libutan. Gikan sa walay katapusan nga mga katuigan maoy katuyoan sa Dios nga ang matag binuhad, gikan sa masanag ug balaan nga serapenis nganhi sa tawo, kinahanglan nga mahimong usa ka templo alang sa puloy-anan sa Maglalalang.”—*The Desire of Ages*, p. 161.

- b. Ngano nga ang mga magtutuo gitawag ingon nga templo sa Dios—ug unsa-on nato sa kinasingkasing pagmentinar ang pagkabalaan niini nga templo? 1 Corinto 3:16, 17; Isaias 57:15.

“Tungod sa sala, ang tawo nahunong sa pagkahimong templo sa Dios. Nangitngitan ug nahugawan sa kadautan, ang kasingkasing sa tawo wala na magpaday-ag sa himaya sa Diosnong Usa. Apan pinaagi sa pagpakatawo sa Anak sa Dios, ang katuyoan sa Langit natuman. Ang Dios mopuyo diha sa tawo, ug pinaagi sa makaluwas nga grasya ang kasingkasing sa tawo nahimo na usab nga Iyang templo.”—*Ibid.*

“Kon kita nagtoo nga ang katapusan sa tanan nga mga butang haduol na, ‘pag-kakinahanglanon gayud diay nga magkinabuhi kamo sa pagkabalaan ug pagka-diosnon?’

“Ang matag kalag nga tinuod nga nagtoo sa kamatuoran adunay katugbang nga mga buhat. Ang tanan mahimong matinguhaon ug solemne, ug dili kapuyon sa ilang mga paningkamot sa pagdaug ug mga kalag ngadto kang Cristo. Kon ang kamatuoran una natanom nga lawom sa ilang kaugalingon nga mga kalag, unya sila maninguha sa pagtanom niini diha sa mga kasingkasing sa uban. Ang kamatuoran gitipigan sa kinatibuk-an diha sa gawas nga sawang. Dad-a kini ngadto sa sulod nga templo sa kalag, ibutang kini sa trono sa kasingkasing, ug tugoti kini nga magdumala sa kinabuhi. Ang pulong sa Dios kinahanglan nga tun-an ug tumanon, unya ang kasingkasing makakaplag ug pahulay ug kalinaw ug kalipay, ug ang mga pangandoy mopadulong sa langit; apan kon ang kamatuoran wala tipigi diha sa kinabuhi, diha sa gawas nga sawang, ang kasingkasing dili mapainit sa nagdilaab nga kalayo sa pagkamaayo sa Dios.

“Ang relihiyon ni Jesus, sa kadaghanan, gitagana alang sa piho nga mga adlaw, o piho nga mga okasyon, ug sa ubang mga panahon gipadaplin ug gipasagdan. Ang nagapabilin nga prinsipyo sa kamatuoran dili lamang sa pipila ka oras sa Igpapahulay, o alang sa pipila ka mga buhat sa gugma, apan kini dad-on ngadto sa kasingkasing, magaputli ug magabalaan sa kinaiya.”—*Testimonies for the Church*, vol. 5, p. 547.

- a. Unsa may dapat natong masabtan mahitungod sa atong walay mahimo nga kahimtang diha sa pagtinguha sa pagputli sa templo? Jeremias 2:22; Job 14:4.
-

“Walay tawo nga sa iyang kaugalingon makapagawas sa dautan nga panon nga nagpuyo sa kasingkasing.”—*The Desire of Ages*, p. 161.

- b. Unsa may sekreto aron makahimo sa pagbarug atubangan sa usa ka balaan nga Dios uban sa nahinloan nga kasingkasing? Ezekiel 36:25-27; Zacarias 3:3-5.
-

“Si Jacob nakasala sa usa ka daku nga sala sa iyang paggawi ngadto kang Esau; apan siya naghinulsol. Ang iyang kalapasan gipasaylo, ug ang iyang sala nahinloan; busa siya nakalahutay sa pagpadayag sa presensya sa Dios. Apan bisan asa ang mga tawo moduol sa atubangan sa Dios samtang tinuyo nga nahigugma sa dautan, sila malaglag. Sa ikaduhang pag-anhi ni Cristo ang mga dautan pagaut-uton ‘uban sa Espiritu sa Iyang baba,’ ug gilaglag ‘uban sa kahayag sa Iyang pag-abot.’ 2 Tesalonica 2:8. Ang kahayag sa himaya sa Dios, nga nagbahin sa kinabuhi sa mga matarung, mopatay sa mga dautan.

“Sa panahon ni Juan Bautista, si Cristo hapit na magpakita ingon nga tigpadayag sa kinaiya sa Dios. Ang iyang presensya mismo mopadayag ngadto sa mga tawo sa ilang sala. Sa diha lamang nga sila andam nga mahinloan gikan sa sala nga mahimo sila makasulod ngadto sa pakig-ambitay uban Kaniya. Ang putli ug kasingkasing lamang ang makapabilin diha sa Iyang presensya.”—*Ibid.*, p. 108.

“Si Cristo lamang ang makalimpyo sa templo sa kalag. Apan dili Siya mopugos sa pagsulod. Siya dili mosulod sa kasingkasing ingon sa templo kaniadto; apan Siya miingon, ‘Tan-awa, nagatindog Ako sa pultahan, ug nagatuktok: kon adunay magapatalinghug sa Akong tingog, ug moabli sa pultahan, mosulod ako kaniya.’ Pinadayag 3:20. Moabot siya, dili sa usa ka adlaw lamang; kay Siya nagaingon, ‘Ako magapuyo diha kanila, ug magalakaw diha kanila; . . . ug sila mahimong Akong katawhan.’ ‘Siya magabuntog sa atong mga kasal-anan; ug Imong isalibay ang tanan nilang kasal-anan ngadto sa kahiladman sa dagat.’ 2 Corinto 6:16; Miqueas 7:19. Ang iyang presensya molimpyo ug mobalaan sa kalag, aron nga kini mahimong usa ka balaan nga templo alang sa Ginoo, ug ‘usa ka puloy-anan sa Dios pinaagi sa Espiritu.’ Efeso 2:21, 22.”—*Ibid.*, pp. 161, 162.

“Samtang si Jesus nag-alagad sa sanctuaryo sa itaas, Siya sa gihapon pinaagi sa Iyang Espiritu ang ministro sa iglesia dinhi sa yuta.”—*Ibid.*, p. 166.

- a. Sa unsang paagi nga ang Dios maghimo sa mga pangulo sa Iyang katawhan nga may tulubagon sa pag-makugihon sa patunhay sa kasagrado sa Iyang balay? Habakuk 2:20; Ezequiel 44:23.

“Ang presinto sa templo sa Dios angay untang tagdon nga sagrado. Apan diha sa panaglalis alang sa ganansya, kining tanan nawala sa panan-aw.

“Ang mga sacerdote ug mga pangulo gitawag aron mahimong mga representante sa Dios ngadto sa nasud; ila untang gisaway ang mga pag-abuso sa sawang sa templo. Sila unta ang naghatag sa mga tawo ug panig-ingnan sa kaligdong ug pag-kamabination.”—*The Desire of Ages*, p. 156.

“Tinuod kaayo nga ang pagtahud sa balay sa Dios nahimong hapit na mawala. Ang sagrado nga mga butang ug mga dapit wala na ilha; ang balaan ug tinuboy wala gitagad. . . . Ang Dios naghatag ug mga lagda sa kahusay, hingpit ug tukma, ngadto sa iyang karaang katawhan. Nausab ba ang Iyang kinaiya? Dili ba Siya ang daku ug gamhanang Dios nga nagmando sa langit sa mga langit? Dili ba maayo alang kanato nga kanunay kita magbasa sa mga direksyon nga gihatag sa Dios sa Iyang kaugalingon ngadto sa mga Hebreohanon, aron nga kita nga adunay kahayag sa mahimayaong kamatuoran nga nagdan-ag kanato mahimong makasundog sa ilang pagtahud sa balay sa Dios?”—*Testimonies for the Church*, vol. 5, pp. 495, 496.

- b. Isaysay ang gikinahanglan nga kadaugan nga pagabatonan diha sa kusog ni Cristo. Mateo 5:8; 1 Juan 3:1–3.

“Ako nanawagan sa matag usa nga nag-angkon nga anak sa Dios nga dili gayud makalimot niining daku nga kamatuoran, nga kita nagkinahanglan sa Espiritu sa Dios sa sulod nato aron makaabut sa langit, ug ang buhat ni Cristo sa gawas nato aron sa paghatag kanato ug usa ka titulo sa walay kamatayon nga panulondon.”—*Testimonies to Ministers*, p. 442.

PERSONAL SUBLI NGA MGA PANGUTANA

Bienes, Enero 24

1. Kinsa ang mga pangulo sa dili matarung nga patigayon didto sa templo?
2. Unsa gyud ang angay nga gawi sa kang bisan kinsa nga moduol sa atubangan sa Dios?
3. Isaysay ang mabatonan nga espirituwal nga kahulogan diha sa templo sa Jerusalem.
4. Unsay gipahayag ni Cristo diha sa paghinlo sa templo?
5. Sa unsang paagi lamang mahinloan ang atong masalaypon tawhanon nga kasingkasing?

Unang Sabado nga Halad

Sabado, Pebrero 1, 2025



Tabang sa Kalamidad sa Kalibutan

Wala'y pangutana nga ang mga gubat, mga hungihong sa mga gubat, makalilisang nga mga aksidente, hulaw, baha, bagyo, linog, sunog, ug mga kamatay nagadugang sa bug-os nga kalibutan nga hilabihan ka paspas—tanang katumanan sa mga tagna sa Biblia nga atong ginatun-an. Sigurado, niining tanan nga trahedy, klaro nga masabtan nato ang mga tikang sa nagkaduol nga Dios. Liboan ang nag-antus pag-ayo niining grabeng mga kalisdanan, nanawagan sa nagkalain-laing matang sa tabang gikan sa mga ambassador ni Jesu Cristo sa paggamit sa makapaayo nga balsamo sa Gilead.

Niining masakit nga mga kalisdanan, ang GC Welfare Department mipaambit sa mga panalangin nga gihatag gikan sa atong pundo pinaagi sa mga halad nga inyong gipadala, sa atong mga kaigsoonan sa tibuok kalibutan. Gipadala kini usa ka personal ug piho nga paagi aron matubag ang mga panginahanglanon, ingon man pinaagi sa Unang Sabado nga mga Halad. Minahal nga mga kaigsoonan, ang imong mga halad makahatag ingon nga kapasilonan niadtong nawad-an sa ilang mga pamilya sa natural nga trahedy; nakahatag sila ug pagkaon alang sa gatasan ka mga pamilya ug pag-atiman para sa mga ilo ug bala, nga nagpaabot sa pagkaon ug tabang ngadto kanila. Kini nga mga halad nakatabang usab sa mga ginikanan sa pagkuha ug mga liso sa pagtanom ug pagpakaon sa ilang mga pamilya o pagsugod sa usa ka gamay nga negosyo aron dili maihap nga mga tawo sa atong pagtoo mahimong adunay tinubdan sa kita ug trabaho nga dili gayud mahimo nila.

Salamat sa Dios nga niining panahon sa pagsulay, daghan ang natandog sa pagbutang sa ilang mga donasyon sa halaran sa Ginoo. Sa ngalan sa mga naserbisyohan, daku among pasalamat!

Bisan pa niini, ang mga panginahanglan wala mohunong - sa kasukwahi, sila nagkadaghan matag adlaw, busa ang imong pagkamanggihatagon makatabang gayud kaayo.

“Ang krus ni Cristo naghangyo sa pagkamaayo sa matag sumusunod sa bulahan nga Manluluwas. Ang prinsipyo nga gihulagway didto mao ang paghatag, paghatag. Kini, nga gihimo sa aktuwal nga pagkamaayo ug maayong mga buhat, mao ang tinuod nga bunga sa Cristohanong kinabuhi.”—*Counsels on Stewardship*, p. 14.

Karong adlaw, sa imong paghalad sa imong pinasahi nga halad alang sa unang Sabado, palihug buhata ang imong labing maayo sa pagpasidungog sa Dios. Bisan gamay o daghan, ang tanan makahimo sa ilang labing maayo. Gikan sa sumada niini nga gipaambit nga gugma, magpadayon kami sa pag-apud-apod sa mga panalangin ngadto sa atong mga kaigsoonan sa tibuok kalibutan. “Siya nga nagahatag sa mga kabus nagpanalangin sa uban, ug gipanalanginan sa iyang kaugalingon sa mas daku pa nga sukod” (Ibid., p. 13). Hinaut ang Dios sa hilabihan magapanalangin kaninyo!

Welfare Department sa Konperencia Heneral

Si Jesus ug si Nicodemo

SAG-ULOHON NGA BERSEKULO: “Si Jesus mitubag ug miingon kaniya: Sa pagkamatuod, sa pagkamatuod, nagaingon ako kanimo, gawas kong ang tawo magapakatawo pag-usab, dili siya makakita sa gingharian sa Dios” (Juan 3:3).

Gisugyot nga Basahon: *Steps to Christ*, pp. 67–75.

“Ang tuboran sa kasingkasing kinahanglan nga mahinloan sa dili pa ang mga sapa mahimong putli. Siya nga naninguha sa pagkab-ut sa langit pinaagi sa iyang kaugalingon nga mga buhat diha sa pagbantay sa kasugoan nagasulay nianang usa ka dili gayud mahimo.”—*The Desire of Ages*, p. 172.

1. USA KA INILA NGA TAWO NANGITA KANG JESUS

Domingo, Enero 26

- a. Kinsa man si Nicodemo, ug giunsa siya pagtagad diha sa panan-aw sa mga tawo? Juan 3:1, 10.

“Si Nicodemo nagkupot ug usa ka taas nga posisyon sa pagsalig diha sa nasud nga Judeo. Siya edukado kaayo, ug nakabaton ug mga talento nga dili ordinaryo, ug siya usa ka pinasidunggan nga membro sa nasudnon nga konseho. . . . Bisan pa nga datu, makinaadmanon, ug pinasidunggan, siya sa hilabihan nadani sa mapaubsanon nga Nazareno.”—*The Desire of Ages*, p. 167.

“Siya usa ka strikto nga Fariseo, ug nagpagarbo sa iyang kaugalingon diha sa iyang maayong mga buhat. Siya sa hilabihan giila tungod sa iyang kaayo ug sa iyang pagkamahinatagon diha sa pagsustento sa serbisyo sa templo, ug siya nagabati nga sigurado sa kalooy sa Dios.”—*Ibid.*, p. 171.

- b. Diha sa unsang oras nga si Nicodemo miadto aron sa pagpakigkita kang Jesus? Juan 3:2 (unang bahin).

“Nasayud pinaagi sa pinasahi nga pagpangutana sa dapit pahulayan sa Manlu-luwas didto sa Bukid sa Olivo, siya naghulat hangtud nga ang ciudad hilom na diha sa pagkatulog, ug unya nangita Kaniya.”—*Ibid.*, p. 168.

- a. Unsay nagpakita sa matang sa pagpanabut ni Jesus diha sa pagdawat sa Iyang bisita diha sa ingon ka lawom na nga takna sa kagabhion? Salmo 31:20, 21.

“[Si Nicodemo] sa hilabihan nagtinguha gayud ug pagpakighinabi kang Jesus, apan naglikay sa pagpangita Kaniya sa dayag. Maoy usa ka makapaubos kaayo alang sa usa ka pangulo sa mga Judeo ang pagdawat sa iyang kaugalingon nga makigsimpatiya sa usa ka magtutudlo nga dili inila. Ug kon ang Iyang pagbisita mahibaloan sa Sanhedrin, mahimo siyang ilang tamayon ug yubiton. Siya midesisyon sa usa ka sekreto nga pakighinabi, nagpangulipas niini diha sa katarungan nga kon siya moadto sa dayag, ang uban mahimong mosunod sa iyang panig-ingnan.”—*The Desire of Ages*, p. 168.

- b. Ihulagway kon giunsa ni Nicodemo pagsugod ang iyang pakighinabi uban kang Jesus. Juan 3:2.

“Sa presensya ni Cristo, si Nicodemo mibati ug usa ka talagsaon nga pagkamaulawon, nga iyang gitinguha nga itago ilalum sa usa ka hangin sa pagka-kalmado ug dignidad. ‘Rabbi,’ siya miingon, ‘kami nahibalo nga Ikaw usa ka magtutudlo nga gikan sa Dios: tungod kay walay tawo ang makahimo niining mga milagro nga Imong gibuhat, gawas kon ang Dios uban kaniya.’ Pinaagi sa paghisgot sa talagsaong mga gasa ni Cristo isip magtutudlo, ug usab sa Iyang kahibulongang gahum sa paghimo ug mga milagro, siya naglaum sa paghimo ug dalan alang sa iyang pagpakighinabi. Ang iyang mga pulong gidisenyo sa pagpahayag ug pagdapit sa pagsalig; apan sila nagpahayag gayud ug pagkawalay pagtoo. Wala niya ilha nga si Jesus mao ang Mesias, kondili usa lamang ka magtutudlo nga gipadala gikan sa Dios.”—*Ibid.*

- c. Uban sa unsa nga konsepto nga si Cristo sa kalit nagsurprisa kang Nicodemo? Juan 3:3.

“Imbis nga ilhon kini nga pagtimbaya, gipunting ni Jesus ang Iyang mga mata ngadto sa mamumulong, nga daw nagbasa sa iyang kalag. Sa Iyang walay kinutuban nga kaalam nakita Niya sa Iyang atubangan ang usa nga nagpangita sa kamatuoran. Siya nasayud sa katuyoan niini nga pagbisita, ug uban sa tinguha sa pagpalawom sa konbiksyon nga anaa na sa hunahuna sa Iyang tigpaminaw, Siya midiretso na sa punto, nga nag-ingon sa ka solemne, apan mabination, ‘Sa pagkatinuod, sa pagkatinuod, Ako magaingon kanimo, gawas nga ang tawo igapanganak gikan sa itaas, dili siya makakita sa gingharian sa Dios.’ Juan 3:3, margin.

“Si Nicodemo miduol sa Ginoo nga naghunahuna sa pagsulod sa usa ka diskusyon uban Kaniya, apan gipadayag ni Jesus ang patukoranan nga mga prinsipyo sa kamatuoran.”—*Ibid.*, pp. 168–171.

- a. Giunsa ni Nicodemo pagtubag ang gisulti ni Cristo nga iyang gikinahanglan —ug sama kaniya, ngano nga kitang tanan nagkinahanglan sa bag-o nga pagkatawo nga kasinatian? Juan 3:4-8.

“Ang hulagway sa bag-ong pagkatawo, nga gigamit ni Jesus, dili sa hingpit nga wala mahibaloi ni Nicodemo. Ang mga nakabig gikan sa pagano ngadto sa pagtoo sa Israel sagad gitandi ngadto sa mga bata nga bag-o lang natawo. Busa siya mahimong nakaamgo nga ang mga pulong ni Cristo dili angay sabton sa literal nga pagsabot. Apan tungod sa iyang pagkahimugso isip usa ka Israelita iyang giila ang iyang kaugalingon nga sigurado na sa usa ka dapit sa gingharian sa Dios. Siya nagabati nga wala siya magkinahanglan ug pagbag-o. Busa natingala siya sa mga pulong sa Manluluwas. Nalain siya sa ilang suod nga aplikasyon alang sa iyang kaugalingon. Ang garbo sa Fariseo nakigbisug batok sa matinud-anon nga tinguha sa nangita ug kamatuoran. Siya nahibulong nga si Cristo misulti ngadto kaniya ingon sa Iyang gihimo, nga wala magrespito sa iyang posisyon ingon nga magmamando sa Israel.

“Nahibulong sa iyang kaugalingon nga pagkabutang, siya mitubag kang Cristo diha sa mga pulong nga puno sa kantalita, ‘Unsaon man pagkahimo nga igaanak ang tawo sa tigulang na siya?’ Sama sa daghang uban pa sa dihang ang nagaputol nga kamatuoran dalhon ngadto sa konsensya, iyang ipakita ang kamatuoran nga ang natural nga tawo dili modawat sa mga butang sa Espiritu sa Dios. Wala bisan unsa diha sa sulod niya ang modawat sa espirituhanong mga butang; tungod kay ang espirituhanon nga mga butang pagasabton pinaagi sa espirituhanon.

“Apan ang Manluluwas wala magtagbo sa argumento uban sa argumento. Nag-isa sa Iyang kamot uban sa solemne, hilom nga dignidad, Iyang giduot ang kamatuoran nga mosangko sa mas dako nga kasigurohan, ‘Sa pagkatinuod, sa pagkatinuod, magaingon ako kanimo, gawas nga ang tawo igapanganak sa tubig ug sa Espiritu, dili siya makasulod sa gingharian sa Dios.’”—*The Desire of Ages*, p. 171.

- b. Kanus-a ug sa unsang paagi nga ang usa ka indibiduwal matawo pag-usab? Juan 1:12, 13.

“‘Gihigugma pag-ayo sa Dios ang kalibutan, nga Iyang gihatag ang Iyang bugtong nga Anak,’ aron nga ang tawo mahimong mapasig-uli ngadto sa Dios. Pinaagi sa mga merito ni Cristo siya mahimong mabalik ngadto sa pagpakig-uyon uban sa iyang Magbubuhat. Ang iyang kasingkasing kinahanglan nga mabag-o pinaagi sa balaanon nga gracia; kinahanglan nga siya makabaton ug bag-ong kinabuhi gikan sa itaas. Kini nga kausaban mao ang bag-ong pagkatawo, nga kon wala kini, matud ni Jesus, ‘dili siya makakita sa gingharian sa Dios.’”—*The Great Controversy*, p. 467.

“Pinaagi [sa] yano nga buhat sa pagtoo sa Dios, ang Balaang Espiritu magahatag sa bag-ong kinabuhi sa imong kasingkasing. Ikaw sama sa usa ka bata nga natawo sa pamilya sa Dios, ug Siya nahigugma kanimo sama sa Iyang paghigugma sa Iyang Anak.”—*Steps to Christ*, p. 52.

- a. Unsay nagsimbolo sa paghinlo ug pagbag-o nga motungha uban ang bag-ong pagkatawo? Marcos 16:16 (unang bahin).

“Ang makakabig nga gahum sa Dios makahimo sa pag-usab sa napanunod ug naugmad nga mga kahiligan; tungod kay ang relihiyon ni Jesus nagatuboy. ‘Pag-pakatawo pag-usab’ nagkahulogan ug pagka-usab, usa ka bag-ong pagkatawo diha kang Cristo Jesus.”—*The Adventist Home*, p. 206.

“Gihimo ni Cristo ang bautismo nga timaan sa pagsulod ngadto sa Iyang espirituhanong gingharian. Gihimo Niya kini nga usa ka positibo nga kondisyon nga pagabuhaton sa tanan nga buot pagailhon nga anaa nailalum sa pagbulot-an sa Amahan, sa Anak, ug sa Espiritu Santo. Sa dili pa ang tawo makakaplag ug puloy-anan diha sa iglesia, sa dili pa moagi sa pultahan sa espirituhanon nga gingharian sa Dios, kinahanglan nga siya makadawat sa marka sa balaang ngalan, ‘Ang Ginoo ang atong Pagkamatarung.’ Jeremiah 23:6.

“Ang bautismo mao ang labing solemne nga pagsalikway sa kalibutan. Kadtong nabautismohan sa tulo ka pilo nga ngalan sa Amahan, sa Anak, ug sa Balaan Espiritu, diha gayud sa pagsugod sa ilang Cristohanong kinabuhi nagpahayag sa publiko nga ila nang gibiyaan ang pag-alagad kang Satanas ug nahimo na nga mga sakop sa harianong pamilya, mga anak sa langitnong Hari. Sila mituman sa sugo: ‘Gumula kamo sa ilang taliwala, ug magpalain kamo, . . . ug ayaw na paghikap sa mahugaw nga butang.’ Ug ngadto kanila natuman ang saad: ‘Ako modawat kaninyo, ug mahimong Amahan kaninyo, ug kamo mahimong Akong mga anak nga lalake ug babaye, nag-ingon ang Ginoo nga Labing Gamhanan.’ 2 Corinto 6:17, 18.”—*Testimonies for the Church*, vol. 6, p. 91.

- b. Unsa ang gipahayag mahitungod sa kadautan sa atong tawhanong kinaiya ug sa plano sa Dios sa pagbag-o kanato? Juan 3:6; Jeremias 17:9; Efeso 5:26, 27.

“Imposible alang kanato, sa atong kaugalingon, ang pag-ikyas gikan sa gahong sa sala diin kita naunlod. Ang atong mga kasingkasing dautan, ug dili nato kini mausab. . . . Ang edukasyon, kultura, paggamit sa kabubut-on, paningkamot sa tawo, ang tanan adunay ilang angay nga dapit, apan dinhi niini sila walay gahum. Mahimo silang makapakita ug gawasnon nga katarung sa pagginawi, apan dili sila mausab sa kasingkasing; dili sila makaputli sa mga tuburan sa kinabuhi. Kinahanglan nga adunay gahum nga magabuhat gikan sa sulod, usa ka bag-ong kinabuhi gikan sa itaas, sa dili pa ang mga tawo mausab gikan sa sala ngadto sa pagkabalaan. Kana nga gahum mao si Cristo. Ang Iyang grasya lamang ang makapalihok sa walay kinabuhi nga mga galamhan sa kalag, ug magdani niini ngadto sa Dios, ngadto sa pagkabalaan.”—*Steps to Christ*, p. 18.

- a. Unsang mensahi ang sa ulahi gisulat sa mga apostoles mahitungod sa pag-usab sa tumong nga motungha uban sa bag-o nga pagkatawo? Galacia 2:20; 1 Juan 2:15-17.

“Ang makakabig nga gahum sa Dios makahimo sa pag-usab sa napanunod ug naugmad nga mga kahiligan; tungod kay ang relihiyon ni Jesus nagatuboy. ‘Pagkatawo pag-usab’ nagpasabut ug usa ka pagka-usab, usa ka bag-ong pagkatawo diha kang Cristo Jesus.”—*The Adventist Home*, p. 206.

“Si [Pablo] konbinsido nga kon ang mga hunahuna sa mga tawo madala ngadto sa pagsabot sa talagsaong sakripisyo nga gihimo sa Halangdon sa langit, ang tanang pagkahakog mapapahawa gikan sa ilang mga kasingkasing. Iyang gigiyahan una ang hunahuna ngadto sa posisyon nga gihuptan ni Cristo didto sa langit, diha sa sabakan sa Iyang Amahan; iyang gipadayag Siya human niana ingon nga naghukas sa Iyang himaya, boluntaryo nga nagpasakup sa Iyang kaugalingon sa tanan nga makapaubos nga kahintang sa kinaiyahan sa tawo, nagsagop sa mga responsibilidad sa usa ka sulogoon, ug nahimong masinugtanon hangtud sa kamatayon, ug nga kana nga kamatayon nga labing makauulaw ug ngil-ad, ang labing makauulaw, ang labing nakahingutas – ang kamatayon sa krus. Makapamalandong ba ang mga Cristohanon niining kahibulongan nga pagpasundayag sa gugma sa Dios ngadto sa tawo nga walay mga pagbati sa gugma ug sa usa ka nakaamgo nga pagbati sa kamatuoran nga kita dili na sa atong kaugalingon? Ang ingon niana nga Agalon kinahanglan nga dili alagaran gikan sa pagdumot, kaibug, dalo nga mga motibo.”—*Testimonies for the Church*, vol. 4, p. 458.

“Ako mamulong kaninyo sama sa gipamulong ni Cristo kang Nicodemo: ‘Kinahanglan nga matawo ka pag-usab.’ Kadtong adunay Cristo nga nagmando sa sulod dili mobatig tinguha sa pagsundog sa pasundayag sa kalibutan. Ilang dad-on bisan asa ang sumbanan sa krus, kanunay nga nagsaksi sa mas hataas nga mga katuyoan ug mas halangdon nga mga tema kay sa niadtong nakapatugob sa mga kalibutanon. Ang atong bisti, atong mga puloy-anan, ang atong panag-istoryahanay, kinahanglan nga magpamatuod sa atong pagtugyan ngadto sa Dios. Unsang gahum ang magauban niadtong nagapadayag nga ilang gibiyaan ang tanan alang kang Cristo.”—*Ibid.*, vol. 5, p. 189.

PERSONAL SUBLI NGA MGA PANGUTANA

Biernes, Enero 31

1. Tungod sa iyang maayong mga buhat, giunsa pagtan-aw ni Nicodemo ang iyang kaugalingon?
2. Giunsa ni Nicodemo paggawi diha sa presensya ni Cristo?
3. Unsay buot ipasabot sa “pagpakatawo pag-usab”?
4. Sa unsang paagi mahitabo ang bag-ong pagkatawo?
5. Unsang kausaban sa paggawi ang mahitabo ingon nga resulta sa bag-ong pagkatawo, ug ngano?

Ang Paglihok sa Balaang Espiritu

SAG-ULOHON NGA BERSEKULO: “Ug maingon nga si Moises nagpatindog sa halas sa kamingawan, mao usab, kinahanglan nga pagapatindugon ang Anak sa tawo, Aron ang tanan nga motoo kaniya dili mawala, kondili may kinabuhi nga walay kata-pusan” (Juan 3:14, 15).

Gisugyot nga Basahon: *Christ’s Object Lessons*, pp. 95–102.

“Tan-aw, o tan-aw ngadto kang Jesus ug mabuhi!”—*Christian Education*, p. 76.

1. AGHAT NGA PANGUTANA

Domingo, Pebrero 2

- a. Unsang pangutana ni Nicodemo nagpakita nga ang iyang kasingkasing napa-humok na? Juan 3:9.

“Si Jesus sa pagkatinuod miingon kang Nicodemo: Dili kontrobersya ang makatabang sa imong kahimtang: dili ang mga argumento ang magdala ug kahayag sa kalag. Kinahanglan ka magbaton ug usa ka bag-ong kasingkasing, o dili ka makaila sa gingharian sa langit. Dili ang mas daku nga ebidensya ang magdala kanimo sa husto nga posisyon, apan bag-ong katuyoan, bag-ong mga tuburan sa paglihok. Kinahanglan nga matawo ka pag-usab. Hangtud nga kini nga kausaban mahitabo, nga maghimo sa tanan nga mga butang nga bag-o, ang labing lig-on nga ebidensya nga mahimo nga ikapresentar mahimong walay kapuslanan. Ang panginahanglan anaa sa imong kaugalingong kasingkasing; ang tanan kinahanglan nga usbon, o dili ka makakita sa gingharian sa Dios.

“Kini usa ka makapaubos kaayo nga pahayag ngadto kang Nicodemo. . . . Siya dili kaayo espirituhanon ug hunahuna aron sa pag-ila sa kahulogan sa mga pulong ni Cristo. Apan ang Manluluwas wala magtagbo sa argumento uban sa argumento. . . .

“Ang pipila ka silaw sa kamatuoran mituhop sa hunahuna sa magmamando. Ang mga pulong ni Cristo mipuno kaniya sa kahingangha, ug midala ngadto sa pangutana, ‘Unsaon pagkahimo niining mga butanga?’ Uban sa lawom nga kasibot si Jesus mitubag, ‘Ikaw ba usa ka pangulo sa Israel, ug wala ka mahibalo niining mga butanga?’ Ang iyang mga pulong nagpahayag ngadto kang Nicodemo sa leksyon nga, imbes mobatig kalagot sa yano nga mga pulong sa kamatuoran, ug magpatuyang sa pagpakaaron-ingnon, siya aduna untay usa ka labi ka mapaubsanon nga opinyon sa iyang kaugalingon, tungod sa iyang espirituhanong pagkawalay alamag. Apan ang mga pulong ni Cristo gisulti uban sa ingon ka solemne nga dignidad, ug diha sa hitsura ug tono nagpahayag sa ingon ka mainiton nga gugma ngadto kaniya, nga siya wala makapahiubos sa dihang nasabtan ang iyang makaulaw nga posisyon”—*Testimonies to Ministers*, pp. 368, 369.

- a. Diha sa unsa nga ang mga Fariseo nagpagarbo sa ilang mga kaugalingon? Lucas 18:9-12.
-

“Ang mga Judeo mao ang una nga gitawagan ngadto sa ubasan sa Ginoo, ug tungod niini sila mapahitas-on ug nagpakamatarung sa kaugalingon. Ang ilang taas nga mga katuigan sa pagserbisyo ilang gitagad ingon nga naghatag kanila sa katungod sa pagdawat ug daku nga balus kay sa uban. Wala nay mas makapalagut kanila kay sa usa ka pagpahibalo nga ang mga Gentil pagadawat ngadto sa managsama nga mga pribilehiyo uban sa ilang mga kaugalingon diha sa mga butang sa Dios.”—*Christ’s Object Lessons*, p. 400.

- b. Giunsa ni Jesus paghulagway ang buhat sa Balaang Espiritu diha sa kasingkasing? Juan 3:8.
-

“Ang hangin madungog taliwala sa mga sanga sa kakahoyan, nga nagahaguros sa mga dahon ug mga bulak; apan kini dili makita, ug walay tawo nga nasayud diin kini gikan o asa kini paingon. Mao man ang buhat sa Balaang Espiritu diha sa kasingkasing. Dili kini ikapatin-aw sama sa mga lihoc sa hangin. Usa ka tawo mahimong dili makasulti sa eksaktong oras o dapit, o sa pagsubay sa tanang mga sirkumstansya sa proseso sa pagkakabig; apan kini wala magproyba nga siya wala makabig. Pinaagi sa usa ka ahensya nga dili makita sama sa hangin, si Cristo kanunay nagabuhat diha sa kasingkasing.”—*The Desire of Ages*, p. 172.

- c. Sa unsang paagi nga ang balaang mga pagpasabot gipahimutang diha sa kasingkasing? Isaias 30:21; Jeremias 42:3; Mateo 16:17.
-

“Sa hinayhinay, tingali wala mamatikdi sa nagdawat, ang mga pagpasabot nga nahimo nga misangko ngadto sa pagdani sa kalag ngadto kang Cristo. Kini mahimong madawat pinaagi sa pagpamalandong diha Kaniya, pinaagi sa pagbasa sa mga Kasulatan, o pinaagi sa pagpaminaw sa pulong gikan sa buhi nga magwawali. Sa kalit, sa dihang ang Espiritu moabut uban sa mas direkta nga paghangyo, ang kalag sa kamalipayon motugyan sa iyang kaugalingon ngadto kang Jesus. Sa kadaghanan kini gitawag ug kalit nga pagkakabig; apan kini mao ang resulta sa dugay nga pagpangamuyo sa Espiritu sa Dios—usa ka mapailubon, malungtarong proseso.”—*Ibid.*

“Itugot ang inyong mga kasingkasing nga mapahumok ug magamhan sa Espiritu sa Dios. Himoa nga ang mga kalag nga naputos sa yelo matunaw ilalum sa paglihok sa Balaang Espiritu.”—*Letters and Manuscripts*, vol. 12, Letter 53, 1897.

- a. Sa unsa nga ang sulodnon nga mga pagbuhat sa Balaang Espiritu mapadayag sa gawas? Galacia 5:22-25.

“Samtang ang hangin mismo dili makita, kini naghatag ug mga epekto nga makita ug mabati. Mao man ang buhat sa Espiritu diha sa kalag mopadayag sa iyang kaugalingon diha sa matag buhat kaniya nga mibati sa iyang makaluwas nga gahum. Sa diha nga ang Espiritu sa Dios mokuha ug luna sa kasingkasing, kini mobag-o sa kinabuhi. Ang dautan nga mga hunahuna mawagtang, ang dautang mga buhat pagabiyaan; ang gugma, pagpaubos, ug kalinaw mopuli sa kasuko, kasina, ug panag-away. Ang kalipay mopuli sa kasubo, ug ang panagway mopasibaw sa kahayag sa langit.”—*The Desire of Ages*, p. 173.

- b. Kanus-a makadawat ang usa ka tawo sa panalangin sa pagbag-o? Roma 10:9, 10; 1 Juan 1:9.

“Walay makakita sa kamot nga nag-alsa sa lulan, o makakita sa kahayag nga mikunsad gikan sa mga hawanan sa itaas. Ang panalangin moabut sa dihang pinaagi sa pagtoo ang kalag motugyan sa kaugalingon ngadto sa Dios. Unya kana nga gahum nga walay tawhanong mata makakita magmugna ug bag-ong binuhat diha sa dagway sa Dios.”—*Ibid.*

“Kon anaa kanimo ang Espiritu Santo nga nag-umol ug naghulma sa imong kasingkasing matag adlaw, unya makabaton ka ug balaanong pagpanabut sa pag-ila sa kinaiya sa gingharian sa Dios. Si Nicodemo nakadawat sa leksyon ni Cristo ug nahimong tinuod nga magtutuo.”—*Testimonies to Ministers*, pp. 369, 370.

- c. Giunsa paghulagway ni Cristo kini nga proseso? Mateo 13:33.

“Ang lebadura nga natago diha sa harina molihok nga dili makita aron modala sa tibook minasa ilalum sa nagpatubo nga proseso niini; busa ang lebadura sa kamatuoran nagabuhat nga sekreto, sa kahilom, sa makanunayon, aron sa pagbag-o sa kalag. Ang natural nga mga kahiligan napahumok ug napasakop. Bag-ong mga hunahuna, bag-ong mga pagbati, bag-ong mga motibo, natisok. Usa ka bag-ong sumbanan sa kinaiya ang napahalona—ang kinabuhi ni Cristo. Ang hunahuna nausab; ang mga galamhan gipukaw sa paglihok sa bag-ong mga linya. Ang tawo wala mahatagi ug bag-ong mga galamhan, apan ang mga galamhan nga anaa kaniya gibalaan. Ang konsensya napapukaw. Kita gitugahan sa mga taras sa kinaiya nga makapahimo kanato sa pagpangalagad alang sa Dios.”—*Christ’s Object Lessons*, pp. 98, 99.

- a. Giunsa ni Jesus paghulagway ang paglansang kaniya nga hapit na mahitabo? Juan 3:14, 15.

“[Juan 3:14, 15 gikutlo.] Dinhi ang sukaranan diin si Nicodemo hinasa. Ang simbolo sa giisa nga bitin nagpatin-aw ngadto kaniya sa misyon sa Manluluwas. Sa diha nga ang katawhan sa Israel nangamatay tungod sa kahapdos sa malala nga mga bitin, ang Dios nagsugo kang Moises sa paghimo ug usa ka bitin nga tumbaga, ug ibutang kini sa itaas sa katilingban. Unya ang pulong gipalanog sa tibook kampo nga ang tanan nga motan-aw diha sa bitin mabuhi. Ang mga tawo nahibalo pag-ayo nga sa iyang kaugalingon ang bitin walay gahum sa pagtabang kanila. Kadto usa ka simbolo kang Cristo. Samtang ang hulagway nga gihimo sa dagway sa makamatay mga bitin giisa alang sa ilang kaayohan, mao man ang Usa nga gihimo ‘diha sa dagway sa makasasalang unod’ mao ang mahimong ilang Manunubos. Roma 8:3. Daghan sa mga Israelinhon ang nagtagad sa halad nga serbisyo ingon nga aduna kini sa iyang kaugalingong gahum sa pagpahigawas kanila gikan sa sala. Ang Dios nagtinguha sa pagtudlo kanila nga kini walay labaw nga bili kay niadtong bitin nga tumbaga. Kini mao ang magtudlo sa ilang mga hunahuna ngadto sa Manluluwas. Alang man sa pag-ayo sa ilang mga samad o ang kapasayloan sa ilang mga sala, wala silay mahimo alang sa ilang kaugalingon gawas sa pagpakita sa ilang pagtoo diha sa Gasa sa Dios. Kinahanglan nga sila motan-aw ug mabuhi.”—*The Desire of Ages*, pp. 174, 175.

- b. Bisan pa sa tagana, nganong ang uban nangamatay? 1 Corinto 10:9; Hebreohanon 3:12.

“Daghan sa mga Israelitas walay nakita nga tabang diha sa tambal nga gitudlo sa Langit. Ang mga patay ug himalasyon naglibot kanila, ug sila nahibalo nga, kon walay tabang sa Dios, ang ilang kaugalingong kapalaran tino gayud; apan nagpadayon sila sa pagkaguol sa ilang mga samad, sa ilang mga kasakit, sa ilang sigurado nga kamatayon, hangtud nga ang ilang kusog nawala na, ug ang ilang mga mata naglurat, samtang nga sila aduna untay dihadiha nga kaayohan.”—*Patriarchs and Prophets*, p. 432.

- c. Kon kita buot nga maluwas, asa man ta motan-aw? Hebreohanon 6:19, 20.

“Ang makamatay nga mga epekto sa sala matangtang lamang pinaagi sa tagana nga gihimo sa Dios. Ang mga Israelita nagluwas sa ilang mga kinabuhi pinaagi sa pagtan-aw sa giisa nga bitin. Kana nga pagtan-aw nagpasabot ug pagtoo. Sila nabuhi tungod kay sila mitoo sa pulong sa Dios, ug misalig diha sa mga paagi nga gihatag alang sa ilang pagkaayo. Busa ang makasasala motan-aw kang Cristo, ug mabuhi. Siya nakadawat ug pasaylo pinaagi sa pagtoo sa matuboson nga sakripisyo. . . . Si Cristo adunay gahum ug kaayo diha sa Iyang kaugalingon sa pag-ayo sa naghinulsol nga makasasala.”—*Ibid.*, p. 431.

- a. Unsang leksyon ang sa ulahi nasabtan ni Nicodemo nga kinahanglan nga atong kat-onon- ug kanunay nga ibutang sa hunahuna? Efeso 2:8; Lucas 13:20, 21.

“Kasagaran motungha ang pangutana, Ngano man, nga adunay daghan kaayo, nga nag-angkon nga nagatoo sa pulong sa Dios, nga diha kanila walay makita nga pagbag-o diha sa mga pulong, diha sa espiritu, ug sa kinaiya? Ngano nga adunay daghan kaayo nga dili makaagwanta sa pagsupak sa ilang mga katuyoan ug mga plano, kinsa magpakita ug dili balaan nga taras, ug kinsang mga pulong mahait, mapahitas-on, ug mainiton? Adunay makita diha sa ilang mga kinabuhi ang mao gihapon nga gugma sa kaugalingon, mao gihapon dinalo nga pagpatuyang, mao ra gihapon ka masuk-anon ug dali nga sinultihan, nga makita sa kinabuhi sa kalibutanon. Adunay mao gihapong sensitibo nga garbo, parehas nga pagtugyan ngadto sa natural nga kahiligan, mao gihapon nga kahiwian sa kinaiya, nga daw ang kamatuoran wala nila sa hingpit mahibaloi. Ang rason mao kay sila wala makabig. Wala nila tagoi ang lebadura sa kamatuoran diha sa kasingkasing. Wala kini kahiwayonan sa paghimo sa iyang buluhaton. Ang ilang natural ug naugmad nga mga kahiligan ngadto sa dautan wala itugyan ngadto sa makapausab nga gahum niini. Ang ilang mga kinabuhi nagpadayag sa pagkawala sa gracia ni Cristo, usa ka walay pagtoo diha sa Iyang gahum sa pagbag-o sa kinaiya.

“ ‘Ang pagtoo moabut pinaagi sa pagpaminaw, ug ang pagpaminaw pinaagi sa pulong sa Dios.’ Roma 10:17. Ang mga Kasulatan mao ang dakong ahensya sa pagbag-o sa kinaiya. Si Cristo nag-ampo, ‘Balaana sila pinaagi sa Imong kamatuoran; Ang imong pulong mao ang kamatuoran.’ Juan 17:17. Kon gitun-an ug gituman, ang pulong sa Dios magabuhat diha sa kasingkasing, nagbuntog sa matag dili balaan nga kinaiya. Ang Balaang Espiritu mianhi aron sa pagkonbikto sa sala, ug ang pagtoo nga migitib dihan sa kasingkasing magabuhat pinaagi sa gugma ngadto kang Cristo, magapahiuyon kanato diha sa lawas, kalag, ug espiritu ngadto sa Iyang kaugalingong dagway. Unya ang Dios makahimo sa paggamit kanato sa pagbuhat sa Iyang kabubut-on. Ang gahum nga gihatag kanato magabuhat gikan sa sulod paingon sa gawas, magdala kanato sa pagtunol ngadto sa uban sa kamatuoran nga gipahayag nganhi kanato”—*Christ’s Object Lessons*, pp. 99, 100.

PERSONAL SUBLI NGA MGA PANGUTANA

Biernes, Pebrero 7

1. Unsa ang nag-una nga kinaiya sa mga Fariseo sa kaadlawan ni Cristo?
2. Ipasabut kon sa unsang paagi nga kita nabag-o ngadto sa pagkasama ni Cristo.
3. Sa unsa nga ang pagbag-o sa kasingkasing mapakita?
4. Isaysay ang simbolo sa giisa nga bitin.
5. Sa unsang paagi ang sambingay sa lebadura nagpadayag ug pagtubo diha sa gracia sa Dios?

Si Jesus ug si Juan Bautista

SAG-ULOHON NGA BERSEKULO: “Siya kinahanglan motubo, apan ako kinahanglan magakubos” (Juan 3:30).

Gisugyot nga Basahon: *Testimonies for the Church*, vol. 5, pp. 721–729.

“Si Juan Bautista gipahayag sa atong Manluluwas nga pinakadaku sa mga propeta. Apan unsa ka lahi ang sinultihan niining tawo sa Dios ug sa kadaghanan nga nagaangkon nga mga ministro sa krus. Sa dihang gipangutana kon siya si Cristo, si Juan mipahayag sa iyang kaugalingon nga dili takus bisan sa pagtanggap sa sandalyas sa iyang Agalon.”—*Testimonies for the Church*, vol. 5, p. 224.

1. USA KA PROBLEMA TALIWALA SA MGA TINON-AN

Domingo, Pebrero 9

- a. Unsang pangutana ang mitungha taliwala sa mga tinon-an ni Juan ug sa mga Judeo? Juan 3:25.

“Ang mga tinon-an ni Juan nagatan-aw uban sa pangabugho diha sa nagtubo nga pagkainila ni Jesus. Sila mibarug nga andam sa pagsaway sa Iyang buhat, ug sa wala madugay sila nakakaplag ug higayon. Mitungha ang usa ka pangutana tali kanila ug sa mga Judeo kon ang bautismo ba nakabenepisyo sa paghinlo sa kalag gikan sa sala; sila nag-ingon nga ang bautismo ni Jesus lahi kaayo kay nianang sa kang Juan. Sa wala madugay sila nakiglalalis sa mga tinon-an ni Cristo bahin sa porma sa mga pulong nga angay gamiton diha sa pagbautismo, ug sa katapusan bahin sa katungod sa naulahi sa pagbautismo sa tanan.”—*The Desire of Ages*, p. 178.

- b. Giunsa pagpahayag sa mga tinon-an ni Juan ang ilang kasina sa buhat ni Cristo — ug unsa nga halangdon nga tubag ang iyang gihatag? Juan 3:26, 27.

“Si Juan sa kinaiya adunay mga kasaypanan ug mga kahuyang nga komon sa tawo, apan ang paghikap sa diosnong gugma nakapausab kaniya. Nagpuyo siya sa usa ka palibut nga wala mahugawi sa kahakog ug ambisyon, ug ibabaw sa tanang inalisngaw sa pangabugho. Wala siya magpakitag simpatiya sa pagkadiskontento sa iyang mga tinon-an, apan gipakita kon unsa ka tin-aw nga nasabtan niya ang iyang relasyon ngadto sa Mesias, ug unsa ka malipayon nga iyang pag-abiabi sa Usa nga alang kaniya iyang giandam ang dalan.”—*Ibid.*, p. 179.

- a. Giunsa ni Juan pagpakita nga iyang nasabtan ang iyang misyon? Juan 3:28, 29.

“Si Juan nagrepresentar sa iyang kaugalingon ingon nga higala nga nagabuhat ingon nga usa ka mensahero tali sa kaslonon nga mga panig, nag-andam sa dalan alang sa kasal. Sa dihang ang pamanhonon nakadawat na sa iyang pangasaw-onon, ang misyon sa higala nahimo na. Siya magmaya diha sa kalipay niadtong kinsang panaghiusa iyang gipatunhay. Mao man si Juan gitawag aron sa paggiya sa mga tawo ngadto kang Jesus, ug maoy iyang kalipay ang pagsaksi sa kalampusan sa bulohaton sa Manluluwas.”—*The Desire of Ages*, p. 179.

- b. Ihulagway ang bulohaton ni Juan—ug ang ato. Juan 1:23, 29.

“Nagtan-aw diha sa pagtoo ngadto sa Manunubos, si Juan misaka ngadto sa gihabugon sa pagsalikway sa kaugalingon. Wala siya magtinguha sa pagdani sa mga tawo ngadto sa iyang kaugalingon, kondili sa pagtuboy sa ilang mga hunahuna nga mas taas ug mas taas pa, hangtud nga sila makapahulay diha sa Cordero sa Dios. Siya sa iyang kaugalingon usa lamang ka tingog, usa ka singgit sa kamingawan. Karon uban sa kalipay iyang gidawat ang kahilom ug ang kangiub, aron ang mga mata sa tanan maliso ngadto sa Kahayag sa kinabuhi.

“Kadtong mga matinud-anon sa ilang pagtawag ingon nga mga mensahero sa Dios dili mangita ug dungog alang sa ilang kaugalingon. Ang gugma sa kaugalingon lamyon diha sa gugma alang kang Cristo. Walay panag-indigay nga makadaut sa hamili nga kawsa sa ebanghelyo. Sila makasabut nga maoy ilang buluhaton ang pagmantala, sama sa gibuhay ni Juan Bautista, ‘Tan-awa ang Cordero sa Dios, nga nagakuha sa sala sa kalibutan.’ Juan 1:29. Ilang ituboy si Jesus, ug uban Kaniya ang tawo matuboy. ‘Mao kini ang giingon sa hataas ug Usa nga halangdon nga nagapuyo sa walay katapusan, kinsang ngalan mao ang Balaan; nagapuyo ako sa hataas ug balaan nga dapit, uban usab kaniya nga mahinulsulon ug mapaubsanon sa espiritu, aron sa pagpabuhi sa espiritu sa mapaubsanon, ug sa pagpabuhi sa kasingkasing sa mahinulsolon.’ Isaias 57:15”—*Ibid.*, pp. 179, 180.

“Ayaw pangitaa ang imong kaugalingong kalipayan ug kasayon, kon dili tinguhaa nga mahibalo ug pagbuhat sa kabubut-on sa Dios. Himoa ang matag usa mangutana, Dili ba ako makatudlo ug pipila ka mga kalag ngadto sa Cordero sa Dios, nga nagakuha sa sala sa kalibutan? Dili ba ako makapahumpay ug pipila nga naguol? Dili ba ako mahimong paagi sa pagluwas sa pipila ka kalag sa gingharian sa Dios? Gusto namo ang lawom nga paglihok sa Espiritu sa Dios sa atong mga kasingkasing, aron dili lamang kita makasiguro sa atong kaugalingon sa puti nga bisti, apan aron kita makainpluwensya sa uban nga ang ilang mga ngalan mahimong masulod sa basahon sa kinabuhi, nga dili na mapapas.”—*Historical Sketches*, p. 140.

- a. Giunsa sa kadaghanan sa katawhan pagsumbalik ngadto sa mensahe ni Cristo? Juan 3:32.
-

“Ang mga tinon-an ni Juan nagpahayag nga ang tanan nga mga tawo nanagpanuol ngadto kang Cristo; apan uban sa mas matin-aw nga panan-aw, si Juan miingon, ‘Walay tawo nga midawat sa Iyang pagpamatuod;’ mao nga dyutay ang andam sa pagdawat Kaniya ingon nga Manluluwas gikan sa sala. Apan ‘siya nga magadawat sa Iyang panghimatuod magabutang sa iyang timaan niini, nga ang Dios matinuoron.’ Juan 3:33, R.V.”—*The Desire of Ages*, p. 181.

- b. Diha kang kinsa gihatag ang gasa sa Balaang Espiritu? Juan 3:34.
-

“Kita makadawat sa gasa sa langit lamang sa dihang kita andam sa pagbasiyo sa kaugalingon. Dili kita makaila sa kinaiya sa Dios, o magadawat kang Cristo pinaagi sa pagtoo, gawas nga kita mouyon sa pagdala sa pagpasakop sa matag hunahuna ngadto sa pagsunod kang Cristo. Ngadto sa tanan nga nagahimo niini ang Balaang Espiritu igahatag sa walay sukod. Diha kang Cristo ‘nagapuyo sa pagkalawas ang bug-os nga kinatibuk-an sa pagka-Dios.’ Colosas 2:9, 10. R.V.”—*Ibid.*

- c. Sa unsang paagi ang yawi sa pagdawat sa mas daku nga sukod sa Balaang Espiritu sa dugang napadayag diha sa Kasulatan? Juan 14:15-17; Buhat 5:32.
-

“Dili lamang kita moingon, ‘ako nagatoo,’ kon dili pagkinabuhi sa kamatuoran. Pinaagi sa pagpahiuyon ngadto sa kabubut-on sa Dios diha sa atong mga pulong, atong panglihok, atong kinaiya, nga atong proybahan ang atong koneksyon ngadto Kaniya. Sa dihang ang usa mobiya sa sala, nga mao ang paglapas sa kasugoan, ang iyang kinabuhi madala ngadto sa pagpakigharmoniya ngadto sa kasugoan, ngadto sa hingpit nga pagsunod. Mao kini ang buhat sa Balaang Espiritu. Ang kahayag sa pulong sa maminatngonon gitun-an, ang tingog sa konsensya, ang pagpakigbisug sa Espiritu, maghatag diha sa kasingkasing ug tinuod nga gugma alang kang Cristo, nga mihatag sa Iyang kaugalingon usa ka bug-os nga sakripisyo aron sa pagtubos sa tibook nga pagkatawo, lawas, kalag, ug espiritu. Ug ang gugma maipakita diha sa pagsunod. Ang linya sa kalainan mahimong matin-aw ug klaro tali niadtong nagahigugma sa Dios ug nagabantay sa Iyang mga kasugoan, ug kadtong wala magahigugma Kaniya ug nagasalikway sa Iyang mga kalagdaan.”—*Testimonies for the Church*, vol. 6, p. 92.

- a. Ngano nga mahinungdanon ang pagsabut sa lakang nga atong kuhaon alang kang Cristo sa dihang modesisyon nga magpabautismo? Juan 3:36.

“Gawas kang Cristo, ang bautismo, sama sa uban nga serbisyo, maoy walay-pulos nga porma.”—*The Desire of Ages*, p. 181.

“Dili na kinahanglan ang panaglalis kon ang bautismo ni Cristo o ang kang Juan ang makaputli gikan sa sala. Ang grasya ni Cristo mao ang naghatag ug kinabuhi sa kalag.”—*Ibid.*

“Pinaagi lamang ni Cristo maangkon ang pagkadili mamalatyon. Si Jesu miinon: ‘Siya nga nagatoo sa Anak may kinabuhi nga walay katapusan: ug siya dili nga motoo sa Anak dili makakitag kinabuhi.’ Juan 3:36. Ang matag tawo mahimong mapanag-iya niining bililhon nga panalangin kon siya motuman sa mga kondisyon. Ang tanan ‘nga pinaagi sa pagpailub magapadayon diha sa maayong pagbuhat mangita sa himaya ug sa kadunggan ug sa pagkadili mamatay,’ makadawat ug ‘kinabuhing dayon.’ Roma 2:7.”—*The Great Controversy*, p. 533.

“Ang bautismo maoy usa ka labing solemne nga pagsalikway sa kalibutan. Kad-tong mga nabautismohan diha sa tulo ka pilo nga ngalan sa Amahan, sa Anak, ug sa Espiritu Santo, diha sa pagsugod sa ilang Cristohanong kinabuhi nagpahayag sa publiko nga sila mibiya sa pag-alagad kang Satanang ug nahimong mga sakop sa harianong pamilya, mga anak sa langitnong Hari.”—*Testimonies for the Church*, vol. 6, p. 91.

- b. Ipasabut ang makapakurat nga mga pulong ni Juan Bautista nga nagpadayag sa giladmon sa tinuod nga kinabuhing pagsalig nga gipaila pinaagi sa bautismo? Lucas 3:7, 8.

“Gibutang ni Juan ang atsa sa gamut sa kahoy. Iyang gibadlong ang sala, walay kahadlok sa mga sangputanan, ug nag-andam sa dalan alang sa Cordero sa Dios.

“Naapektuhan si Herodes samtang naminaw siya sa gamhanan, prangka nga mga pagpamatuod ni Juan, ug uban sa lawom nga interes siya nangutana kon unsa ang kinahanglan niyang buhaton aron mahimong iyang tinon-an. Si Juan nasayud sa kamatuoran nga hapit na niya pakaslan ang asawa sa iyang igsoon, samtang buhi pa ang iyang bana, ug matinud-anon misulti kang Herodes nga kini dili uyon sa balaod.”—*Early Writings*, p. 154.

“Si Juan Bautista mitagbo sa sala uban sa dayag nga pagbadlong diha sa mga tawo nga mapaubsanong trabaho ug sa mga tawo nga tag-as ug hut-ong. Gipahayag niya ang kamatuoran ngadto sa mga hari ug mga halangdon, sila man maminaw o mosalikway niini. Siya misulti sa personal ug prangka.”—*Selected Messages*, bk. 2, p. 149.

- a. Diha sa pagkamatikod nga ang mga Fariseo naninguha sa paghimo ug krisis tali kang Juan ug sa Iyang kaugalingon, unsa may gihimo ni Jesus? Juan 4:1-3.

“Si Jesus nahibalo nga [ang mga Fariseo] dili mopugong sa pagpaningkamot aron sa paghimo ug panagbahin tali sa Iyang kaugalingong mga tinon-an ug nianang kang Juan. Nasayod siya nga ang bagyo nagsingabot nga mobanlas sa usa sa labing daku sa mga propeta nga gihatag nganhi sa kalibutan. Nagtinguha sa paglikay sa tanang higayon sa dili pagsinabtanay o panagsumpaki, Siya sa hilom mihunong sa Iyang mga pagbuhat, ug mipahawa ngadto sa Galilea. Kita usab, samtang maunongon sa kamatuoran, kinahanglan nga maningkamot sa paglikay sa tanan nga mahimong modala ngadto sa panagsumpaki ug sayop nga pagsabot. Tungod kay sa dihang kini motungha, sila moresulta sa pagkawala sa mga kalag. Sa dihang ang mga sirkumstansya mahitabo nga maghulga sa paghimo ug pagkabahinbahin, kinahanglan atong sundon ang panig-ingnan ni Jesus ug ni Juan Bautista.”—*The Desire of Ages*, p. 181.

- b. Unsay angay natong makat-onan gikan sa gawi ni Juan aron sa paghupay sa krisis? Juan 3:30.

“Sama sa mga tinon-an ni Juan, daghan ang nagabati nga ang kalampusan sa buhat nagdepende sa unang mga mamumuo. Ang pagtagad gitumong diha sa tawhanon imbes diha sa diosnon, ang pangabugho motungha, ug ang buhat sa Dios madaut. Ang usa nga dili angay nga pagapasidunggan matintal sa pagmang-gad sa pagsalig sa kaugalingon. Dili siya makaamgo sa iyang pagsalig diha sa Dios. Ang mga tawo natudloan sa pagsalig diha sa tawo alang sa paggiya, ug sa ingon sila mahulog ngadto sa sayop, ug madala palayo sa Dios.

“Ang buhat sa Dios dili magdala sa dagway ug superskripsiyon sa tawo. Matag karon ug unya ang Ginoo magdala ug lain-laing mga ahensya, nga pinaagi kang kinsa ang Iyang katuyoan sa labing maayo mamatuman. Malipayon sila nga andam sa pagpaubos sa kaugalingon, nga magaingon uban kang Juan Bautista, ‘Siya kinahanglan magatubo, apan ako kinahanglan magakunhod.’”—*Ibid.*, p. 182.

PERSONAL SUBLI NGA MGA PANGUTANA

1. Nganong nasina ang mga tinon-an ni Juan sa buhat ni Cristo?
2. Unsa may gipahayag ni Juan ngadto sa iya mga tinon-an?
3. Alang sa unsa nga katuyoan nga ang gasa sa Espiritu Santo gihatag?
4. Sa unsa nga ang bautismo makatuman sa matuod nga katuyoan niini?
5. Unsay gibuhay ni Jesus ug ni Juan sa dihang ilang nakita ang katalagman sa usa ka krisis tali sa ilang mga tinon-an?

Si Jesus ug ang Babaye nga Samariahanon

SAG-ULOHON NGA BERSEKULO: “Apan bisan kinsa nga moinum sa tubig nga akong igahatag kaniya, dili na gayud pagauhawon siya; apan ang tubig nga akong igahatag kaniya mahimo diha kaniya nga tuburan sa tubig nga magatubod ngadto sa kinabuhi nga walay katapusan” (Juan 4:14).

Gisugyot nga Basahon: *Testimonies for the Church*, vol. 4, pp. 384–387.

“Siya nga nagatinguha sa humpay sa iyang kauhaw diha sa mga tuboran niini nga kalibutan magainom aron lang pagauhawon pag-usab. Bisan diin mga tawo wala matagbaw. Sila naghandum alang nianang magahatag sa panginahanglan sa kalag. Usa lamang ang makatagbo niana nga panginahanglan. Ang gikinahanglan sa kalibutan, “Ang Gihandum sa tanang kanasuran,” mao si Cristo.”—*The Desire of Ages*, p. 187.

1. SI JESUS DIDTO SA SICAR

Domingo, Pebrero 16

a. Diha sa Iyang panaw ngadto sa Galilea, diin man si Jesus ug Iyang mga tinon-an mihunong? Juan 4:6.

“Samtang si Jesus naglingkod sa kilid sa atabay, Siya naluya tungod sa kagutom ug kauhaw. Ang panaw sukad pa sa buntag taas kaayo, ug karon ang adlaw sa udto mibunal diha Kaniya. Ang iyang kauhaw nadugangan pinaagi sa paghunahuna sa mabugnaw, makapalagsik nga tubig nga haduol kaayo, apan dili maabut Niya; kay siya walay pisi ni banga sa tubig, ug lawom ang atabay. Ang kapalaran sa tawo anaa Kaniya, ug naghulat Siya alang usa ka tawo nga moduol aron magkuha.”—*The Desire of Ages*, p. 183.

b. Kinsa ang miadto sa atabay, ug unsang pabor ang gihangyo ni Jesus kaniya - ug unsang angay nato makat-onan gikan niini? Juan 4:7.

“Ang panagdumot tali sa mga Judeo ug Samariahanon nagsanta sa babaye gikan sa paghatag ug usa ka kalooy ngadto kang Jesus; apan ang Manluluwas nagtinguha sa pagpangita ug yawi ngadto niini nga kasingkasing, ug uban sa taktika nga natawo sa balaanong gugma, Siya nangayo, wala gitanyag, ug usa ka pabor. Ang paghatag ug usa ka kaayohan mahimong dumilian; apan ang pagsalig nagpukaw ug pagsalig. Ang Hari sa langit miduol ngadto niining sinalikway nga kalag, naghangyo ug serbisyo diha sa iyang mga kamot. Siya nga naghimo sa dagat, nga nagkontrolar sa mga katubigan sa daku nga kahiladman, nga mao ang nag-abli sa mga tuboran ug mga agianan sa yuta, mipahulay gikan sa Iyang kakapoy diha sa atabay ni Jacob, ug nagdepende diha sa kalooy sa usa ka dumoluong alang sa gasa sa usa ka mainom nga tubig.”—*Ibid.*, p. 184.

- a. Giunsa ni Jesus pagtawag ang atensyon sa babaye ngadto sa gasa sa kaluwasan? Juan 4:10.
-

“Ang tubig nga gitumong ni Cristo mao ang pagpadayag sa Iyang gracia diha sa Iyang pulong; Ang Iyang Espiritu, ang Iyang pagtudlo, maoy usa ka makatagbaw nga tuburan ngadto sa matag kalag. Ang matag laing tinubdan nga ilang adtoan mapamatud-an nga dili makatagbaw. Apan ang pulong sa kamatuoran sama sa mabugnaw nga mga sapa, nga girepresentahan maingon sa mga tubig sa Lebanon, nga kanunay nga makapatagbaw. Diha kang Cristo anaa ang kahupnganan sa kalipay hangtud sa kahangturan.”—*Testimonies to Ministers*, p. 390.

- b. Unsa ang reaksyon sa babaye sa gitanyag ni Cristo? Juan 4:11, 12.
-

“Ang pagpanabot sa babaye wala makasabut sa kahulogan ni Cristo; siya nagtoo nga siya naghigot bahin sa atabay sa ilang atubangan.”—*The Spirit of Prophecy*, vol. 2, pp. 140, 141.

- c. Giunsa ni Jesus pag-ila tali sa usa ka matang sa tubig ug ang lain — ug sa unsang paagi kini nga mensahe makahatag usab ug kaayohan kanato? Juan 4:13, 14; Bugna 22:17.
-

“Kinahanglan natong ampingan ang gugma ug pagpasalamat, kinahanglan nga kita motan-aw ngadto kang Jesus ug mahimong mausab ngadto sa Iyang dagway. Ang resulta niini mao ang pagtubo sa pagsalig, paglaum, pailub, ug kaisug. Kita makahimo sa pag-inom sa tubig sa kinabuhi nga gisulti ni Cristo ngadto sa babayeng Samariahanon. Siya miingon: ‘Kon Ikaw nahibalo sa gasa sa Dios, ug kon kinsa kini nga nagaingon kanimo, Hatagi Ako ug mainom; mangayo ka unta Kaniya, ug ikaw hatagan Niya ug buhi nga tubig. . . . Bisan kinsa nga moinum sa tubig nga akong igahatag kaniya dili na gayud uhawon; apan ang tubig nga akong ihatag kaniya mahimong diha kaniya usa ka atabay sa tubig nga nagatubod ngadto sa kinabuhing walay katapusan.’ Kini nga tubig nagrepresentar sa kinabuhi ni Cristo, ug ang matag kalag kinahanglan nga makabaton niini pinaagi sa pagduol ngadto sa buhi nga pakigdugtong uban sa Dios. Unya mabulahan, mapaubsanon, mapasalamaton nga pagsalig mahimong usa ka nagapabilin nga prinsipyo sa kalag. Ang walay pagtoo nga kahadlok mawala sa atubangan sa buhi nga pagtoo. Atong pamalandungon ang kinaiya Niya nga mao ang unang nahigugma kanato.”—*Testimonies to Ministers*, p. 226.

- a. Giunsa sa Samariahanon nga babaye pagpakita nga siya wala pa gihapon makasabut sa mga pulong ni Cristo? Juan 4:15.

“Ang diosnon nga gracia nga Siya lamang ang makahatag, maingon sa buhi nga tubig, makaputli, makapahamugaway, ug makapalagsik sa kalag.

“Si Jesus wala magtunol sa ideya nga ang usa lamang ka giladmon sa tubig sa kinabuhi paigo na alang sa nagadawat. Siya nga makatitaw sa gugma ni Cristo magapadayon sa pagpangandoy sa dugang pa; apan siya dili na mangita pa ug lain. Ang mga bahandi, kadunganan, ug mga kalipayan sa kalibutan dili makadani kaniya. Ang kanunay nga tiyabaw sa iyang kasingkasing, Dugang pa Kanimo. Ug Siya nga magpadayag ngadto sa kalag sa panginahanglan niini nagapaabut aron sa pagtagbaw sa iyang kagutom ug kauhaw. Ang matag tawhanon nga tinubdan ug pagsalig mapakyas. Ang mga atabay mahubsan, ang mga linaw mahimong uga; apan ang atong Manunubos maoy usa ka dili mahurot nga tuburan. Mahimo kitang moinom, ug moinom pag-usab, ug kanunay makakaplag ug bag-ong tagana. Siya nga gipuyan ni Cristo adunay tuboran sa panalangin diha sa sulod sa iyang kaugalingon — ‘usa ka atabay sa tubig nga mobuswak ngadto sa kinabuhing walay katapusan.’ Gikan niini nga tinubdan kita mahimong makakuha ug kusog ug gracia nga paigo alang sa tanan niyang mga panginahanglan.”—*The Desire of Ages*, p. 187.

- b. Sama sa babayeng Samariahanon ug ang mga dumuloong sa kamingawan sa Exodus, sa unsang paagi nga kita kanunay mapakyas sa pag-ila sa kahibulongan nga gracia nga nagaagay gikan kang Cristo? Salmo 78:15, 16, 19, 20 (unang bahin); 114:7, 8 .

“Gibunalan ni Moises ang bato, apan ang Anak sa Dios mao kadto, nagtaptap sa panganod nga haligi, nagbarog tupad kang Moises, ug mihimo sa tubig nga naghatag ug kinabuhi sa pag-agus. Dili lamang si Moises ug ang mga anciano, kondili ang tibook katilingban nga nagbarog sa halayo, nakakita sa himaya sa Ginoo; apan kon ang panganod gikuha pa, sila unta mangamatay pinaagi sa makalilisang nga kasanag Niya nga nagpuyo didto.”—*Patriarchs and Prophets*, p. 298.

“Ang mapuangoron nga presensya ni Cristo diha sa Iyang pulong kanunay nakigsulti sa kalag, nagarepresentar Kaniya ingon nga atabay sa buhi nga tubig aron sa pagpalagsik sa giuhaw nga kalag. Maoy atong pribilehiyo ang pagbaton ug buhi, magapabilin nga Manluluwas. Siya ang tinubdan sa espirituhanong gahum nga gitisok sa sulod nato, ug ang Iyang inpluwensya modagayday diha sa mga pulong ug mga buhat, nga nagapalagsik sa tanan sulod sa natad sa atong inpluwensya, magapahimugso diha kanila ug mga tinguha ug mga pangandoy alang sa kusog ug kaputli, alang sa pagkabalaan ug kalinaw, ug alang nianang kalipay nga dili magdala ug kasubo uban niini. Kini ang resulta sa usa ka nagpuyo nga Manluluwas.”—*Testimonies to Ministers*, p. 390.

- a. Unsang bag-o nga suheto ang gihisgutan ni Jesus diha sa Iyang pagpagkig-storya sa babaye nga Samariahanon—ug giunsa niya pagtubag? Juan 4:16, 17 (unang bahin).
-

“Sa kalit giliso ni Jesus karon ang paghisgutanay. Sa dili pa kini nga kalag makadawat sa gasa nga iyang gihandom nga ihatag, kinahanglan nga siya madala sa pag-ila sa iyang sala ug sa iyang Manluluwas. Siya ‘miingon ngadto kaniya, Lakaw, tawaga ang imong bana, ug balik ngari.’ Siya mitubag, ‘Wala ako’y bana.’ Sa ingon sila naglaum sa paglikay sa tanang pangutana niana nga punto.”—*The Desire of Ages*, p. 187.

- b. Giunsa ni Jesus pagdugang ang iyang (sa babaye) tubag - ug sa unsa nga kini magpahinumdom kanato mahitungod sa tanan nga Iyang nahibaloan mahitungod sa matag usa kanato? Juan 4:17 (katapusang bahin), 18; Salmo 139:7, 8, 11, 12.
-

“Ang pagkadaku sa Dios alang kanato dili masabtan. ‘Ang trono sa Ginoo anaa sa langit’ (Salmo 11:4); apan pinaagi sa Iyang Espiritu anaa Siya presente bisan asa. Siya adunay usa ka suod nga kahibalo sa, ug usa ka personal nga interes diha, sa tanan nga mga buhat sa Iyang kamot.”—*Education*, p. 132.

“Ang langitnong mga manolonda nag-usisa sa buhat nga gibutang dinhi sa atong mga kamot; ug diin adunay usa ka pagbiya gikan sa mga prinsipyo sa kamatuoran, ‘nakulangan’ ang nahisulat diha sa mga talaan.”—*Child Guidance*, p. 155.

“Ang balaod sa Dios makatugkad sa mga pagbati ug mga motibo, ingon man sa panggawas nga mga buhat. Kini nagpadayag sa mga tinago sa kasingkasing, nga nagdan-ag sa kahayag sa mga butang sa wala pa ilubong sa kangitngit. Ang Dios nahibalo sa matag hunahuna, matag katuyoan, matag plano, matag motibo. Ang mga basahon sa langit nagrekord sa mga sala nga nahimo unta kon aduna untay kahigayonan. Dad-on sa Dios ang matag buhat ngadto sa paghukom, uban sa matag tinago nga butang. Pinaagi sa Iyang balaod Iyang gisukod ang kinaiya sa matag tawo. Maingon sa pintor nga magakopya sa hulagway sa nawong diha sa canvas, mao man ang mga bahin sa matag indibidwal nga kinaiya gibalhin ngadto sa mga libro sa langit. Ang Dios adunay hingpit nga hulagway sa kinaiya sa matag tawo, ug kini nga hulagway Iyang gitandi sa Iyang balaod. Iyang gipadayag ngadto sa tawo ang mga depekto nga makadaut sa iyang kinabuhi, ug nagtawag kaniya sa paghinulsol ug sa pagtalikod gikan sa sala.”—*The SDA Bible Commentary* [E. G. White Comments], vol. 5, p. 1085.

- a. Unsa may sa katapusang naamgohan sa babaye didto sa atabay mahitungod kang Jesus? Juan 4:19. Kadto ba nga pag-ila paigo?

“Ang tigpaminaw mikurog. Usa ka misteryosong kamot ang nagpakli sa mga panid sa kasaysayan sa iyang kinabuhi, nga nagpadayag nianang iyang gilauman nga tipigan nga matago hangtud sa kahangturan. Kinsa man Siya nga makabasa sa mga sekreto sa iyang kinabuhi? Dihay mitungha sa iyang mga hunahuna sa eternidad, sa umaabot nga Paghukom, diin ang tanan nga karon gitago igapadayag. Sa kahayag niini, ang konsensya mapukaw.

“Wala gayud siyay ikalimod; apan misulay siya sa paglikay sa tanang paghisgot sa usa ka suheto nga dili siya intresado. Uban sa lawom nga pagtahud, siya miingon, ‘Sir, nasabtan ko nga Ikaw usa ka propeta.’ Unya, naglaum sa pagpahilom sa konbiksyon, siya miliso ngadto sa mga punto sa relihiyosong kontrobersya. Kon kini usa ka propeta, siguradong makahatag Siya kaniya ug instruksiyon mahitungod niining mga butanga nga dugay nang gilalisan.”—*The Desire of Ages*, pp. 187, 188.

- b. Sa dihang ang babaye nagpakitag paglaum sa pag-abot sa Mesias, unsa ang gisulti ni Jesus kaniya? Juan 4:25, 26.

“Ang inbitasyon sa ebanghelyo kinahanglan nga dili pagamyon, ug ipresentar lamang ngadto sa pipila nga mga paborito, kinsa, sa atong pagtoo, mopasidungog kanato kon ilang dawaton kini. Ang mensahe kinahanglan ihatag ngadto sa tanan. Bisan asa nga ang kasingkasing abli sa pagdawat sa kamatuoran, si Cristo andam sa pagtudlo kanila. Iyang gipadayag ngadto kanila ang Amahan, ug ang pagsimba nga hinangponon ngadto Kaniya nga nagabasa sa kasingkasing. Alang sa ingon wala siya migamit ug mga samingay. Ngadto kanila, ingon ngadto sa babaye sa atabay, Siya miingon, ‘Ako nga nagasulti kanimo mao Siya.’”—*The Desire of Ages*, p. 194.

PERSONAL SUBLI NGA MGA PANGUTANA

Biernes, Pebrero 21

1. Nganong si Jesus wala gayud maghimog milagro alang sa Iyang kaugalingon?
2. Unsang tinubdan ang gigamit ni Jesus aron sa paggiya sa babayeng Samariahanon ngadto sa ebanghelyol?
3. Unsa ang gisulti sa Agalon mahitungod sa tubig sa kinabuhi?
4. Nganong gihisgotan ni Cristo ang personal nga kinabuhi sa babayeng Samariahanon?
5. Pagnalan ug usa ka saad nga may kalabutan sa pag-abot sa Mesias.

Unang Sabado nga Halad

Sabado, Marso 1, 2025



“Mga Anak sa Kinaiya” Sentro sa Edukasyon sa Romania

“Ang sayo nga edukasyon sa mga batan-on kasagarang naghulma sa ilang mga kinaiya alang sa kinabuhi.”—*Testimonies for the Church*, vol. 3, p. 135.

Ang inspirasyon nagsulti sa usa ka makapadasiq nga kasinatian sa dihang ang “katiguman sa mga kabataan, o kindergarten sa Biblia, nakahimog maayong buhat. Ang mga leksyon gihatag gisubli sa mga bata sa ilang mga panimalay, ug sa mga inahan ipakita ang ilang interes pinaagi sa pag-andam sa mga bata nga hapsay alang sa eskwelahan. Kasagaran sa mga bata mga anak sa mga ginikanan nga dili sa atong pagtoo.”—*Evangelism*, p. 583.

Ang “Children of Character” Education Center gitukod niadtong 2019 didto sa Fagaras, usa ka bukidnon nga ciudad sa Romania. Mga bata nga taliwala sa mga edad nga 2 ug 5 sa kanindot naugmad dinhi. Dugang pa sa mga kalihokan nga piho sa edad, sila makakat-on sa mga istorya sa Biblia, sa pag-ampo, sa pag-awit ug sa paghimo sa Dios nga ilang higala. Bisan bata pa sila, nakasabot sila niana nga ang Dios maoy nagkontrolar ug sila nakakat-on sa pagpangayo Kaniya alang sa tabang sa ilang mga problema. Ang ilang kinaiya gitukod adlaw-adlaw. Pinaagi sa gracia sa Dios atong makita ang talagsaong mga kausaban sa kinabuhi niining gagmayng mga bata. Alang sa umaabot, gusto namong tudloan kadtong kansang kahimtang dili motugot niini.

ISA unang tuig nagsugod mi sa 12 ka mga kabataan; sa ikaupat nga tuig namo adunay 32 ka mga kabataan, 31 kanila gikan sa gawas sa simbahan. Sa pagkakaran, ang kalihokan mahitabo sa 4 ka lawak nga gihatag sa Romanian Union punoang buhatan, apan kini napamatud-an nga naghutong tungod kay ang nagpalista lapas na sa atong kapasidad. Pinaagi niini, atong masabtan nga ang Dios gusto nga kita magpadayon ug mopalambo niining talagsaong kalihokan ug sa ingon makontak ang ingon ka daghan nga mga bata ug ilang mga pamilya kutob sa mahimo. Mao nga, kaniadtong 2021, usa ka piraso sa yuta ang gipalit sa gawas sa ciudad ug nakuha namo ang gikinahanglang permiso sa pagsugod sa pagtukod. Karon ang pundasyon napahimutang na. Kami mapasalamaton kaayo sa Dios tungod sa paghikap sa inyong mga kasingkasing — kaninyo nga nagtabang sa proyekto hangtud niining higayona ug kamo nga madagayaon buhata kini karon. Uban sa imong gasa, makahatag ka sa mga bata nga wala makaila sa Dios ug higayon nga makaduol Kaniya ug makadawat ug Cristohanong edukasyon. Naghangyo kami sa imong maayong kabubut-on ug sigurado nga dili ka magpabilin nga walay pagtagad, apan mosuporta kanato sa pagdala niini nga proyekto ngadto sa usa ka malampuson nga pagtapos ug dad-a kami sa imong mga pag-ampo usab.

Ang inyong mga igsoong lalake ug babaye gikan sa Romanian Union

Ang Pagkatawo sa Usa ka Misyonero

SAG-ULOHON NGA BERSIKULO: “Wala ba kamo manag-ingon: May upat pa ka bulan, ug unya moabut ang ting-ani? Ania karon, nagaingon ako kaninyo: Iyahat ninyo ang inyong mga mata, ug itan-aw ninyo sa kaumahan, nga mga maputi na aron pagaanihon” (Juan 4:35).

Gisugyot nga Basahon: *Testimonies for the Church*, vol. 5, pp. 182–187.

“Gisugdan na ni Jesus ang pagguba sa paril nga nabahin tali sa Judeo ug Gentil, ug sa pagsangyaw sa kaluwasan ngadto sa kalibutan. Bisan tuod Siya usa ka Judeo, Siya nakigsagol nga gawasnon sa mga Samariahanon, nga nagsalikway sa mga kostumbre sa mga Fariseo sa Iyang nasud.”—*The Desire of Ages*, p. 193.

1. BAG-ONG KINABUHI, BAG-ONG PRAYORIDAD

Domingo, Pebrero 23

- a. Sa pag-ila kang Jesus ingon nga Mesias, unsay diha-diha nga gibuhat sa Samariahanon nga babaye? Juan 4:28, 29.

“Ang babaye napuno sa kalipay samtang naminaw siya sa mga pulong ni Cristo. Ang talagsaon nga pagpadayag hilabihang gamhanan. Mibiya sa iyang tadyaw sa tubig, mibalik siya sa ciudad, aron sa pagdala sa mensahe ngadto sa uban. Nasayod si Jesus nganong nilakaw siya. Ang pagbiya sa iyang banga sa tubig nagsulti nga dili masayop bahin sa epekto sa Iyang mga pulong. Kini mao ang mainiton nga tinguha sa iyang kalag sa pagkuha sa buhi nga tubig; ug nakalimtan niya ang iyang katuyoan didto sa atabay, nakalimtan niya ang kauhaw sa Manluluwas, nga iyang gitinguha nga hatagan. Uban sa kasingkasing nga nagawas sa kalipay, siya midali sa iyang dalan, aron sa paghatag ngadto sa uban sa bilihon nga kahayag nga iyang nadawat.”—*The Desire of Ages*, p. 191.

- b. Unsa ang gibuhat sa mga lumolupyo sa Sicar sa pagkadungog nila sa pagpamatuod sa ilang katagilungsod? Juan 4:30.

“Ang mga pulong [sa babaye] nakatandog sa ilang mga kasingkasing. Adunay bag-ong pagpadayag sa iyang nawong, usa ka kausaban sa tibook niyang panagway. Interesado sila nga makita si Jesus.”—*Ibid.*

- a. Sa dihang nakita ni Jesus ang mga molupyo sa Sicar nga nanagpangabut, unsa may Iyang gisulti ngadto sa Iyang mga tinon-an? Juan 4:35-38.

“Siya nga nagaani,’ Siya miingon, ‘nagadawat ug suhol, ug magahipos ug mga bunga ngadto sa dayong kinabuhi: nga pareho siya nga nagapugas ug siya nga nagaani magkalipay sa tingub. Ug dinhi ang maong pinulongan matuod. Ang usa nagpugas, ug ang usa nag-ani.’ Dinhi gitumong ni Cristo ang Sagrado nga serbisyo nga angay himoon ngadto sa Dios pinaagi niadtong nakadawat sa ebanghelyo. Kinahanglan nga sila mao ang Iyang buhi nga mga ahensya. Iyang gipangayo ang ilang indibiduwal nga serbisyo. Ug kon kita man nagpugas o nag-ani, kita nagabuhat alang sa Dios. Ang usa nagasabulak sa binhi; ang lain nagahipos sa inani; ug pareho ang nagapugas ug ang nagaani magdawat sa suhol. Sila kauban magkalipay diha sa balus sa ilang pagtrabaho.”—*The Desire of Ages*, pp. 191, 192.

- b. Unsa man ang epekto sa pagpamatuod sa babaye mahitungod kang Cristo—ug unsa may atong makat-onan gikan sa kabug-aton nga nabatongan niini? Juan 4:39.

“Kon kita nahiusa kang Cristo, anaa kanato ang hunahuna ni Cristo. Kaputli ug gugma mosidlak diha sa kinaiya, ang kaaghup ug kamatuoran nagkontrolar sa kinabuhi. Ang ekspresyon mismo sa panagway mausab. Si Cristo nga magpabilin sa kalag adunay gahum sa pagbag-o, ug ang panggawas nga aspeto nagpamatuod sa kalinaw ug kalipay nga naghari sa sulod. Magainom kita diha sa gugma ni Cristo, ingon sa sanga nga nagakuha ug sustansya gikan sa punoan. Kon kita gisumpay diha kang Cristo, kon lanot sa lanot kita nahiusa uban sa Buhi nga Paras, kita mohatag ug ebidensiya sa kamatuoran pinaagi sa pagpamunga ug daghang pungpong sa buhing bunga. Kon kita konektado sa Kahayag, kita mahimong mga agianan sa kahayag, ug diha sa atong mga pulong ug mga buhat atong ipasibaw ang kahayag ngadto sa kalibutan. . . .

“Pinaagi sa pagtan-aw kita mahimong mausab; ug samtang kita mamalandong sa pagkahingpit sa diosnon nga Sulondan, kita magtinguha nga mahimong bug-os nga mausab, ug mabag-o diha sa dagway sa Iyang kaputli. Pinaagi sa pagtoo diha sa Anak sa Dios nga ang pagbag-o mahitabo diha sa kinaiya, ug ang anak sa kasuko mahimong anak sa Dios. Siya milabay gikan sa kamatayon ngadto sa kinabuhi; siya mahimong espirituhanon ug makaila sa espirituhanong mga butang. Ang kaalam sa Dios magpadan-ag sa iyang hunahuna, ug siya makakita sa mga katingalahang mga butang gikan sa Iyang balaod. Samtang ang tawo makabig pinaagi sa kamatuoran, ang buhat sa pagbag-o sa kinaiya magapadayon.”—*Selected Messages*, bk. 1, pp. 337, 338.

a. Unsang hangyo ang gihimo sa mga Samariahanon ngadto kang Jesus—ug ngano? Juan 4:40.

b. Ihulagway ang resulta sa panahon ni Cristo didto sa Samaria. Juan 4:41.

“Diha sa mga pulong nga gisulti ngadto sa babaye didto sa atabay, maayong binhi ang napugas, ug daw unsa ka dali nadawat ang ani. Miabot ang mga Samariahanon ug nakadungog kang Jesus, ug mitoo diha Kaniya. Midugok libot Kaniya didto sa atabay, sila misukitsukit Kaniya uban ang mga pangutana, ug sa kama-hinamon nakadawat sa Iyang mga pagpasabut sa daghang mga butang nga dili klaro ngadto kanila. Samtang sila naminaw, ang ilang kalibog nagsugod sa pagwagtang. Sama sila sa usa ka katawhan sa dakong kangitngit nga nagsubay sa kalit nga silaw sa kahayag hangtud nga ilang nakaplagan ang adlaw. Apan sila wala matagbaw niining mubo nga pakigtambo. Matinguhaon sila nga nakadungog pa ug dugang, ug aron ang ilang mga higala makapaminaw usab niining kahibulongan nga magtutudlo. Ilang gidapit Siya ngadto sa ilang ciudad, ug nagpakilooy Kaniya nga magpabilin uban kanila. Sulod sa duha ka mga adlaw Siya mipabilin sa Samaria, ug daghan pa ang mitoo Kaniya.”—*The Desire of Ages*, p. 192.

“Gipadayag ni Cristo ang Dios ngadto sa Iyang mga tinon-an sa paagi nga naghimo diha sa ilang mga kasingkasing sa usa ka pinasahi nga buhat, sama sa dugang na Niyang pag-awhag kanato sa pagtugot Kaniya sa pagbuhat diha sa atong mga kasingkasing. Adunay daghan nga, diha sa pagpabilin sa hilabihan diha sa teoriya, nawad-an sa panan-aw sa buhi nga gahum sa panig-ingnan sa Manluluwas. Sila nawad-an sa pagtan-aw Kaniya ingon nga mapainubsanon, magdumili sa kaugalingon nga magbubuhay. Unsa ang ilang gikinahanglan mao ang pagtan-aw kang Jesus. Adlaw-adlaw gikinahanglan nato ang bag-ong pagpadayag sa Iyang presensya.”—*Reflecting Christ*, p. 302.

c. Unsa ang gipahayag sa daghang mga Samariahanon human sa ilang pagdawat kang Jesus ingon nga mao ang Mesias? Juan 4:42.

“Ang mga Fariseo nagtamay sa kayano ni Jesus. Ilang gibaliwala ang Iyang mga milagro, ug nangayo ug ilhanan nga Siya mao ang Anak sa Dios. Apan ang mga Samariahanon wala mangayo ug ilhanan, ug si Jesus wala magbuhay ug mga milagro taliwala kanila, gawas sa pagbutyag sa mga sekreto sa iyang kinabuhi ngadto sa babaye sa atabay. Bisan pa niana daghan ang midawat Kaniya. Diha sa ilang bag-ong kalipay sila miingon ngadto sa babaye, ‘Karon mitoo na kami, dili tungod sa imong pulong: tungod kay kami mismo nakadungog kaniya, ug nahibalo nga kini mao gayud ang Cristo, ang Manluluwas sa kalibutan.’”—*The Desire of Ages*, pp. 192, 193.

- a. Diha sa unsang tagna nga ang mga Samariahanon nagapasukad sa ilang pagtoo diha sa gisaad nga Mesias? Genesis 49:10.
-

“Ang mga Samariahanon mitoo nga ang Mesias moabut ingon nga Manunubos, dili lamang sa mga Judeo, kondili sa kalibutan. Ang Balaang Espiritu pinaagi kang Moises nagtagna Kaniya ingon nga propeta nga gipadala gikan sa Dios. Pinaagi kang Jacob kini gipahayag na ngadto Kaniya ang pagtigom sa mga katawhan; ug pinaagi kang Abraham, nga diha Kaniya ang tanang mga nasud sa yuta mapanalanginan. Dinhi niini nga mga kasulatan ang katawhan sa Samaria nagbasi sa ilang pagtoo diha sa Mesias. Ang kamatuoran nga ang mga Judeo nasayop sa pagsabut sa ulahi nga mga propeta, naglambigit ngadto sa unang pag-anhi ang himaya sa ikaduhang pag-anhi ni Cristo, nagdala sa mga Samariahanon sa pagsalikway sa tanang sagradong mga sinulat gawas niadtong gihatag pinaagi kang Moises. Apan samtang giwagtang sa Manluluwas kining sayop nga mga pagpanabut, daghan ang midawat sa ulahi nga mga tagna ug sa mga pulong ni Cristo mismo mahitungod sa gingharian sa Dios.”—*The Desire of Ages*, p. 193.

- b. Unsay atong makat-onan karon gikan sa kamatuoran nga ang mga Samariahanon katingalahan kaayo nga abli ngadto sa kamatuoran? Ecclesiastes 11:4, 5.
-

“Sa tibook kalibutan ang mga lalake ug mga babaye nagtan-aw nga mahinamon ngadto sa langit. Mga pag-ampo ug mga luha ug mga pangutana misaka gikan sa mga kalag nga nangandoy sa kahayag, alang sa gracia, alang sa Espiritu Santo. Daghan ang anaa sa ngilit sa gingharian, naghulat lamang nga pagatigumon.”—*The Acts of the Apostles*, p. 109.

- c. Unsa ang mahitabo sa mga indibiduwal kon sila tinuoray nga modawat kang Cristo? Paghatag ug mga panig-ingnan. Marcos 5:18–20; 7:31–37.
-

“Ang Espiritu [ni Cristo] mopalambo diha sa tawo sa tanan nga makapatuboy sa kinaiya ug magpahalangdon sa kinaiya. Kini magtukod sa tawo alang sa kahimayaan sa Dios diha sa lawas ug kalag ug espiritu. . . . Ug ang mga kalag nga gipaubos ngadto sa mga instrumento ni Satanas pinaagi gihapon sa gahum ni Cristo nga giusab ngadto sa mga mensahero sa pagkamatarung, ug gipadala sa Anak sa Dios aron sa pagsulti unsa nga ‘dagkong mga butang ang nahimo sa Ginoo alang kanimo, ug nalooy kanimo.’ ”—*The Desire of Ages*, p. 341.

- a. Unsang leksyon ang atong makat-onan gikan sa babaye nga Samariahanon? 1 Juan 1:1-3; 2 Corinto 5:14 (unang bahin).

“Sa diha nga iyang nakaplagan ang Manluluwas ang babayeng Samariahanon nagdala ug uban ngadto Kaniya. Iyang napamatud-an ang iyang kaugalingon nga mas epektibo nga misyonero kay sa Iyang kaugalingon nga mga tinon-an. Ang mga tinon-an walay nakita diha sa Samaria nga timailhan nga kini maoy usa ka makapadasig nga kaumahan. Ang ilang mga hunahuna natumong sa usa ka daku nga buhat nga buhaton sa umaabot. Wala nila makita nga diha mismo sa ilang palibot anaa ang alanihan nga kinahanglan nga hipuson. Apan pinaagi sa babaye nga ilang gitamay, ang tibook ciudad nadala aron sa pagpaminaw sa Manluluwas. Gidala niya ang kahayag diha dayon ngadto sa iyang mga katagilungod.

“Kini nga babaye nagrepresentar sa buhat sa usa ka praktikal nga pagtoo kang Cristo. Ang matag tinuod nga tinon-an natawo sa gingharian sa Dios isip usa ka misyonero. Siya ang nagainom sa tubig nga buhi nahimong tuburan sa kinabuhi. Ang magdadawat nahimong maghahatag. Ang gracia ni Cristo diha sa kalag mahimong ingon sa usa ka tuburan sa kamingawan, nga nag-agas aron sa pagpalagsik sa tanan, ug maghimo niadtong andam na sa pagkahanaw matinguhaon sa pag-inom sa tubig sa kinabuhi.”—*The Desire of Ages*, p. 195.

- b. Sa unsang paagi kini nga kasinatian makadasig kanato karon? Ecclesiastes 11:6.

“Dili kinahanglan nga moadto kita sa langyaw nga kayutaan aron mahimong mga misyonero sa Dios. Tanan sa atong palibot mao ang mga umahan nga ‘hinog na aron anihon,’ ug bisan kinsa ang mobuot magtigom ug ‘bunga ngadto sa kinabuhing dayon.’ Ang Dios nagtawag sa daghan diha sa Battle Creek kinsa nangamatay sa espirituhang katapulan sa pag-adto diin ang ilang paghago gikinahanglan diha sa Iyang kawasa. Panggawas kamo sa Battle Creek, bisan pa kon kini nanginahanglan ug sakripisyo sa salapi. Adto sa usa ka dapit aron mahimong panalangin alang sa uban. Lakaw diin ikaw makapalig-on sa pipila ka maluyahon nga iglesia. Gamita ang gahum nga giहतag sa Dios kanimo.”—*Testimonies for the Church*, vol. 5, p. 187.

PERSONAL SUBLI NGA MGA PANGUTANA

1. Unsa ang gibuhay sa babaye sa dihang iyang nakita si Jesus ingon nga bugtong Manluluwas?
2. Isaysay kon unsay gipasabut pinaagi sa kaumahan nga hinog na alang sa pag-ani.
3. Pila ka adlaw nga nagpabilin si Jesus sa mga Samariahanon?
4. Unsang pagpamatuod ang gihatag sa mga Samarianhon mahitungod kang Jesus?
5. Unsa ang mahitabo sa mga tawo sa diha nga sila makadawat ni Jesus sa ilang mga kinabuhi?

Si Jesus ug ang Anak nga Lalake sa Tawo nga Halangdon

SAG-ULOHON NGA BERSEKULO: “Karon alang kaniya nga arang makahimo ug labaw gayud sa labing madagayaon nga labaw sa tanan nga atong gipangayo kun gihunahuna, sumala sa gahum nga nagabuhat sa sulod nato. Kaniya ang himaya diha sa iglesia, ug diha kang Cristo Jesus, alang sa tanan nga mga kaliwatan ngadto sa mga katuigan nga walay katapusan. Amen” (Efeso 3:20, 21).

Gisugyot nga Basahon: *Testimonies for the Church*, vol. 9, pp. 107, 108, 164–166.

“Dili tungod kay atong nakita o gibati nga ang Dios naminaw kanato mao nga kita motoo. Kita kinahanglan nga mosalig diha sa Iyang mga saad. Sa dihang kita moduol Kaniya diha sa pagtoo, matag pangamuyo mosulod sa kasingkasing sa Dios. Kon kita nangayo sa Iyang panalangin, kinahanglan nga kita motoo nga atong madawat nato kini, ug magpasalamat Kaniya nga nadawat nato kini. Unya kita mobuhat sa atong mga katungdanan, gipasaligan nga ang panalangin matuman sa dihang kini atong gikinahanglan gayud kaayo.”—*The Desire of Ages*, p. 200.

1. MAGAKUHA UG ATENSYON

Domingo, Marso 2

- a. Human sa paggamit ug duha ka mga adlaw uban sa mga Samariahanon, diin man si Jesus miadto - ug kinsa ang nadani pinaagi niini nga balita? Juan 4:43–46.

“Ang balita sa pagbalik ni Cristo ngadto sa Cana sa wala madugay mikuyanap sa tibook Galilea, nga nagdala ug paglaum ngadto sa nanag-antus ug gisakit. Didto sa Capernaum ang mga balita nakadani sa atensyon sa usa ka Judeo nga halangdon nga tawo nga usa ka opisyal diha sa serbisyo sa hari.”—*The Desire of Ages*, p. 196.

- b. Ngano nga ang opisyal miadto sa pagpakigta kang Jesus? Juan 4:47.

Usa ka anak sa opisyal nag-antus gikan sa gituohan nga wala nay kaayohan nga sakit. Mga mananambal misurender na kaniya aron mamatay; apan sa dihang ang amahan nakadungog kang Jesus, siya determinado sa pagpangitag tabang gikan Kaniya.”—*Ibid.*, p. 197.

- a. Ihulagway giunsa ni Cristo pagpadayag ang sulodnon nga pag-agulo sa kasingkasing diha sa halangdon nga tawo nga naghangyo Kaniya sa pag-ayo sa iyang anak nga lalake didto sa Capernaum. Juan 4:48.

“Ang bata hilabihan na ka luya, ug, gikahadlok, nga dili na buhi hangtud sa iyang pagbalik; apan ang tawo nga halangdon nagabati nga kinahanglan nga sa personal iyang isulti ang iyang kahintang. Siya naglaum nga ang pangalyupo sa usa ka amahan makapukaw sa kalooy sa Dakung Mananambal.

“Sa iyang pag-abut sa Cana iyang nakaplagan nga usa ka duot sa katawhan nagpalibut kang Jesus. Uban ang matinguhaon nga kasingkasing siya midutdot ngadto sa presensya sa Manluluwas. Ang iyang pagtoo naluya sa dihang iyang nakita lamang ang usa ka yano ug pamisti nga tawo, abugon ug gisul-ob sa pagbiyahe. Nagduhaduha siya nga kining Tawhana makahimo sa butang nga maoy iyang pangayoon Kaniya; apan nakahuha siya ug pagpakighinabi kang Jesus, nagtugan sa iyang katuyoan, ug naghangyo sa Manluluwas sa pagkuyog kaniya ngadto sa iyang puloy-anan. Apan ang iyang kasub-anan nahibaloan ni Jesus. Sa wala pa mohawa ang opisyal sa iyang puloy-anan, ang Manluluwas nakakita na sa iyang kasakitan.

“Apan Siya nasayud usab nga ang amahan, diha sa iyang kaugalingon nga hunahuna, naghimo ug mga kondisyon mahitungod sa iyang pagtoo diha kang Jesus. Gawas nga ang iyang hangyo ihatag, siya dili modawat Kaniya ingon nga Mesias.

...

“Bisan pa sa tanan nga ebedensya nga si Jesus mao ang Cristo, ang nangamuyo determinado sa paghimo sa iyang pagtoo diha Kaniya nga kondisyonal diha sa paghatag sa iyang kaugalingon nga hangyo.”—*The Desire of Ages*, pp. 197, 198.

- b. Sa dihang matintal sa pagpangayo ug mga ilhanan, unsay angay natong hinumdoman? Mateo 12:38, 39

“Si Cristo nasakitan nga ang Iyang kaugalingon nga katawhan, kang kinsa ang Sagrado nga mga Oraculo gitugyan, mapakyas sa pagpaminaw sa tingog sa Dios nagpakigsulti ngadto kanila diha sa Iyang Anak.”—*Ibid.*, p. 198.

“Ang katawhan gusto ug ilhanan, maingon sa kaadlawan ni Cristo. Unya ang Ginoo misulti kanila nga walay ilhanan nga igahatag kanila. Ang ilhanan nga igapakita karon ug sa kanunay mao ang pagbuhat sa Balaang Espiritu diha sa hunahuna sa magtutudlo, sa paghimo sa Pulong nga impresibo kon mahimo. Ang Pulong sa Dios dili usa ka patay, uga nga teoriya, kon dili espiritu ug kinabuhi. Si Satanas walay laing gusto kay sa pagdala sa mga hunahuna palayo gikan sa Pulong sa Dios, sa pagpangita ug pagdahum sa mga butang nga wala diha sa Pulong nga maoy ilang bation.”—*Selected Messages*, bk. 2, p. 95.

- a. Isaysay ang kalainan tali sa mga Judeo ug Samariahanon mahitungod sa ilang pagtoo ni Jesus. Marcos 6:2-6; Juan 4:40-42.

“Daw unsa ka matinguhaon ang mga Fariseo sa pagproyba nga si Cristo usa ka maglilimbong! Giunsa nila ang pagbantay sa Iyang matag pulong, naninguha sa sayop nga paghulagway ug sayop nga paghubad sa tanan Niyang mga pulong! Ang garbo ug pagpihig ug kasuko nagsira sa matag agianan sa kalag batok sa pagpamatuod sa Anak sa Dios. Sa diha nga Siya sa katin-aw nagbadlong sa ilang pagkadautan ug mipahayag nga ang ilang mga buhat nagpamatuod kanila ingon nga mga anak ni Satanas, sila sa kasuko misalikway sa akusasyon, nga nag-ingon, ‘dili ba husto kami sa among pag-ingon nga ikaw Samariahanon, ug giyawaan?’”—*Selected Messages*, bk. 1, p. 70.

“Ang Manluluwas nagtandi niining masukitsukiton nga pagkawalay pagtoo uban sa yano nga pagtoo sa mga Samariahanon, nga wala mangayo ug milagro o ilhanan. Ang Iyang pulong, ang kanunay nga ebidensiya sa Iyang pagka-Dios, adunay usa ka makapadani nga gahum nga mosulod sa ilang mga kasingkasing.”—*The Desire of Ages*, p. 198.

“Bisan tuod [si Jesus] usa ka Judeo, Siya gawasnon nga nakig-uban sa mga Samariahanon, nga nagsalikway sa Fariseo nga mga kostumbre sa mga Judeo mahitungod niining tinamay nga katawhan. Siya natulog ilalum sa ilang mga atop, mikaon diha sa ilang mga lamesa, ug nagpanudlo sa ilang mga kadalanan.”—*The Acts of the Apostles*, p. 19.

- b. Ihulagway ang kasinatian sa daghan nga misulti sa presente nga kamatuoran ngadto sa nag-angkon nga katawhan sa Dios latas sa mga katuigan. Jeremias 20:8-11.

“Ang tanang argumento nga gihimo batok kang Cristo gipasukad diha sa kabakakan. Mao usab sa kaso ni Esteban, ug ni Pablo. Apan ang labing huyang ug labing dili kasaligan nga mga pahayag nga gihimo diha sa sayup nga panig adunay inpluwensya, tungod kay dihay daghan kaayo kinsang mga kasingkasing wala mabalaan, kinsa nagtinguha niadto mga pahayag ingon nga tinuod. Kanang mga ingon kanunay nga matinguhaon sa pagkuha diha sa bisan unsa nga gituohan nga sayop o kasaypanan niadtong nagsulti kanila sa dili magustohan nga kamatuoran.

“Dili nato ikatingala kon ang dautang mga pangaggpas sa kahangol gisakmit ingon nga dili kaduhaduha-an nga mga kamatuoran niadtong adunay gana sa kabakakan. Ang mga magsusupak ni Cristo balik-balik nga napalibog ug napahilom sa kaalam sa Iyang mga pulong; apan sila sa gihapon mahinamon nga naminaw sa matag hungihong, ug nakakaplag ug pipila ka pasangil aron sa pagpangutana Kaniya pag-usab uban sa masupakon nga mga pangutana.”—*Selected Messages*, bk. 1, pp. 70, 71.

- a. Sa dihang ang pagtoo sa halangdon nga tawo mikupot kang Cristo, giunsa niya pagsubli ang iyang hangyo? Juan 4:49.

“Sama sa siga sa kahayag, ang mga pulong sa Manluluwas ngadto sa tawo nga halangdon nagpadayag sa iyang kasingkasing. Iyang nakita nga ang iyang mga motibo diha sa pagpangita kang Jesus usa ka hinakog. Ang iyang paling-paling nga pagtoo nadayag ngadto kaniya diha sa tinuod nga kinaiya niini. Diha sa iyang halawom nga kabalisa iyang naamgohan nga ang iyang pagduhaduha mahimong hinungdan pagkawala sa kinabuhi sa iyang anak. Siya nahibalo nga siya anaa sa atubangan sa Usa nga makahimo sa pagbasa sa mga hunahuna, ug kang kinsa ang tanang butang posible. . . . Ang iyang pagtoo migunit kang Cristo sama sa gihimo ni Jacob, sa dihang, nakigbugno sa Manolonda, siya mituaw, Dili ko Ikaw buhian, gawas nga Imo akong panalanginan.’ Genesis 32:26.”—*The Desire of Ages*, p. 198.

- b. Unsay atong makat-onan gikan sa gibuhat ni Jesus imbes nga moadto sa pu-loy-anan sa tawo nga halangdon? Juan 4:50.

“Si Jesus adunay mas dakung gasa nga ihatag. Siya nagtinguha, dili lamang sa pag-ayo sa bata, kondili sa paghimo sa opisyal ug sa iyang panimalay nga mga uma-lambit sa mga panalangin sa kaluwasan, ug sa pagdagkot ug kahayag sa Capernaum, nga sa dili madugay mahimong uma sa Iyang kaugalingong mga kahago. Apan ang halangdon nga tawo kinahanglan makaamgo sa iyang panginahanglan sa dili pa siya magtinguha sa gracia ni Cristo. Kini nga alagad sa palasyo nagrepresentar sa daghan sa iyang nasud. Sila interesado diha kang Jesus tungod sa hakog nga mga motibo. Naglaum sila nga makadawat ug espesyal nga kaayohan pinaagi sa Iyang gahum, ug ilang gipunting ang ilang pagtoo sa paghatag niining temporaryo nga pabor; apan sila ignorante mahitungod sa ilang espirituhanong sakit, ug wala makakita sa ilang panginahanglan sa balaanong gracia. . . .

“Ang Manluluwas dili makapalayo gikan sa kalag nga migunit kaniya, nangaliyupo sa iyang daku nga panginahanglan. ‘Lakaw sa imong dalan,’ Siya miingon; ‘ang imong anak buhi.’ Ang halangdon nga tawo mibiya sa presensya sa Manluluwas uban ang kalinaw ug kalipay nga wala pa niya mahibaloi kaniadto. Dili lamang siya nagtoo nga ang iyang anak mamaayo, apan uban sa malig-on nga pagsalig siya misalig kang Cristo ingon nga mao ang Manunubos.”—*Ibid.*, pp. 198, 199.

“Kitang tanan nagtinguha sa diha-diha ug direkta nga mga tubag sa atong mga pag-ampo, ug matintal nga mawad-an sa kadasig kon ang tubag malangan o moabut sa usa ka wala makita nga porma. Apan ang Dios maalam ug maayo kaayo nga motubag sa atong mga pag-ampo kanunay sa oras ug sa paagi nga gusto nato. Iyang buhaton ang labaw pa ug mas maayo alang kanato kay sa pagtuman sa tanan natong mga pangandoy. . . . Kini nga mga kasinatian nga nagsulay sa pagtoo para sa atong kaayohan.”—*The Ministry of Healing*, pp. 230, 231.

- a. Diha sa unsang paagi nga giayo ni Jesus ang anak sa tawo nga halangdon? Juan 4:51-53. Unsang katinuoran nga kini magtawag sa hunahuna? Efeso 3:20, 21.

“Diha sa maong takna sa dihang ang pagtoo sa amahan nakabaton sa kasiguroan, ‘Ang Imong anak buhi,’ ang diosnong gugma mitandog sa himatyon nga bata.”—*The Desire of Ages*, p. 199.

“Sa samang takna ang mga nagbantay tupad sa himatyon nga bata sa balay sa Capernaum nakakita ug kalit ug misteryosong kausaban. Ang landong sa kamatayon gikuha gikan sa nawong sa nag-antus. Ang pagkawala sa hilanat maoy naghatag ug lugar sa masanag nga pagbalik sa maayong panglawas. Ang madulom nga mga mata nga gihayagan uban sa salabutan, ug ang kalig-on mibalik ngadto sa nagluya, niwang nga hitsura. Walay mga timailhan sa iyang sakit nga nagpabilin diha sa bata. Ang iyang nagdilaab nga unod nahimong humok ug gisingot, ug nahinanok siya sa hilom nga pagkatulog. Ang hilanat mibiya kaniya diha sa init kaayo nga adlaw. Ang pamilya nahingangha, ug daku kaayo ang pagmaya.”—*Ibid.*

- b. Giunsa pagtubag ni Jesus ang si bisan kinsa nga nangayo ug tabang? Mateo 11:28-30.

“Ang Manluluwas dili makapalayo gikan sa kalag nga motapot Kaniya, nga mangamuyo sa iyang dakung panginahanglan.”—*Ibid.*, p. 198.

“Gibati ba nimo nga tungod kay ikaw usa ka makasasala dili ka makalaum sa pagdawat ug panalangin gikan sa Dios? Hinumdomi nga si Cristo mianhi sa kalibutan aron sa pagluwas sa mga makasasala. Wala kitay unsa man nga makarekomendar kanato ngadto sa Dios; ang pangamuyo nga atong mahimo karon ug sa kanunay mao ang atong walay mahimo nga kahintang, nga naghimo sa Iyang matuboson nga gahum nga kinahanglanon. Magsalikway sa tanang pagsalig sa kaugalingon, kita mahimong motan-aw ngadto sa krus sa Kalbaryo ug moingon:

“ ‘Sa akong kamot walay bili nga akong dad-on; Sa Imong krus lamang ako mo-gunit.’ ”—*The Ministry of Healing*, p. 65.

PERSONAL SUBLI NGA MGA PANGUTANA

Biernes, Marso 7

1. Ngano nga ang mga propeta sa kasagaran dili kaayo gidawat sa ilang kaugalingon nga mga yuta??
2. Unsang mga pulong sa halangdon nga tawo ang nagpadayag sa iyang pagkawalay pagtoo?
3. Unsay reaksyon ni Cristo ngadto sa pagkawalay pagtoo sa mga tawo?
4. Kinsa ang nagpakitag mas dakung pagtoo kang Jesus — ang mga Judeo o ang mga Gentil?
5. Unsa ang gisaad ni Jesus sa tanan nga midawat sa Iyang pagdapit?

Si Jesus ug ang Paralitiko sa Betsaida

SAG-ULOHON NGA BERSEKULO: “Apan si Jesus mingtubag kanila: Ang akong Amahan nagabuhat bisan hangtud karon, ug ako nagabuhat” (Juan 5:17).

Gisugyot nga Basahon: *Testimonies for the Church*, vol. 1, pp. 560–567.

“Ang buhat ni Cristo sa pag-ayo sa masakiton anaa sa hingpit nga kauyon sa kasugoan. Kana nagpasidungog sa Adlawng Igpapahulay.”—*The Desire of Ages*, p. 207.

1. ANG MAKAAYO NGA MGA TUBIG

Domingo, Marso 9

- a. Alang sa unsang tuyo nga ang daghang mga tawo nga bakol nangadto sa Jerusalem? Juan 5:2, 3.

- b. Unsang pagtoo ang nabatonan sa mga tawo palibut sa linaw sa Betsaida? Juan 5:4.

“Sa piho nga mga panahon ang mga tubig niini nga linaw ginakutaw, ug kini kasagaran nga gituohan nga kini mao ang resulta sa labaw sa kinaiyahan nga gahum, ug nga bisan kinsa nga unang nakatunob ngadto sa tubig human sa pagkutaw sa linaw, mamaayo siya sa bisan unsang sakit nga anaa kaniya. Gatusan sa mga nag-antus ang mibisita sa maong dapit; apan hilabihan ka daghan sa mga tawo sa diha nga ang tubig gikutaw nga sila nag-inilugay sa unahan, nga nagyatak sa mga lalake, mga babaye, ug mga bata, nga mas mahuyang kay sa ilang kaugalingon. Daghan ang dili makaduol sa linaw. Daghan kinsa milampas sa pagkab-ot niini namatay sa ngilit niini. Ang mga puy-anan kaniadto gipatindog libot sa dapit, aron ang mga masakiton mapanalipdan gikan sa kaniini sa adlaw ug sa katugnaw sa kagabhion. Adunay pipila nga migamit sa gabii niini nga mga portiko, nga nagakamang sa daplin sa linaw adlaw-adlaw, diha sa kawang nga paglaum sa kaayohan.”—*The Desire of Ages*, p. 201.

- c. Sa unsang paagi ang interaksyon tali ni Jesus ug sa usa ka tawo sa dawan magsugod? Juan 5:5–7.

- a. Unsang imposible sa tawo nga tahas ang gimando ni Jesus nga buhaton sa paralitiko – ug uban sa unsang mga resulta? Juan 5:8, 9 (unang bahin).

“Si Jesus wala maghangyo niini nga nag-antus sa pagpakita ug pagtoo diha Kaniya. Siya yano nga nag-ingon, ‘Bangon, pas-ana ang imong higdaanan, ug lakaw.’ Apan ang pagtoo sa tawo mikupot nianang pulong. Ang matag ugat ug maskulo naghinamhinam uban sa bag-ong kinabuhi, ug ang mahimsog nga aksyon miabut sa iyang bakol nga mga bukton. Sa walay pagduhaduha iyang gipahalona ang iyang kabubut-on sa pagsunod sa mando ni Cristo, ug ang tanan niyang kaunoran mitubag sa iyang kabubut-on. Midagayday ngadto sa iyang mga tiil, nakita niya ang iyang kaugalingon nga usa ka aktibo nga tawo.

“Si Jesus wala maghatag kaniya ug kasiguroan sa diosnong tabang. Ang tawo mahimong mohunong diha sa pagduhaduha, ug mawad-an sa iyang usa ka higayon sa pagkaayo. Apan siya mitoo sa pulong ni Cristo, ug diha sa paghimo niini siya nakadawat ug kusog.”—*The Desire of Ages*, pp. 202, 203.

- b. Sa unsang espirituhanong kahimtang nga ang mga tawo nga nahimulag gikan kang Cristo makakaplag sa ilang kaugalingon? Isaias 1:5, 6; Roma 7:24.

“Pinaagi sa sala kita nahimulag gikan sa kinabuhi sa Dios. Ang atong mga kalag nahimong naparalisar. Sa atong mga kaugalingon dili na makahimo sa pagkinabuhi sa usa ka balaan nga kinabuhi kay sa usa ka bakol nga tawo nga makahimo sa paglakaw. Adunay daghan nga nakaamgo sa ilang pagka-walay mahimo, ug kinsa nangandoy nianang espirituhanong kinabuhi nga modala kanila ngadto sa pagpakig-harmoniya sa Dios; sila sa kawang naningkamot sa pagbaton niini.”—*Ibid.*, p. 203.

- c. Unsa ang bugtong tambal alang sa ingon ana nga kahimtang? Buhat 9:34.

“Ang Manluluwas miduko ibabaw sa pinalit sa Iyang dugo, nag-ingon uban sa dayag nga kalumo ug kalooy, ‘Buot ka ba nga mamaayo?’ Siya mimando kanimo sa pagbangon diha sa kahimsog ug kalinaw. Ayaw paghulat nga mobati nga ikaw nahimo nga maayo na. Tuohi ang Iyang pulong, ug kini matuman. Ibutang ang imong kabubut-on diha sa kiliran ni Cristo. Kabubut-on sa pag-alagad Kaniya, ug diha sa pagbuhat sa Iyang pulong ikaw makadawat kusog. Bisan unsa pa ang dautan nga buhat, ang nagahari nga pagbati nga pinaagi sa taas nga pagpatuyang nagbugkos sa kalag ug lawas, si Cristo makahimo ug nagtinguha sa pagluwas. Iyang hatagan ug kinabuhi ang kalag nga ‘patay diha sa mga kalapasan.’Efeso 2:1. Iyang buhian ang binihag nga gipugngan pinaagi sa kaluyahon ug kaalautan ug mga kadena sa sala.”—*Ibid.*

- a. Sa unsang paagi nga si Cristo magatabang kanato sa pagdaug? Efeso 2:1-6.

“Ang tawo natural gayud nga inklinado sa pagsunod sa mga sugyot ni Satanang, ug dili siya magmalampuson sa pagsukol sa hilabihan ka teribli nga kaaway gawas nga si Cristo, ang gamhanan nga Mananaug, magapuyo diha kaniya, magagiya sa iyang mga handum, ug magahatag kaniya ug kusog. . . . Si Satanang mas nasayud kay sa katawhan sa Dios sa gahum nga ilang mabatonan ibabaw kaniya sa dihang ang ilang kusog anaa diha kang Cristo. Sa dihang sila sa mapaubsanon magahangyo sa gamhanan nga Mananaug alang sa panabang, ang pinakahuyang nga tumotuo diha sa kamatuoran, nga magasalig nga malig-on diha kang Cristo, malampuson nga magapakgang kang Satanang ug sa tanan niyang mga panon.”—*Testimonies for the Church*, vol. 1, p. 341.

“Kinahanglan nga mokat-on kita kang Cristo. Kinahanglan mahibalo kita kon unsa Siya alang niadtong Iyang gilukat. Kinahanglan nga atong masabtan nga pinaagi sa pagtoo diha Kaniya maoy atong pribilehiyo nga pag-ambit sa diosnong kinaiya, ug sa ingon makaikyasa sa kadunotan nga anaa sa kalibutan pinaagi sa pangibog. Unya kita mahinloan gikan sa tanang sala, tanang depekto sa kinaiya. Dili kita angay nga magbaton ug usa ka dautang kahiligan. . . .

“Sa dihang kita makaambit sa diosnong kinaiya, ang napanunod ug naugmad nga kahiligan ngadto sa sayop maputol gikan sa kinaiya, ug kita mahimong usa ka buhi nga gahum alang sa maayo. Kanunay nagakat-on sa diosnong Magtutudlo, sa matag adlaw magaambit sa Iyang kinaiya, kita nakigtimbayayong sa Dios diha sa pagdaug sa mga tentasyon ni Satanang. Ang Dios magabuhat, ug ang tawo magabuhat, aron nga ang tawo mahiusa uban kang Cristo maingon nga si Cristo usa uban sa Dios. Unya kita molingkod kauban kang Cristo diha sa langitnong mga dapit. Ang hunahuna nakapahulay uban sa kalinaw ug kasigurohan diha kang Jesus.”—*The Review and Herald*, April 24, 1900.

- b. Hubita amg kalinaw nga mitungha pinaagi sa kusog gikan kang Cristo. Roma 8:3-6.

Matag anak mabuhi pinaagi sa kinabuhi sa iyang amahan. Kon kamo mga anak sa Dios, gipanganak kamo pinaagi sa Iyang Espiritu, kamo magkinabuhi pinaagi sa kinabuhi sa Dios. . . . [Ug] ang kinabuhi ni Jesus mahimong maipakita ‘diha sa atong mamalatyon nga unod’ (2 Corinto 4:11). Kana nga kinabuhi diha kaninyo mohatag ug sama nga kinaiya ug magpakita ug sama nga mga buhat maingon sa nahimo diha Kaniya. Sa ingon kamo mahimong maharmoniya uban sa matag kalagdaan sa Iyang kasugoan; tungod kay ‘ang kasugoan sa Dios hingpit, nagapabag-o sa kalag.’ Salmo 19:7, margin. Pinaagi sa gugma ‘ang pagkamatarung sa kasugoan’ mahimong ‘matuman dinhi kanato, nga wala magkinabuhi diha sa unod, kon dili sa Espiritu.’ Roma 8:4.”—*Thoughts From the Mount of Blessing*, p. 78.

- a. Wala motagad sa panalangin nga gihatag diha sa paralitiko, ngano man nga ang mga Fariseo nangasuko? Juan 5:9 (katapusang bahin), 10.

“Samtang [ang naayo nga paralitiko] nagdali sa iyang paglakaw uban ang lig-on, gawasnong lakang, nagdayeg sa Dios ug nagmaya sa iyang bag-ong nakaplagan nga kusog, iyang nahimamat ang pipila sa mga Fariseo, ug diha-diha gisultihan sila sa iyang pagkaayo. Natingala siya sa kabugnaw sa ilang pagpaminaw sa iyang estorya.

“Uban sa nagkisdong nga kilay ilang gibalda siya, nangutana ngano nga siya nagdala sa iyang higdaanan sa adlaw nga Igpapahulay. Sila hugot nga nagpahinumdom kaniya nga kini dili uyon sa balaod ang pagpas-an sa mga palas-anon sa adlaw sa Ginoo. Sa iyang kalipay ang lalake nakalimot nga kadto Adlaw nga Igpapahulay; apan wala siya mibati ug kondinasyon tungod sa pagsunod sa sugo sa Usa nga adunay ingon nga gahum gikan sa Dios. Nitubag siya nga maisugon, ‘Siya nga nag-ayo kanako, siya miingon kanako, pas-ana ang imong higdaanan, ug lakaw.’ Nangutana sila kon kinsa ang nagbuhat niini, apan wala siya makahimo sa pagsulti. Kini nga mga pangulo nahibalo kaayo nga Usa lamang ang nagpakita sa Iyang kaugalingon nga makahimo sa pagbuhat niini nga milagro; apan nangandoy sila ug direktang pamatuod nga si Jesus kadto, aron ilang mahukman Siya ingon nga usa ka malapason sa Igpapahulay. Sa ilang hukom wala lamang niya gilapas ang balaod sa pag-ayo sa masakiton sa Igpapahulay, kon dili nakahimo ug pagpasipala sa pagsugo kaniya nga dad-on ang iyang higdaanan.”—*The Desire of Ages*, pp. 203, 204.

- b. Unsa ang gibuhat sa mga Judeo sa Adlaw nga Igpapahulay? Mateo 23:4.

“Ang mga Judeo mituis pag-ayo sa balaod nga ilang gihimo kini nga usa ka yugo sa pagkaulipon. Ang ilang walay kahulogan nga mga kinahanglanon nahimong usa ka pagya taliwala sa ubang mga nasud. Ilabi na ang Adlaw nga Igpapahulay gilibutan sa tanang matang sa hinungdan nga mga pagdili. Kini dili usa ka kalipay alang kanila, ang balaod alang kang Jehova, ug dunganon. Ang mga eskriba ug mga Fariseo naghimo sa pagsaulog niini nga usa ka dili maagwanta nga palas-anon. Ang usa ka Judeo wala tugoti sa paghaling ug kalayo bisan sa pagdagkot ug kandila sa Adlawng Igpapahulay. Ingon nga usa ka gisangputan ang katawhan nagsalig sa mga Gentil alang sa daghang mga serbisyo nga gidili sa ilang mga kagalagaan nga pagabuhaton nila. Wala sila makahunahuna nga kon kini nga mga buhat sayop, kadtong nagpatrabaho sa uban aron sa pagbuhat kanila mga sadan sama ra nga sila ang nagtrabaho niini mismo. Naghunahuna sila nga ang kaluwasan limitado lamang sa mga Judeo, ug nga ang kahimtang sa tanan nga uban, nga wala nay paglaum, mahimong dili grabe. Apan ang Dios wala maghatag ug mga sugo nga dili mahimo nga tumanon sa tanan. Ang Iyang mga balaod wala magtugot ug dili makatarunganon o hakog nga mga pagdili.”—*Ibid.*, p. 204.

- a. Giunsa ni Jesus paghisgut ngadto sa kasugoan sa Dios ug ngadto sa Igpapahulay? Isaias 42:21.

“Si Jesus mianhi aron ‘sa pagpadaku sa kasugoan, ug naghimo niini nga dungganon.’ Siya wala magpakunhod sa dignidad niini, kon dili aron sa pagtuboy niini. . . . Siya mianhi aron sa pagpahigawas sa Igpapahulay gikan niining makapahisol nga mga tulomanon nga naghimo niini nga usa ka tunglo imbes nga pana-langin.”—*The Desire of Ages*, p. 206.

- b. Unsa ang angay ug dili angay nga buhaton diha sa Igpapahulay? Exodus 20:8-11.

“Sa taliwala sa mga nag-antus didto sa linaw gipili [ni Cristo] ang labing grabi nga kaso kang kinsa gamiton ang Iyang gahum sa pagpangayo, ug mimando sa tawo sa pagdala sa iyang higdaanan sa tibok ciudad aron sa pagmantala sa dakung buhat nga nahimo diha kaniya. Kini magpatunghag pangutana kon unsa ang su-bay sa balaod nga buhaton sa Igpapahulay, ug mag-abli sa dalan alang Kaniya sa pagsaway sa mga pagdili sa mga Judeo mahitungod sa adlaw sa Ginoo, ug sa pagpahayag sa ilang mga walay pulos nga mga tradisyon.

“Si Jesus mipahayag ngadto kanila nga ang buhat sa paghumpay sa mga sinakit nahiuyon sa kasugoan sa Igpapahulay. Kini nahiuyon sa buhat sa mga buhat sa mga manolonda sa Dios, nga sa kanunay nagakanaog ug nagasaka sa taliwala sa langit ug sa yuta aron mangalagad sa nag-antus nga tawo. . . .

“Ug ang tawo usab adunay buluhaton nga pagabuhaton niining adlaw. Ang mga gikinahanglan sa kinabuhi kinahanglan nga atimanon, ang mga masakiton kinahanglan atimanon, ang mga panginahanglan sa mga nanginahanglan kinahanglan nga mahatagan. Dili siya isipon nga walay sala siya nga nagdumili sa paghumpay sa nag-antus diha sa Igpapahulay. Ang balaang adlaw sa pagpahulay sa Dios gihimo alang sa tawo, ug ang mga buhat sa kalooy hingpit nga nahiuyon sa katuyoan niini. Ang Dios wala magtinguha sa iyang mga binuhat nga mag-antus sa usa ka oras nga kasakit nga mahimong mahumpay diha sa Igpapahulay o bisan unsa nga adlaw.”—*Ibid.*, pp. 206, 207.

PERSONAL SUBLI NGA MGA PANGUTANA

1. Unsang pagtoo ang nikaylap bahin sa linaw sa Betsaida?
2. Unsang pinasahi nga kaso ang nakadani sa pagtagad ni Cristo?
3. Sa unsang paagi mamaayo ang atong espirituwal nga paralisis?
4. Unsay nakapasuko pag-ayo sa mga Judeo bahin sa milagrosong pag-pang-ayo?
5. Unsang mga buhat ang nahiuyon sa sugo sa Igpapahulay?

Ang Pagbulot-an sa Anak

SAG-ULOHON NGA BERSEKULO: “Kay ingon nga ang Amahan may kinabuhi sa iyang kaugalingon, sa maong pagkaagi nagahatag usab siya sa Anak aron nga kini makabaton ug kinabuhi sa iyang kaugalingon. Ug siya nagahatag kaniya ug pagbulot-an sa pagpahamtang sa hukom, kay siya Anak sa tawo” (Juan 5:26, 27).

Gisugyot nga Basahon: *Thoughts From the Mount of Blessing*, pp. 123–129.

“Ang Akong pagbulot-an, [si Jesus] miingon, sa pagbuhat sa bulohaton nga inyong giakusar Kanako, mao nga Ako ang Anak sa Dios, usa uban Kaniya diha sa kinaiya, diha sa kabubut-on, ug diha sa katuyoan. Diha sa tanan Niyang mga buhat sa paglalang ug sa probidensya, Ako nakigkooperar uban sa Dios.”—*The Desire of Ages*, p. 208.

1. KAPANTAY SA DIOS

Domingo, Marso 16

a. Gawas pa sa pag-ayo sa paralitiko diha sa Igpapahulay, sa unsang lain pang katarungan nga ang mga Judeo nagdumot kang Jesus? Juan 5:17, 18.

“Si Jesus nag-angkon ug pantay nga katungod uban sa Dios. . . .

“Ang tibook nasud sa mga Judeo nagtawag sa Dios nga ilang Amahan, busa dili unta sila sa hilabihan masuko kon si Cristo nagrepresentar sa Iyang kaugalingon ingon nga magbarug diha sa sama nga relasyon ngadto sa Dios. Apan sila nag-akusar Kaniya sa pagpasipala, nagpakita nga ilang nasabtan Siya ingon nga naghimo niini nga pag-angkon diha sa pinakataas nga pagpanabot.”—*The Desire of Ages*, pp. 207, 208.

b. Giunsa ni Cristo pagpabarug ang pagbulot-an sa kasugoan sa Dios ibabaw sa tawhanon nga mga tradisyon? Mateo 15:1-9, 13.

“Kining mga kaaway ni Cristo walay mga argumento sa pagtagbo sa mga kama-tuoran nga Iyang gidala ngadto sa ilang mga konsensya. Sila igo lamang maka-hisgut sa ilang mga kustombre ug mga tradisyon, ug kini daw huyang ug walay lami kon itandi sa argumento ni Jesus nga gikuha gikan sa pulong sa Dios ug sa walay hunong nga liyok sa kinaiyahan.”—*Ibid.*, p. 208.

a. Giunsa ni Jesus pagsaysay ang Iyang relasyon uban sa Amahan? Juan 5:19, 20.

b. Unsang pagbulot-an ug gahum kalabut sa Amahan ang gipahayag ni Cristo nga Iya usab nga nabatonan? Juan 5:21-23.

“Ang mga sacerdote ug mga magmamando nagbutang sa ilang kaugalingon ingon nga mga maghuhukom aron sa pagkondenar sa buhat ni Cristo, apan Iyang gipahayag ang Iyang kaugalingon nga ilang maghuhukom, ug ang maghuhukom sa tibook nga yuta. Ang kalibutan gitugyan ngadto kang Cristo, ug pinaagi Kaniya miabut ang matag panalangin gikan sa Dios ngadto sa nahulog nga kaliwat. Siya mao ang Manunubos kaniadto maingon man sa human sa Iyang pagpakatawo. Sa diha nga adunay sala, adunay usa ka Manluluwas. Siya naghatag ug kahayag ug kinabuhi sa tanan, ug sumala sa sukod sa kahayag nga gihatag, ang matag usa pagahukman. Ug Siya nga naghatag sa kahayag, Siya nga nagsunod sa kalag uban sa labing malumo nga pangamuyo, nagtinguha sa pagdaug niini gikan sa sala ngadto sa pagkabalaan, anaa sa usa ang iyang manlalaban ug maghuhukom.”—*The Desire of Ages*, p. 210.

c. Ihulagway ang kausaban sa kinaiya nga mahitabo samtang kita makaamgo nga si Cristo mao ang atong maghuhukom. Roma 2:1–3; Mateo 7:1.

“Siya nga nagpatuyang sa usa ka masawayon nga espiritu sad-an sa mas daku nga sala kay sa usa nga iyang gipasanginlan, tungod kay dili lamang siya makahimo sa samang sala, kondili nagdugang pa niini sa pagkamapahitas-on ug pagkamasawayon.

“Si Cristo mao lamang ang tinuod nga sumbanan sa kinaiya, ug siya nga nagpahimutang sa iyang kaugalingon ingon nga sumbanan alang sa uban nagbutang sa iyang kaugalingon sa dapit ni Cristo. Ug tungod kay ang Amahan ‘nagtugyan sa tanang paghukom ngadto sa Anak’ (Juan 5:22), bisan kinsa nga maghunahuna sa paghukom sa mga motibo sa uban nag-ilog na usab sa katungod sa Anak sa Dios. Kini nga mga maghuhukom ug mga kritiko mao ang nagbutang sa ilang kaugalingon sa kiliran sa anticristo, ‘nga mosupak ug mobayaw sa iyang kaugalingon labaw sa tanan nga gitawag ug Dios, o kanang ginasinba; aron nga siya ingon nga Dios nagalingkod sa templo sa Dios, nagpakita sa iyang kaugalingon nga siya Dios.’ 2 Tessalonika 2:4.”—*Thoughts From the Mount of Blessing*, pp. 125, 126.

“Dili nato mabasa ang kasingkasing. Ang atong mga kaugalingon masalaypon, dili kita kuwalipikado nga molingkod sa paghukom sa uban. Ang may kinutoban nga mga tawo makahukom lamang gikan sa panggawas nga panagway. Kaniya lamang nga nahibalo sa tinago nga mga tuburan sa buhat, ug kinsa nakiglabot nga malumo ug maloloy-on, gihatag ang paghukom sa kaso sa matag kalag.”—*Ibid.*, p. 124.

- a. Unsang kasigurohan ang gihatag ngadto sa matag matinud-anon nga tumotuo diha kang Cristo? Juan 5:24.
-

“Diha sa matag mando ug diha sa matag saad sa pulong sa Dios anaa ang gahum, ang kinabuhi sa Dios, diin ang sugo matuman ug ang saad matuman. Siya nga pinaagi sa pagtoo midawat sa pulong makadawat sa kinabuhi ug kinaiya sa Dios.”—*Christ’s Object Lessons*, p. 38.

“Ang dakung buhat nga nahimo alang sa makasasala nga namansahan ug nabulingan sa dautan mao ang buhat sa pagkamatarung. Pinaagi Kaniya nga nagsulti sa kamatuoran siya gipahayag nga matarung. Ang Ginoo nagbilang ngadto sa magtutuo sa pagkamatarung ni Cristo ug nagpahayag kaniya nga matarung atubangan sa uniberso. Iyang gibalhin ang iyang mga sala ngadto kang Jesus, ang representante sa makasasala, kahalili, ug piyansa. Diha kang Cristo Iyang gibutang ang kasal-anan sa matag kalag nga nagatoo. ‘Siya naghi-mo kaniya nga sala alang kanato, nga wala makaila sa sala; aron kita mahimo ang pagkamatarung sa Dios diha kaniya’ (2 Corinto 5:21). . . .

“Bisan tuod ingon nga mga makasasala kita nailalum sa pagkahinukman sa kasugoan, apan si Cristo pinaagi sa Iyang pagkamatinumanon mihatag ngadto sa kasugoan, sa mga gipangayo alang sa mahinulsulon nga kalag sa merito sa Iyang kaugalingong pagkamatarung. Aron maangkon ang pagkamatarung ni Cristo, gikinahanglan nga ang makasasala makahibalo unsa kana nga paghinulsol nga nagabuhat sa usa ka radikal nga pagbag-o sa hunahuna ug sa espiritu ug sa paglihok. Ang buhat sa pagbag-o kinahanglan nga magsugod diha sa kasingkasing, ug magpakita ug gahum niini pinaagi sa matag galamhan sa pagkatawo; apan ang tawo dili makahimo sa pagmugna ug paghinulsol nga sama niini, ug makasinati lamang niini pinaagi kang Cristo, nga misaka sa kahitas-an, nagdala ug panon sa mga bihag, ug ngadto sa mga tawo naghatag ug mga gasa.”—*Selected Messages*, bk. 1, pp. 392, 393.

- b. Unsang balaanong mga katungod ang gipadayag ni Cristo nga Iyang nabatonan? Juan 5:25–29.
-

“Tungod kay Siya nakatilaw sa mga lawog sa tawhanong kasakit ug tentasyon, ug nakasabut sa mga kahuyang ug sa mga sala sa mga tawo; tungod kay alang kanato Siya nagmadaugon sa pagsukol sa mga tentasyon ni Satanas, ug magtagad nga makiangayon ug mapuanguron sa mga kalag nga giulaan sa Iyang kaugalingong dugo aron maluwas—tungod niini, ang Anak sa tawo gitudlo sa pahamtang sa paghukom.”—*The Desire of Ages*, p. 210.

“Si Cristo gitagaan ug gahum sa paghatag ug kinabuhi ngadto sa tanang linalang.”—*Selected Messages*, bk. 1, p. 249.

- a. Giunsa ni Jesus pagsaysay ang hinungdan sa pagkawalay pagtoo sa mga Judeo? Juan 5:37, 38.

“Imbis nga mangayo ug pasaylo sa buhat nga ilang gireklamo, o magsaysay sa Iyang katuyoan sa pagbuhat niini, si Jesus miatubang sa mga punoan, ug ang akusado nahimong magsusumbong. Iyang gibadlong sila tungod sa kagahi sa ilang mga kasingkasing, ug ang ilang pagkawalay alamag sa mga Kasulatan. Siya mipahayag nga sila misalikway sa pulong sa Dios, maingon nga sila nagsalikway Kaniya nga gipadala sa Dios.”—*The Desire of Ages*, p. 211.

- b. Ngano man nga ang mga Judeo napakyas sa pagsabut sa mga Kasulatan? Juan 5:39, 40.

“Diha sa matag pahina, diha man sa kasaysayan, o lagda, o tagna, ang Daang Tugon nga mga Kasulatan gisidlakan uban sa himaya sa Anak sa Dios. Hangtud nga kad-tong diosnon nga institusyon, ang tibook sistema sa Judaismo maoy usa ka kompleto nga tagna sa ebanghelyo. Kang Cristo ‘nagsaksi ang tanang mga propeta.’ Buhat 10:43. Gikan sa saad nga gihatag kang Adan, hangtud sa nagsunosunod nga mga patriarka ug ang legal nga ekonomiya, ang mahimayaong kahayag sa langit nagpatin-aw sa mga lakang sa Manunubos. Ang mga manalagna nakakita sa Bitoon sa Bethlehem, ang Shilo nga moabot, samtang ang umaabot nga mga butang gibanlas sa ilang atubangan sa mysteryosong prosesyon. Sa matag sakripisyo sa kamatayon ni Cristo gipakita. Sa matag panganod sa insenso ang Iyang pagkamatarung misaka. Sa matag trumpeta sa tinghugyaw ang Iyang ngalan gipatingog. Diha sa makalilisang nga misteryo sa balaan sa mga balaan ang Iyang himaya nagpuyo.

“Ang mga Judeo adunay mga Kasulatan nga anaa kanila, ug nagdahum nga sa ilang panggawas nga kahibalo sa pulong aduna silay kinabuhing dayon. Apan si Jesus miingon, ‘nga ang Iyang pulong wala magapabilin diha kaninyo.’ Nagsalikway kang Cristo diha sa Iyang pulong, ilang gisalikway Siya diha sa personal. ‘Dili kamo moduol Kanako,’ Siya miingon, ‘aron nga kamo makabaton ug kinabuhi.’

“Ang Judeo nga mga pangulo nagtuon sa mga pagtulun-an sa mga propeta mahitungod sa gingharian sa Mesias; apan sila mibuhat niini, dili uban sa sala sa tinguha nga mahibalo sa kamatuoran, apan uban sa katuyoan sa pagpangita ug ebidensya sa pagpadayon sa ilang ambisyoso nga mga paglaum. Sa diha nga si Cristo mianhi sa paagi nga sukwahi sa ilang gipaabut, sila dili modawat Kaniya; ug aron sa pagpakamatarung sa ilang kaugalingon, sila naninguha sa pagproyba Kaniya nga usa ka maglilimbong. Sa diha nga sila nakabutang sa ilang mga tiil niini nga dalan, masayon alang kang Satanas sa paglig-on sa ilang pagsupak kang Cristo. Ang mga pulong nga angay unta nga dawaton ingon nga ebidensya sa Iyang pagkadios gihubad batok Kaniya. Sa ingon niana ilang giliso ang kamatuoran sa Dios ngadto sa bakak.”—*Ibid.*, pp. 211, 212.

- a. Unsay nagdala sa mga Judeo sa pagsalikway kang Jesus ug sa pagpangita sa bakakon nga mga magtutudlo? Juan 5:41-44.

“Si Jesus miingon, ‘Wala ako makadawat ug dungog gikan sa mga tawo.’ Dili ang inpluwensya sa Sanhedrin, dili ang ilang pag-uyon ang Iyang gitinguha. Dili siya makadawat ug dungog gikan sa ilang pag-uyon. Siya gitagaan uban sa dungog ug pagbulot-an sa Langit. Kon kini pa ang iyang gitinguha, ang mga manolonda moanhi unta aron sa Pagsimba kaniya; ang Amahan makapamatuod pag-usab sa Iyang pagka-dios. Apan alang sa ilang kaugalingon, alang sa nasud kansang mga pangulo mao sila, Iyang gitinguha ang Judeo nga mga magmamando sa pag-ila sa Iyang kinaiya, ug makadawat sa mga panalangin Siya mianhi aron sa pagdala kanila.

“‘Ako mianhi sa ngalan sa Akong Amahan, ug kamo wala modawat Kanako: kon adunay moanhi diha sa iyang kaugalingong ngalan, siya inyong dawaton.’ Si Jesus mianhi pinaagi sa pagbulot-an sa Dios, nga nagdala sa Iyang dagway, nagtuman sa Iyang pulong, ug nagatinguha sa Iyang himaya; apan wala Siya dawata sa mga pangulo sa Israel; apan kon adunay moabut, nga magabaton sa kinaiya ni Cristo, apan gipalihok pinaagi sa ilang kaugalingong kabubut-on ug nagatinguha sa iyang kaugalingon nga himaya, sila pagadawaton. Ug ngano? Tungod kay siya nga nagatinguha sa iyang kaugalingon nga himaya nagapangamuyo sa tinguha sa pagbayaw sa kaugalingon diha sa uban. Ngadto sa maong hangyo ang mga Judeo makatubag. Sila modawat sa mini nga magtutudlo tungod kay siya magaulog-ulog sa ilang garbo pinaagi sa pagtugot sa ilang gipangga nga mga opinyon ug tradisyon. Apan ang pagtulon-an ni Cristo wala mosibo sa ilang mga ideya. Kini espirituwal, ug nagkinahanglan sa pagsakripisyo sa kaugalingon; busa dili sila modawat niini. Wala sila mahinasa sa Dios, ug ngadto kanila ang Iyang tingog pinaagi kang Cristo mao ang tingog sa usa ka dumoluong.

“Dili ba ang samang butang nasubli sa atong panahon? Dili ba daghan, bisan sa relihiyoso nga mga pangulo, nga nagpatig-a sa ilang mga kasingkasing batok sa Balaang Espiritu, nga naghimo niini nga imposible alang kanila sa pag-ila sa tingog sa Dios? Wala ba sila magsalikway sa pulong sa Dios, aron nga ilang tumanon ang ilang kaugalingong mga tradisyon?”—*The Desire of Ages*, pp. 212, 213.

PERSONAL SUBLI NGA MGA PANGUTANA

1. Unsang pagbulot-an ug katungod ang giangkong ni Cristo?
2. Unsang relasyon ang kanunayng naglungtad tali kang Jesus ug sa Amahan?
3. Unsang makahatag ug kinabuhi nga gahum ang nabatongan ni Cristo?
4. Isaysay ang Juan 5:39.
5. Ihulagway ang resulta sa pagsalikway sa Judeong nasud kang Jesus ingon nga Mesias.

Si Jesus Nagpakaon sa Panon sa Katawhan

SAG-ULOHON NGA BERSEKULO: “Apan si Jesus miingon kanila: Dili kinahanglan nga mamauli sila, hatagi ninyo sila sa makaon” (Mateo 14:16).

Gisugyot nga Basahon: *Testimonies for the Church*, vol. 6, pp. 341–348.

“Sagad kita maga-ukon-ukon, dili buot sa paghatag sa tanan nga atong nabatonan, mahadlok sa paggasto ug aron gastohon alang sa uban. Apan si Jesus nagsugo kanato, ‘Hatagi sila ug makaon.’ Ang Iyang sugo maoy usa ka saad; ug sa luyo niini ang sama nga gahum nga nagpakaon sa panon didto sa daplin sa dagat.”—*The Desire of Ages*, p. 369.

1. GIGUTOM NGA MGA KALAG

Domingo, Marso 23

- a. Gawas sa mga tinon-an, kinsa pa ang kauban ni Jesus sa dihang Siya mitabok sa dagat sa Galilea sa wala pa ang pasko? Juan 6:1, 2.

“Si Cristo miadto sa usa ka hilit nga dapit uban sa Iyang mga tinon-an, apan kining talagsaon nga panahon sa malinawon nga kalinaw sa wala madugay naputol. Ang mga tinon-an naghunahuna nga sila nakapahulay na diin dili sila mabalda; apan sa diha nga ang panon sa katawhan gimingaw sa langit-nong Magtutudlo, sila nangutana, ‘Hain man Siya?’ Ang pipila taliwala kanila nakamatikod sa direksyon diin si Cristo ug ang Iyang mga tinon-an miadto. Daghan ang miadto pinaagi sa yuta aron sa pagtagbo kanila, samtang ang uban misunod pinaagi sa ilang mga sakayan tabok sa tubig. Ang pasko haduol na, ug, gikan sa halayo ug sa duol, ang mga pundok sa mga magpapanaw sa ilang dalan paingon sa Jerusalem nagkatigum aron sa pagtan-aw kang Jesus. Nadungagan ang ilang gidaghanon, hangtud nga adunay nagkatigom lima ka libo ka lalake gawas sa mga babaye ug mga bata. Sa wala pa makaabot si Cristo sa baybayon, usa ka panon sa katawhan naghulat Kaniya. Apan Siya midunggo nga wala nila mabantayi, ug migugol ug makadiyot nga panahon uban sa mga tinon-an.”—*The Desire of Ages*, p. 364.

- b. Ilugway ang espirituwal nga kahimtang sa katawhan nga nagkatigom. Marcos 6:34.

- a. Unsa may sa kamaloloy-on nakita ni Jesus nga gikinahanglan sa katawhan — ug giunsa Niya paggamit kini nga kahigayonan aron sa pagsulay sa pagtoo sa Iyang tinon-an, si Felipe? Juan 6:3-6.

“Gikan sa kilid sa bungtod [si Jesus] milantaw sa nagalihok nga pundok sa katawhan, ug ang Iyang kasingkasing natandog sa pagkalooy. Nabalda Siya, ug nakawatan sa iyang pahulay, wala siya masuko. Nakita niya ang mas daku nga panginahanglan nga kinahanglan sa Iyang pagtagad samtang Siya nagtan-aw sa mga tawo nga nangabot ug nangabot gihapon. Siya natandog uban ang kalooy ngadto kanila, tungod kay sila sama sa mga carnero nga wala magbalantay.’ Mibiya sa Iyang pahulayanan, Siya nakakita ug usa ka haum nga dapit diin Siya makaalagad kanila. Wala silay nadawat nga tabang gikan sa mga sacerdote ug mga magmamando; apan ang makaayo nga tubig sa kinabuhi midagayday gikan kang Cristo samtang Siya nagpanudlo sa panon sa katawhan sa dalan sa kaluwasan. . . .

“Ang adlaw alang kanila daw langit dinhi sa yuta, ug sila sa hingpit wala mahibalo kon unsa na kadugay nga wala sila makakaon ug bisan unsa.

“Sa kadugayan ang adlaw natapos. Ang adlaw misalop na sa kasadpan, apan ang mga tawo nagpabilin. Si Jesus nagbuhat sa tibook adlaw nga walay pagkaon o pahulay. Siya nangluspada tungod sa kakapoy ug kagutom, ug ang mga tinon-an mihangyo kaniya sa paghunong sa Iyang pagpangabudlay. Apan dili Siya makapalayo sa Iyang kaugalingon gikan sa panon sa katawhan nga midutdut kaniya. . . .

“Siya kinsa mitudlo sa mga tawo sa paagi sa pagbaton sa kalinaw ug kalipay sama kamahunahunaon sa ilang temporaryo nga mga panginahanglan maingon sa ilang espirituhanong panginahanglan. Ang mga tawo gikapoy ug nangaluya. Adunay mga inahan nga adunay mga masuso diha sa ilang mga bukton, ug ang gagmay nga mga bata nga nagkupot sa ilang mga sayal. Daghan ang nagbarog sulod sa pipila ka mga oras. . . .

“Daghan ang nangabut gikan sa halayo, ug wala makakaon sukad pa sa buntag. Diha sa naglibot nga mga lungsod ug mga balangay makahimo sila nga makapalit ug pagkaon. . . . Apan si Jesus miingon, ‘Hatagi silag makaon,’ ug unya, milingi kang Felipe, nangutana, ‘Asa man kita mopalit ug tinapay, aron sila makakaon?’ Kini Iyang gisulti sa pagsulay sa pagtoo sa tinon-an.”—*The Desire of Ages*, pp. 364, 365.

- b. Unsa man ang reaksiyon ni Felipe? Juan 6:7.

“Mitan-aw si Felipe sa daplin sa dagat nga puno sa katawhan, ug naghunahuna nga unsa ka imposible ang paghatag ug pagkaon aron sa pagtagbaw sa mga panginahanglan sa maong panon. Mitubag siya nga ang duha ka gatos ka denario nga kantidad sa tinapay dili gayud paigo aron bahin-bahinon kanila, aron ang matag usa makabaton ug gamay.”—*Ibid.*

- a. Unsang inpormasyon ang gihatag ni Andres ngadto kang Jesus - ug unsa ang gimando ni Jesus sa mga tinon-an nga buhaton? Juan 6:8-10.

“Si Jesus nangutana kon unsa ka daghan ang pagkaon ang makaplagan taliwala sa panon. ‘Adunay usa ka bata dinhi,’ miingon si Andres, ‘nga adunay lima ka tinapay nga sebada, ug duha ka gagmay nga isda; apan unsa sila taliwala sa daghan kaayo?’ Mimando si Jesus nga dalhon kini ngadto Kaniya. Unya Iyang gisugo ang mga tinon-an sa pagpalingkod sa mga tawo diha sa mga balili sa mga pundok nga tig kalim-an o usa ka gatus, aron sa pagpreserbar sa kahusay, ug aron ang tanan mahimong makasaksi kon unsay Iyang pagabuhaton.”—*The Desire of Ages*, p. 365.

- b. Isaysay ang mga lakang nga gihimo ni Cristo sa pagpadaghan sa pagkaon — ug unsa nga mga leksyon ang atong makat-onan gikan niini. Mateo 14:19; Marcos 6:37-41; Juan 6:11.

“Si Jesus wala magtinguha sa pagdani sa mga tawo ngadto Kaniya pinaagi sa pagtagbaw sa tinguha alang sa kaluho. Ngadto nianang dakung panon, gikapoy ug gitutom human sa taas, kulbahinam nga adlaw, ang yano nga pagkaon maoy usa ka pasalig sa Iyang gahum ug sa Iyang malumo nga pag-atiman kanila diha sa yano nga mga panginahanglan sa kinabuhi. Ang Manluluwas wala misaad sa Iyang mga sumosunod sa mga kaluho sa kalibutan; ang ilang kapalaran mahimong masirad-an pinaagi sa kakabus; apan ang Iyang pulong maoy usa ka saad nga ang ilang panginahanglan mahatag ug Siya nagsaad nianang mas maayo pa kay sa yutan-on nga kaayohan — ang nagapadayon nga kahupayan sa Iyang kaugalingong presensya.”—*The Ministry of Healing*, pp. 47, 48.

“Niini nga milagro, si Cristo nakadawat gikan sa Amahan; Iyang gihatag ngadto sa mga tinon-an, ang mga tinon-an ngadto sa mga tawo, ug ang mga tawo ngadto sa usag usa. Busa ang tanan nga nahiusa kang Cristo makadawat gikan Kaniya sa tinapay sa kinabuhi, ug mipaambit niini ngadto sa uban. Ang Iyang mga tinon-an mao ang natudlo nga paagi sa kadugtongan tali ni Cristo ug sa katawhan.”—*Ibid.*, p. 49.

- c. Diha sa unsang leksyon sa matuod nga pagpangalagad nga kita gipahinumdoman dinhi? Isaias 61:6.

“Gidala sa mga tinon-an ngadto kang Jesus ang tanan nga ilang nabatonan; apan wala Siya magdapit kanila aron makakaon. Iyang gisugo sila sa pagsilbi sa katawhan. Ang pagkaon midaghan diha sa Iyang mga kamot, ug ang mga kamot sa mga tinon-an, nga gituyhad ngadto kang Cristo, dili gayud mahimong walay sulod. Ang gamay nga tagana nahimong paigo alang sa tanan. Sa dihang nabusog na ang panon sa katawhan, ang mga tinon-an mikaon uban ni Jesus sa bililhon, gitagana sa langit nga pagkaon.”—*Ibid.*

- a. Unsay atong makat-onan gikan sa makahuloganon nga pahamangno nga gi-hatag ni Jesus human ang pagpakaon sa panon sa katawhan? Juan 6:12, 13.

“Sa dihang natigom na ang mga bukag sa mga tipik, ang mga tawo naghunahuna sa ilang mga higala sa balay. Buot nila nga makaambit sila sa tinapay nga gipanalanginan ni Cristo. Ang mga sulod sa mga bukag giapod-apod sa mga madasigon nga panon sa katawhan, ug gidala ngadto sa tibook rehiyon sa palibot.”—*The Desire of Ages*, p. 368.

“Gisugo ni Jesus ang Iyang mga tinon-an, ‘Hipusa ninyo ang mga tipik nga nanghibilin, aron nga walay mausik.’ Juan 6:12. Kini nga mga pulong nagpasabot ug labaw pa kay sa pagbutang sa pagkaon diha sa mga basket. Ang leksyon duha ka pilo. Walay angay usikan. Wala kita’y dumilian nga temporaryo nga bentaha. Wala kitay dumilian nga magsilbi nga kaayohan sa usa ka tawo. Himoa nga ang tanan matigum nga makapahupay sa mga kinahanglanon sa mga gigutom sa yuta. Uban sa pariho nga pagmatngon atong tagaan ug bili ang tinapay gikan sa langit aron sa pagtagbaw sa panginahanglan sa kalag. Pinaagi sa matag pulong sa Dios kita magkinabuhi. Walay bisan unsa nga gisulti sa Dios ang mawala. Walay usa ka pulong nga may kalabutan sa atong walay katapusan nga kaluwasan nga atong pasagdan. Walay usa ka pulong ang mahulog sa yuta nga walay kapuslanan.”—*The Ministry of Healing*, p. 48.

- b. Bisan pa nga daw makita nga dili kombenyente o imposible, unsa nga Cristiano nga kalidad nga kita giagda sa pag-ugmad? Isaias 58:6–8; 1 Pedro 4:9.

“Sa matag emerhensya kita mangayo ug tabang gikan Kaniya kinsa adunay walay kinutuban nga mga tinubdan sa Iyang mando. . . .

“Samtang makita nato ang mga kinahanglanon sa mga kabus, sa mga walay alamag, mga sinakit, unsa ka sagad nga ang atong mga kasingkasing mobati. Kita mangutana, ‘Unsa may mahimo sa atong mahuyang nga kusog ug gamay nga mga tinubdan aron sa paghatag niining makalilisang nga panginahanglan? Maghulat ba kita ug usa nga mas daku ug abilidad aron sa pagdumala sa buhat, o sa mga organisasyon aron nga maoy mohimo niini? Si Cristo miingon, ‘Hatagi silag makaon.’ Gamita ang paagi, ang panahon, ang abilidad, nga anaa kanimo. Dad-a ang imong mga tinapay nga sebada ngadto kang Jesus..

“Bisan pa nga ang imong mga tinubdan tingali dili igo sa pagpakaon sa liboan, sila mahimong paigo sa pagpakaon sa usa. Diha sa kamot ni Cristo mahimo silang makapakaon ug daghan. Sama sa mga tinon-an, ihatag kon unsa ang anaa kaninyo. Si Cristo mopadaghan sa gasa. Iyang balusan ang matinuoron, yano nga pag-salig diha Kaniya. Kanang daw gamay ra nga tagana magapakita ingon nga usa ka daku nga kombira.”—*Ibid.*, pp. 49, 50.

- a. Unsang kahibulongan nga kinaiya sa Dios nga dili nato gayud kalimtan? Salmo 37:25, 26; Filipos 4:19.

“Ang gracia sa Dios diha sa gamay nga bahin nga naghimo niining tanan nga paigo. Ang kamot sa Dios makapadaghan niini ug usa ka gatus ka pilo. Gikan sa Iyang mga tinubdan Siya makahimo sa pagbuklad ug lamesa diha sa kamin-gawan. Pinaagi sa paghikap sa Iyang kamot Siya makahimo sa pagpadaghan sa nihit nga probisyon o tagana ug maghimo niini nga paigo alang sa tanan. Ang Iya nga gahum mao nga nagpatubo sa mga tinapay ug mais diha sa mga kamot sa mga anak sa mga propeta. . . .

“Sa dihang si Jesus misugo sa Iyang mga tinon-an sa paghatag ug pagkaon ngadto sa panon sa mga tawo, sila mitubag, ‘Wala na kitay lain gawas sa lima ka tinapay ug duha ka isda; gawas nga kita moadto aron sa pagpalit ug pagkaon alang niining tanang katawhan.’ Lucas 9:13. Unsa man kana taliwala sa daghan kaayo?

“Ang leksyon alang sa mga anak sa Dios sa matag panahon. Sa dihang ang Ginoo naghatag ug bulohaton nga pagahimoon, ayaw itugot nga ang mga tawo mohu-nong sa pagpangutana sa pagkamakatarunganon sa sugo o ang posibleng resulta sa ilang mga paningkamot sa pagsunod. Ang tagana diha sa ilang mga kamot mahimong dili paigo sa gikinahanglan aron nga makompleto; apan diha sa mga kamot sa Ginoo kini mapamatud-an nga labaw pa sa paigo. . . .

“Ang usa ka bug-os nga pag-ila sa relasyon sa Dios niadtong kinsa Iyang gipalit uban sa gasa sa Iyang Anak, ang usa ka mas daku nga pagtoo diha sa padayon nga pag-uswag sa Iyang kawsa dinhi sa yuta — mao kini ang dakung panginahanglan sa iglesia karon. Ayaw itugot nga adunay mag-usik-usik sa panahon diha sa pagkasubo sa kanihit sa ilang makita nga mga tinubdan. Ang gawasnon nga panagway mahimong dili maayo, apan ang kusog ug pagsalig diha sa Dios makapalambo sa mga tinubdan. Ang gasa nga gidala ngadto Kaniya uban ang pagpasalamat ug uban sa pag-ampo alang sa Iyang panalangin, Siya mopadaghan maingon sa Iyang pagpadaghan sa pagkaon nga gihatag ngadto sa mga anak sa mga manalagna ug sa gikapoy nga panon sa katawhan.”—*Prophets and Kings*, pp. 241–243.

PERSONAL SUBLI NGA MGA PANGUTANA

1. Ihulagway ang gawi sa mga tawo sa pagpaminaw sa mga pulong ni Cristo.
2. Giunsa sa Ginoo paghatag ang ilang personal nga panginahanglan?
3. Unsay atong makat-onan gikan sa paagi nga gihuptan ni Cristo ang panon diha sa kahusay?
4. Unsay angay nakong hinumdoman kon aghaton, “Hatagi silag makaon”?
5. Pagngalan ug mga panahon sa diha nga ang probidensya sa Dios alang kani-mo sa pinasahi talagsaon kaayo.

Unang Sabado nga mga Halad



Sabado, Enero 4

Multipurpose Center alang sa Panglawas ug Edukasyon sa Paraguay

Ang inyong madagayaon nga mga gasa mopabaskog sa panglawas ug pagtoo sa kadaghanan (tan-awa ang p. 4).



Sabado, Pebrero 1

Tabang sa Kalamidad sa Kalibutan

Kini nga halad makatabang sa matag usa diha sa mga lugar nga, naapek-tohan sa mga katalagman, sakit, kamatayon, o makahagit nga mga sirkumstansya (tan-awa ang p. 4).



Sabado, Marso 1

"Mga Anak sa Kinaiya" Sentro sa Edukasyon sa Romania

Tabang sa pagtapos sa gitukod nga usa ka bag-ong sayo nga edukasyon nga kagamitan alang sa gagmay nga mga kabataan sa Romania (tan-awa ang p. 4).